

田比陵人品記



封面空

青
雲

記

增修毘陵人品記序

夫人之品辟則水焉江湖之淼沼渚之泓澗壑之幽淵谷之翕了不相如而各成其品然必浮雲四斂孤月麗天而後一輪散其竒彩萬水挹其清華不以蕩浩廓形不以纖流減體月何心予水何心受若夫鑑而曙之刻畫逼肖向背已受其轉移炬而燭之黑白瞭然執者先居於黯黯於以定品不亦難乎余郡止園公睿性內融神識外朗性識所徹等別區分井如也中歲卓立朝常情深瞻此輒謝白簡臥青山乃道

遶仲長之居上下汝南之旦竊比洙泗權衡梓枌續
古庵之遺編發涇陽之笥錄一經點竄鬚眉宛然片
楮所登幽顯畢采矢筆未終誰云其人已朽展讀方
始俱可揖之同堂豈直家言可參國乘矣余嘗謂搆
是管者棲神欲澹命臆欲公藏照欲精羅胸欲博澹
無牽繫公息愛憎精可器收博資證核備是四者不
等別而自別不區分而自分正如流影入川洪纖吐
曜耳其止園公之謂乎公以止名園則夫澹也公也
精也博也總以一止止者也而其書不足以服人心

風千古吾不信矣

荆溪後學蔣應震謹序

增修毘陵人品記序

夫士以品貴道德功業文章皆品也生而鹿鹿無關
名教則無所貴品矣毘陵自吳泰伯季子而下號爲
禮讓名區其間忠孝廉節秀世邁俗更僕未易數往
給諫古庵毛公舊有人品記至光祿涇陽顧公有桑
梓錄存笥中二公品格煌煌名高月旦其所載記可
備一代典刑於是嚴所吳公銳意表章復加增定按
剔遘代鼓吹熙朝趨然有先進之思焉公學嗣太史
鐵諫錚錚爲延陵忠孝世閥以將母故方攬轡宣雲

遂解節歸退隱青山門外藏書柱下名園以止示一
隱不再出也考槃多暇則進同志諸賢相與揚扆是
邦文獻品隲無餘余讀之見其磊磊落落揭日而行
不以華膺見褒不以單寒見削不以師心不以耳擿
其論公尚氣節則字挾風霜獎恬退則風清林壑舉
必徵實汙不至阿其法正自鉅喆鴻匠以主谿山枕
漱或以道德揚芬或以功勛樹伐或以文章展采備
全德則首錄具一節則兼收其善之也長其惡之也
短無砭語無微辭其意厚事夥則繁稱行略則寡載

前者無爲過佚後者無爲濫觴上下數千年如人寫
照各諧其品而止其體裁當益公雅性峭直喜以名
教自負每彈壓今古語及忠良孝友仁人義士則公
之顏頰陽春可回及指奸斥佞馮陵髮上指則紫電
青雷薄于襟袖其素所樹立然也編成余適盪滌過
園中出以眎余乞一言弁首夫言亦有品太上貴之
余何能贊一辭或以君平棄世海月山雲悠然有同
調乎簪端明史鑑在屏居洛下之日平叔諫林就於
睢陽歸老之年宜公之品記向止園中操不律也名

教中桐江一絲公亦當令品貴矣

澄江後學夏樹芳謹撰

增修毘陵人品記序

古者品人於鄉其說昉之仲尼然鄉之好鄉之惡皆曰未可而曰善者好不善者惡其品鄉之灋備是已厥後東漢有月旦評視己皆善視人皆不善視己之好惡皆善視人之好惡皆不善以至恣睢憤裂卒成黨錮之禍此蓋不明仲尼之旨而誤用之者矣後東漢者悉知懲憤裂之非然嫉人之媿而軋之徇己之私而揚之苛人之小菁而瑕瑜之逞己之偏見而短長之大抵東漢之月旦公而激今日之月旦私而諛

東漢月旦之品失在善善惡惡之過明今日月旦之品失在善善惡惡之過混其公而激也流而爲抗爲憤猶可言也其私而諛也流而爲比爲黨弗可言也其善惡之過明也尚得罪於世路而不顧猶可言也其善惡之過混也甚得罪於名教而不惜弗可言也余謂今日非但不明善不善之旨益不明月旦之初意而誤用之者矣吁可懼也夫余鄉毘陵秦伯而下風氣日開禮教日盛中文獻悉是吾鄉主持其間忠臣烈士孝子悌弟得之史官所載故老所傳野編

遺錄所及者蓋百不什一耳先毛給諫有人品記顧光祿有桑梓錄二公表章之志俱不克就至侍御嚴所吳公慨然增脩之以就二公遺業訂書爲十卷上自初周歷漢晉唐宋以迄我明代不幾人人不幾事宜簡而不雜宜直而不諛宜信而不疑宜畧而不闕宜失之厚不敢失之薄宜失之寬不敢失之刻宜失衆人之是非不敢失聖賢之是非宜失一時之議論不敢失千萬世之公論可謂吾邦之信史矣雖然余猶懼巖穴之下有其德而無其位有其才而無其時

有其實而無其名有其事而無其傳者吾輩耳聞目見之外得毋有遺漏不可知者乎幸同郡諸君子皆以侍御之心爲心則近無愧毛顧二公之遺意遠可軼東漢而直追仲尼之旨厥功詎不偉哉

復禮居士陽羨史孟麟撰

增修

士無定品要存一失

生也直此本色也以其本名之
之就下也故無鉅細皆足以成
品以其
如火之熄水之不污也故無鉅細之品

貴品士者核其人必脈理真而後無贗品

其品必羣品備而後無失人毘陵爲泰伯端冕之地山川平行習尚得文質之中由周而來風氣日開至宋益著天下有事毘陵人必有則古昔稱先王不忍

自決其防者如慶元端平之間天下岌岌矣毘陵人
涇涇守其所學逐而去之者至以道學解散爲慶迄
于亂亡毘陵人猶孤城死守下及羽人釋子亦知與
城俱亡之爲義宜獨天性亦其習見習聞然也毛古
庵先生記毘陵人品顧涇陽先生志桑梓人物侍御
嚴所吳公更雅馴其文詞續入其後死一書十卷
謂攀龍不可無一言攀龍曰侍御之功偉哉夫人心
之所趨必有所定以爲一而制中焉夫
爲的者取

者取諸平旦
語稍錯雜焉人莫知所趨作御之厚於取善最爲別
類其示之的乎人固有與生俱生不與死俱死塞兩
間亘千古不可得而滅沒者非富貴利一謂也世
人畢其巧力昏夜乞哀以求之而與此曾不相涉夫
以百年易盡之身營此身不相涉之物譬之冠冕金
玉被飾土木偶人至于死之日了無餘味而後知其
向之所爲罔也亦大可哀矣其有感于斯編而興者
乎侍御之功偉哉

錫山後學高攀龍謹撰

增修毘陵人品記序

論人品于毘陵猶取材鄧林挹水溟澥也可勝記乎
然可記者多而能記者少何以故能爲記而不欲任
敢于任而不能記以不能代能者泚筆可記之品格
既與記者之人觴而記者之品鑒必不能與可記之
人合即有品不精即有記不傳終當俟之能記者而
能記者憂殘闕恐廢墜欲不任而終亦不能不任則
嚴所吳丈所爲近訂桑梓錄以遠紹人品記是也蓋
記述之事亦綦不易矣非故典熟則不能詳人生平

之本末非見地趨則不能別人制行之鉅細非椽爲
筆則枯腸或窘于鋪揚非鐵爲肝則軟骨或靡于趨
避而尤以心術之端爲主嚴所秉質直不回之性博
極羣書方其埋輪都門擊邪章上一日而長安之紙
爲貴以太宜人倚閭心動輒賦初衣斯其品卓矣今
尚論一鄉折衷輿論糠粃盡播幽隱全收惟具五長
自絕七短况昆陵夙稱忠義尤尚理學乃或高山不
仰下流可居吳歛變爲越吟秦轍忽隨燕駕惟無有
以先輩典刑示之者以此品人以此律己以此範俗

以此教家余知嚴所之記豈第欲存前進之準繩抑
欲留後來之榜樣也人各有傳睹傳即可徵品余不
具論論嚴所作記之意庶幾昆陵人悟而動木本水
源之思以重背其鄉也乎

武進後學錢春謹撰

增修昆陵人品記序

吾母毛太宜人爲黃門古庵公女孫居恒誨不肖輩
必依忠孝及相先學士抗疏受杖蒙難靡悔不肖輩
遽通通籍勛以恬修勿競榮膺皆烈丈夫所難人謂
母即嫺公宮教何以能若是迨不肖讀古庵公人品
記而後知公之垂訓宏貽謀遠也昆陵禮讓名墟英
詰代奮論其世友可尚取于鄉法倍親誦詩讀書景
行仰止未有以此品人不以此律己以此範俗不以
此教家者自公作記後迄今八十餘年前者彪炳後

者鵲起文獻之盛不可勝書十五年前歐陽郡侯擬修府誌屬光祿涇陽顧公品隲人物誌未就於是有人桑梓錄存笥中大都做古庵公之意補其未備續其未來畧以類从不立標目又且合同志諸賢討論商確草數易而後定未嘗師心自用沾沾局一隅之見也者顧公謝世已六七年笥中草幾于散佚古庵公之意將無所紹承而以不肖視之則母氏之栝棧也林居多暇不揣僭爲纂輯復就正諸鄉先生稍增定焉而因有慨於作者之難益信先輩用心之厚也夫

春秋一書誅賞並行誌記之體主於揚媿故表全瑜則瑕宜揜而猶點之其失也苛錄先德則世宜宥而猶適之其失也刻棺可蓋則論既定而故格之其失也恠結可釋則嗣不敵而故軋之其失也媚人各有本末而必援世講以內交其失也比祚或有衰榮而必借世系以貢諛其失也媚騫言中何德非言賜政達何言非政偃絃誦何政非文而必張一目以爲羅其失也拘今觀毛顧兩公所記錄有是數者無有哉善夫岑姚江序曰人以代著不以區分據行直書而

凡道德功業文章之次第如列宿懸象隱顯巨細居
然自見固仰窺先輩之用心抑亦後作之繩準也有
二壁於此色相若徑相若直且倍差側而視之其一
者厚而倍余不肖何能執鞭先賢近鑒遠師無宜處
其厚者而已矣

萬曆四十六年歲在戊子秋七月

毘陵後學吳亮謹序

毘陵人品記序

道嘗往來毘陵思古聖賢之遺墟庶幾乎賢人君子
之林及攷其郡國志乘乃兼采齊梁之君賢不肖混
矣夫子於是邦獨贊泰伯仲雍而賢季子彼其紀載
者何所師承也哉竊欲有所論正附于褒善之末未
遑也誠齋葉侯判吾越以簡塞爲理以文章藻飾吏
事既修吾姚誌梓之復以其鄉人品記進小子授之
曰此吾先君存齋公之所命意先友古庵毛公屬草
未就而俱下世某嗣業之惟子爲是正敘而傳焉道

初有慨于中敬受反覆之其去郡國所紀載遠矣人以代著而不以類分據行直書而凡道德功業文章之次第如日月列宿之懸象隱顯巨細居然自見其抉擇至精其文辭則史不徒去齊梁之僭偽而已昔者太史公傷悼卞隨務光之徒不蒙賞於夫子而發憤于伯夷之傳以謂砥行立名者必有藉于青雲之士以施及後世毘陵之賢產於商周者既獲夫子之贊許自秦漢以訖于今者誠齋父子朋友復能尊師夫子之旨而併記之文獻有徵作者奚歎乎記凡四

卷人品合若干人嗚呼盛矣攷其人論其世近取遠師以無慙是邦之賢斯又記此者之意也誠齋以嫌故於存齋古庵弗之記道謹按其行事綴傳于終篇嘉靖壬寅秋七月餘姚後學岑原道撰

皇陵人品記論次

郡人

皇明禮科右給事中毛憲初編

記人品

河南汝陽縣訓導葉夔同校

浙江紹興府通判葉金纂輯

福建道監察御史錢一本

南京光祿寺少卿顧憲成

品定錄

南京太僕寺少卿葉茂才

建昌府知府蔣應震

澄江孝廉 夏樹芳

太常寺少卿史孟麟

行人司行人高攀龍

福建道監察御史錢春

南京兵部郎中劉元珍叅訂

湖廣道監察御史吳亮增修

昆陵人品目一

商

秦伯 仲雍

周

季札 披裘公 辛共

漢

虞俊 彭修 彭循 蔣政

許武 許荆 蔣佩 王關

蔣堪與 高彪 高岱 陸璠

三國吳

張秉

周魴

華覈

晉

周處

周玘

周筵

孫無終

朱鳳

顧悅之

顧愷之

南朝宋

蒯思

蕭承之

蕭思話

吳欣之

華寶

薛天生

劉懷胤

俞齊民

一作余

蔣恭

徐勣

吳國夫

許昭先

南朝齊

蕭綦

蕭暉

蕭鑑

蕭鈞

蕭鏗

蕭道度

蕭遙欣

蕭紉

蕭景先

蕭赤斧

蕭叡明

吳達之

陳玄子

周山圖

周盤龍

子奉叔

蕭惠基

蕭懿

蕭敷

毘陵人品記卷一

商

泰伯仲雍皆周太王之子季歷之兄也季歷賢而有
聖子昌太王欲立季歷以及昌於是泰伯仲雍乃
犇荆蠻文身斷髮示不可用以避季歷季歷果立
是為王季而昌為文王泰伯之犇荆蠻自號句吳

荆蠻義之從而歸之千餘家立為吳泰伯

泰伯故城在今

無錫縣東南梅里平墟自端委以治吳之衣冠文

物自泰伯始泰伯卒今無錫縣北及常熟縣無子

毘陵八品記卷一

弟仲雍立是爲吳仲雍孔子曰泰伯其可謂至德也
也已矣三以天下讓民無得而稱焉謂虞仲隱居
放言身中清廢中權

周

季札泰伯十九世孫壽夢子壽夢有子四人長諸樊
次餘祭次餘昧次季札季札賢而壽夢欲立之季
札讓不可乃立諸樊諸樊已除喪讓位季札季札
棄其室而耕乃舍之及諸樊卒有命授弟餘祭必
致國於季札以稱先王壽夢之意且嘉季札之義

兄弟皆欲致國令以漸致焉季札封于延陵故號
曰延陵季子餘祭卒餘昧立餘昧卒復欲授季札
季札逃去乃立餘昧之子僚諸樊之子光弒僚代
立季札歸光復致國焉季札辭去終身不入吳國
季札生蠻夷行禮適義聞樂知政究觀人情深識
國體盖天性然也孔子稱其知禮於其卒也題其
墓曰嗚呼有吳延陵季子之墓

在今江陰
縣中浦西

披裘公夏月衣傲裘荷薪于道道有遺金不顧季札
見而呼之曰負薪者何不取金公笑曰君何居之

高視之下貌之君子而言之野也吾有君不君有友不友當暑衣裘君疑取金者乎請問姓氏曰子乃皮相之士何足與言姓名遂去相傳披裘者晉陵茶山路人也

辛共字大鵬灌陽人後居毘陵事韓爲郎中避秦入閩以家財求客爲韓報仇聞秦破盡發帑藏救饑民漢安五年無疾而逝

漢

虞俊字仲卿無錫人少以孝友稱明春秋公羊左氏

傳哀帝時爲御史稍遷丞相司直王莽秉政召爲司徒俊欲遜歸遂見脅迫仰天歎曰吾漢人也願爲漢鬼不能事漢賊飲藥而卒光武即位表其墓彭脩字子陽毘陵人年十五時父爲盜所劫脩拔佩刀前持盜帥曰父辱子死卿不顧死邪盜相謂曰此童子義士也不宜迫之辭謝而去後爲郡功曹西部都尉宰黽以微過收吳縣獄吏將殺之主簿鍾離意切諫黽怒并收意脩排閤直入拜于庭曰昔任座面折文侯朱雲拔毀欄檻自非賢君焉得

忠臣今慶明府爲賢君主簿爲忠臣鼂乃原意貫
獄吏罪已而州 脩從事賊張子林等作亂脩與
太守出討賊賊飛矢雨集脩障捍太守爲流矢所
中死太守得全賊素聞其恩信即殺中脩者餘悉
降散曰自爲彭君降非爲太守服也

彭循字子陽毘陵人建國二年海賊丁儀等萬人據
吳太守秋君聞循勇謀以守令循與儀相見陳說
利害應時散去民歌之曰時歲倉卒賊縱橫大戰
強弩不可當賴遇賢令彭子陽

蔣政字景化陽羨人性篤孝光武朝仕爲荆南刺史
父歿厝柩于都山之陽廬于墓側餒守三年服闋
又不忍離始宅于回圖居焉

許武字季長陽羨人太守第五倫舉爲孝廉武以二
弟晏普未顯欲令成名乃分異別居割產爲三自
取膏肥二弟所得並悉劣少鄉人皆稱二弟讓而
鄙武奢婪及二弟竝得選舉武乃會宗親泣曰吾
爲兄不肖盜聲竊位二弟年長未豫榮祿所以求
得分財自取大譏今理產三倍於前悉以推二弟

一無所留于是郡中翕然稱之位至長樂少府

許荆字少張武孫也少爲郡吏兄子世殺人報讎怨者操兵攻之荆出門逆而跪曰世無狀咎在荆不能訓導兄蚤沒一子爲嗣歿即絕滅願身代之怨者曰許掾郡中稱賢何敢相侵遂委去太守黃競舉荆孝廉稍遷桂陽太守郡濱南州風俗脆薄不識學義荆爲設喪紀婚姻制度使知禮禁嘗行縣至耒陽有蔣均兄弟訟財荆對之歎曰教化不行咎在太守乃顧使吏上書陳狀乞詣廷尉均兄弟

感悔各求受罪在事十二年父老稱歌徵拜諫議大夫卒于官桂陽人爲立廟樹碑

蔣佩字服思陽羨人儒雅廉介事親至孝仕漢由太正內史累遷冀州刺史在郡清儉妻自負薪入爲尚書令澹約終其身

王闕字選公無錫人明易學通天文郡舉爲主簿後漢初守山陰令補御史終陳留太守不交豪強人號王獨立

蔣堪與字楚圖陽羨人東漢建和中仕爲徐州刺史

潔己公清去浮費省繁苛百姓安之郡庭中有古柏枯死復生成以爲善政所感

高彪字義方無錫人家本單寒彪爲諸生游太學有雅才而訥于言嘗從馬融欲訪大義融疾不獲見乃覆刺遺融書譏融養疴傲士融慙追還之彪逝不顧後舉孝廉試經第一除郎中校書東觀數奏賦頌奇文因事諷諫靈帝異之時京兆第五永督幽州百官祖餞于長樂觀議郎蔡邕等皆賦詩彪獨作箴規之後遷內黃令帝勅同僚祖于上東門

詔東觀畫彪像以勸學者

高岱字孔文彪子少厲操行輕財貴義所友皆世偉人太守盛憲舉爲孝廉許貢來領郡讎憲岱將憲避難告急于陶謙顛顛泣血水漿不入口謙感其忠勇許爲出軍岱還而貢已囚其母人皆爲危悚岱往見貢才辭敏捷好自陳謝貢即出其母孫策聞其賢虛己以俟後爲忌者所中遂遇害

陸璠字仲芳毘陵人操履清正明京氏易尚書風角星算尤極精奧太守辟爲主簿視事旬日遂謝病

去隱居會稽山以典籍自娛公車載徵皆以疾辭
三國吳

張秉字仲節陽羨人時顧邵號知人一見遂友之為
延聲譽秉遭大喪邵親為制服結經邵守豫章發
在近路送者百數秉以疾不會邵辭賓客曰張仲
節有疾苦不能來別恨不見之暫還與訣諸君少
時相待其見重如此秉後仕吳為雲陽太守

周魴字子魚陽羨人少好學舉孝廉吳黃武中為都
陽太守平彭綺之亂魏曹休帥兵潛入皖魴齋七

牋誘休與陸遜邀擊之斬馘萬數賜爵關內侯賊
帥董嗣鈔畧豫章臨川諸郡魴復設方畧誘擒之
在郡十三年威惠並行

華覈字永先武進人始為上虞尉以文學入為秘府
郎遷中書丞孫皓即位更營新宮飾以珠玉盛夏
興工農事並廢又倉廩無儲世俗滋侈皆上疏極
諫前後所陳便宜及貢薦良能解釋罪過書百餘
上皆有補益皓不能用以微譴免歸

晉

周處字子隱，鮒子。少好田獵，不修細行。鄉里以南山白額虎、長橋下鮫并處目為三害。處聞父老言，乃射殺猛獸，投水搏鮫，因入吳。見陸雲，具以情告。曰：欲自修改，年已蹉跎，將恐無及。雲曰：古人貴朝聞夕改，但患志不立耳。處遂勵志克己。暮年，州府交辟。吳平，入洛，稍遷新平太守。撫和戎敵，雍土安之。改廣漢郡有獄三十年不決，處一朝決遣，得其枉。直以母老罷歸，尋除楚內史。未行，徵拜散騎常侍。處曰：古人辭大不辭小，乃先之楚時喪亂，後風俗

糾雜，處敦以義教，檢骸骨無主者，收瘞之。然後就徵及居近侍，多所規諷。遷御史中丞，糾劾不避寵戚。氏人齊萬年反，使處隸夏侯駿往征。既而梁王彤為征西大將軍，都督關中。駿與彤皆有宿憾，于處處知必陷己，或勸以母老辭。處曰：既辭親事，君父母安得而子乎？時賊衆七萬，駿逼處以五千擊之。彤復促令速進，而絕其後。繼處賦詩曰：去世事已策，馬觀西戎。藜藿甘梁黍，期之克令終。自旦戰及暮，斬首萬計。弦絕矢盡，左右勸之退。處按劍

曰良將受命鑿凶門以出有進無退以身殉國不亦可乎力戰而沒

墓在今宜興縣荆溪南

興贈平西將軍諡曰

孝三子玘靖札靖早卒玘札竝知名諸孫勰懋筵贊潛一門五侯並居列位吳士貴盛莫與爲比

周玘字宣佩沉毅有父風閉門潔己不妄交游名重一方薦除議郎太安中石冰陳敏錢璜等叛玘三舉義旅討之封烏程侯行吳興太守元帝置義興郡以旌其功焉卒諡忠烈

周筵靖子也卓犖有才幹累官黃門侍郎族兄續勰

合謀爲亂收聚徒衆元帝議討之王導以兵少恐不能制而筵忠烈爲衆所敬詔給力士百人還陽羨因殺續時筵有母在不過家省視長驅而去遷太子右衛率王敦作難加冠軍將軍都督會稽軍事討沈克未發而王師敗績聞从父札開城納敦憤恨慷慨義形于色尋遇害

孫無終晉陵人太元初謝玄鎮海陵募勁勇爲前鋒無終與劉牢之何謙並在選中百戰百勝號北府兵敵人畏之

朱鳳晉陵人學行清修老乃不調太興初以秘書監
華譚薦擢著作郎

顧悅之字君叔無錫人少有義行與簡文同年而髮
早白帝問其故對曰松柏之姿經霜猶茂蒲柳常
質望秋先零帝悅其對嘗爲殷浩吏浩坐廢卒悅
之將抗表爲浩訟寃浩親故多謂非宜悅之決意
以聞又與朝臣爭論衆無以奪浩得追復本官悅
之爲州別駕歷尚書右丞

顧愷之字長康悅之子博學有才氣謝安雅重之殷
仲堪引爲參軍愷之善丹青尤信小術世傳愷之
三絕才絕藝絕癡絕嘗爲虎頭將軍人稱顧虎頭
南朝宋

蒯思字道思蘭陵人武帝征孫恩縣遣恩給馬芻恩
舍芻歎曰大丈夫彎弓三石奈何克馬士帝聞之
給以鎧仗征妖賊先登膽力過人甚見信愛平京
城定建鄴封都鄉侯從伐盧循斬徐道覆與王鎮
惡襲江陵隨朱齡石伐蜀及司馬休之自以征以
來凡百餘戰身被重創帝錄其前後功勳封新寧

縣男思益自謙損待士卒有恩後入關迎桂陽公
義真沒於虜中

蕭承之字嗣伯蘭陵人少有大志才力過人仕宋爲
漢中太守以平梁州功加龍驤將軍後爲南太山
太守封五等男元嘉末卒梁土思之廟祀于峨公
山

蕭思話蘭陵人工隸書善騎射元嘉中爲青州刺史
坐繫氏帥楊難當寇漢中乃自徙中起思話爲梁
南秦二州刺史悉收復漢中侵地文帝令思話上

定漢中本末付在史館元兗劭弒立起義以應孝
武即位徵拜尚書僕射固辭改中書令加督都卒
贈征西將軍開府儀同三司謚穆侯思話外戚令
望早見任待歷十二州仗節者九愛才好士人多
歸之

吳欣之晉陵人宋元嘉末弟慰之隨王誕起義共誅
元兗劭元兗軍至衆皆駭散慰之獨留被執欣之
請代弟命辭淚哀切兄弟皆見原齊建武初有詔
蠲表之

華寶無錫人父豪晉義熙末戍長安寶時年八歲父
臨別謂寶曰須我還當爲汝上頭及長安陷父沒
寶年至七十不婚冠或問之輒號慟彌日不忍答
也齊建元初詔表之

今有祠在本縣慧山寺右

薛天生晉陵人其母罹艱棘嘗蔬食天生亦蔬食母
未免喪而逝天生終身不食魚肉建元初詔表其
門

劉懷亂

郡志作懷嗣

晉陵人年十歲與弟懷則遭父喪不
衣絮帛不食鹽豉建元初詔旌表焉

余齊民

本傳避唐諱作齊人

晉陵人少有孝行爲邑書吏父殖
在家病亡齊民謂人曰比者肉痛心煩有如割截
居常惶駭必有異故家人以父病報之便歸四百
餘里一日而至至門方詳父歿號踊慟絕良久乃
蘇問父所遺言母曰汝父臨終恨不見汝齊民曰
相見何難於是號哭殯所須臾便絕州縣上其事
詔表其里爲孝義蠲租布賜其母穀百斛

蔣恭義興人元嘉中有盜被收云與恭妻弟吳晞張
爲侶不獲乃收恭及兄協付獄科罪恭列晞張是

婦之親恭身甘罪求免兄協協列是戶主求免弟
恭郡縣不決依事上詳州議並原之後除恭義成
令協義招令

徐耕延陵人元嘉末大旱郡饑以米千斛助官振貸
議者以方漢卜式縣爲上言詔書褒美酬以縣令
吳國夫義興人以義遜稱有竊其稻者國夫引還爲
設酒食以米惠之其人慙服

許昭先宜興人親老家貧竭力甘旨叔父肇之坐事
繫獄七年不判申訴饋餉雖所生亦已倦怠而昭

先獨不懈息尚書沈演之嘉其行誼叔父由此得
釋昭先舅夫妻疫歿貧無以送昭先賣衣物以營
殯葬撫其三子皆得成長雍州刺史劉道真聞其
賢拔爲征虜參軍辭以親老不就
齊

蕭嶷字宣儼武進人齊高帝子都督荊州坦懷納善
側席思政初沈攸之開人告訐得罪甚衆嶷至鎮
一日遣三千餘人市稅素重悉從寬假百姓甚悅
及爲南蠻校尉開館立學入爲中書監司空東歸

約部曲不得齎府州物出城既發江津士女垂涕
高帝以武帝忤旨頗有代適之意而寢事武帝至
恭武帝愛之亦至常慮盛滿求解揚州戒諸子曰
凡富貴少不驕奢以約失之者鮮矣寢第庫無見
錢武帝勅月給錢百萬薨乃已

蕭畢字宣照高帝第五子四歲失母思慕不異成人
每慟吐血帝爲方伯時尚貧諸子學書無紙筆畢
以指畫空中及掌間弟鋒字宣頴帝第十三子四
歲時避難張氏家于塵几上學書後畢工篆隸好

文章射爲當時獨絕鋒亦工書能文嘗注脩栢賦
以見志

蕭鑑字宣徹高帝第十子八歲喪母號慕骨立後爲
益州刺史韓武方聚黨爲暴郡縣不能制鑑至諭
降之或勸殺之鑑曰失信何以勸善自是巴西蠻
夷皆望風降附鑑好學善屬文不重華飾有高士
風與蔡仲熊等商畧先言往行及蜀土人物言辭
和辨當時以爲盛事關州園得古塚珍寶甚多亟
命掩之一無所犯

蕭鈞字宣禮高帝第十一子年五歲所生區貴人病
便慘悴不食貴人卒居喪廵羸骨立服闋常問訊
武帝不能升車而止左右以聞帝即幸其邸還命
褚蔡撫悅之先是貴人嘗剪綵賜鈞至是遇朔望
輒開視載拜哽咽悲動左右鈞性好學善屬文嘗
手自細書五經置巾箱中或問曰家多墳典奚以
此爲鈞曰此便繙閱且一更手寫可永不忘居身
清率言未嘗及時事嘗游會稽孔稚珪園稚珪曰
殿下處朱門游紫闥詎得與山人交邪答曰情在

江湖爾吳郡張融清抗絕俗雅重鈞謂其有飄
凌雲之氣與之游不知老之將至云

蕭鏗字宣嚴高帝第十六子三歲喪母及有識知母
早亡輒悲哀蔬食祈一見夢至六歲夢一婦人云
是其母鏗以容貌衣服泣語左右儼如平生聞者
莫不歎歔後鎮姑熟有發塚多得金寶者鬱林以
賜鏗鏗曰今取往物後取今物如此循環可不熟
念命脩復之明帝剪宗室鏗遇害時年十八識者
以爲國器莫不痛惜焉

蕭道度高帝長兄同受學于雷次宗次宗曰其兄外
朗其弟內潤皆良璞也

蕭遙欣字重暉始安王遙光弟也髻鬣巖然明帝謂
其必成令器七歲出齋見左右有彈落飛鳥爲戲
者遙欣曰凡戲多端奈何事此且鳥自飛翔于人
何預殺此可憫聞者輒罷此戲遙欣博覽經史弱
冠預朝政論薦人才甚衆卒贈司空謚曰康子幾
字德玄早孤兄弟敦睦聞於朝野性溫和與物無
競好學善文章沈約奇之官終新安太守

蕭紜字景業宗室安陸王□嘗守吳郡大著風績竟
陵子良稱之曰數十年來未有此政武帝嘉之累
遷雍州刺史加都督紜留心辭訟親自隱卹劫抄
度口赦許自新再犯加誅百姓畏愛及卒悲哀之
立祠峴山贈司空謚曰昭

蕭景先高帝從子少孤有至性帝鎮淮陰委以腹心
沈攸之舉兵時景先隨武帝鎮江州益城景先乘
城忽聞空中連呼蕭丹陽云賊當尋平已而果傳
攸之首永明中帝以景先尹丹陽符空中語後假

節司州諸軍事卒謚曰忠

蕭赤斧高帝从祖弟以和謹爲帝所知以爲雍州刺史勤于奉公不營產利累遷給事中太子詹事及卒無以爲歛武帝聞而惋惜焉謚曰懿子頴胄字雲長宏厚有父風而好文弟頴達乃好武高帝曰兄文弟武宗室便不乏才出爲新安太守吏人懷之魏揚言飲馬長江人心震恐頴胄殊不聞魏軍尋退及梁武平江郢圍建康頴胄自以不能制禦發疾卒

蕭叡明字景濟蘭陵人母病風積年叡明晝夜祈禱祁寒不輟淚下成冰叩頭出血血亦冰忽有人以小石函授之曰以此療夫人病叡明跪受之其人忽不見啓函有絹三寸丹書日月字母服之即愈永明中詔贈中書郎

吳達之義興人嫂止傭直營冢椁從弟欽伯夫婦被畧達之售田以贖之還共財產郡辟主簿固遜與兄又以先世田畝讓於族弟弟亦不受田遂閒廢建元初詔表門閭

陳玄子義興人四世同居百有七口建武中詔表門
蠲調役

周山圖字季寔義興人家世寒賤年十五六氣力絕
衆食兼數人鄉里獵聚常爲主帥不事產業恒願
爲將而不間弓馬於書題甚拙然謹直少言未嘗
說人短長與人周旋至白首不異宋元嘉末山圖
應募破魏軍除員外郎累遷淮南太守盜發桓温
塚大獲寶物客以遺山圖山圖不受簿以還官高
帝輔政山圖密啟沈攸之有異圖宜備帝笑而納
之及攸之攻郢城山圖度其必敗後果敗帝稱其
明建元改元封晉興縣男尋卒

周盤龍義興人膽氣過人尤便弓馬仕齊建元初魏
攻壽春盤龍假節助桓崇祖大破之後魏侵淮陽
圍甬城齊遣盤龍救之盤龍子奉叔以二百人深
入魏以萬餘騎張左右翼圍之盤龍馳馬奮稍直
突魏陳所向披靡奉叔已出復入求盤龍父子兩
騎縈繞魏衆無敢當者魏師敗績累功封沌陽侯
蕭惠基思話子以宋外戚除車騎主簿泰始初兄惠

開在蜀拒命明帝遣惠基慰勞降之益州土酋引
氏賊圍州城惠基宣示朝廷咸賞氏人斬賊帥來
降還爲太子舍人桂陽王休範妃惠基姊也休範
叛高帝以惠基爲軍副惠基弟惠朗親爲休範攻
戰惠基在城內了不自疑袁粲劉秉起兵之夕高
帝以秉是惠基姊夫遣王敬則伺之惠基安靜無
預帝益加恩信永明中爲侍中尚書令王儉朝宗
貴望惠基同在禮閣非公事不私覲立身退素朝
廷稱爲善士卒贈金紫光祿大夫

蕭懿字元達武帝長兄也永明末爲南秦二州刺史
加都督魏軍圍南鄭懿擊之解圍取魏六戍魏人
震恐聞崔景慧奉江夏王圍臺城方食投箸率銳
入援斬景慧授中書令征討水陸諸軍事東昏肆
虐茹法珍等執政宿臣舊將多見誅夷懿勲高獨
居朝左爲法珍等所憚說東昏除之徐曜甫具舟
江渚勸令西奔懿曰古皆有死豈有叛走中書令
耶與弟融俱賜死

蕭敷字仲達武帝次兄也少有學業爲隋郡內史招

懷遠近士庶安之前後為郡者皆莫及明帝歎曰
蕭階郡飲酒清言而路不拾遺行何風化以致此
徵為廬陵王詔議參軍

毘陵人品目二

梁

蕭統

蕭績

蕭確

蕭大器

蕭方等

蕭嗣

蕭景

蕭勵

蕭業

蕭秀

蕭偉

蕭恢

蕭憺

蕭洽

蕭眎素

蕭琛

孫密

蕭介

蕭立

蕭文琰

李安人

陳慶之

陳昕

魚天愍

何之元

陳

周文育

周寶安

蕭允

蕭引

蕭濟

蕭摩訶

子世廉

張厓

隋

陳杲仁

蕭該

蕭春

唐

錢九隴

蕭德言

衛遯

蔣儼

劉子翼

蕭嵩

高智周

徐仁紀

薛登

許景先

王遇

蔣渙

蔣乂

子係 孫曙 偕 僊 佶

蔣防

秦景通

蕭穎士

劉禕之

李紳

李戡

施肩吾

魏璞

南唐

陳喬

毘陵人品記卷二

梁

蕭統字德施蘭陵人梁武帝長子昭明太子也生而
聰睿三歲受孝經論語五歲徧讀五經侍母丁貴
嬪疾衣不解帶及卒至殯水漿不入口哭輒慟絕
終喪日止一□不嘗菜果自加元服帝使省萬樂
百司誤謬辨析改正多所全宥天下稱仁寬和容
衆喜怒不形引納才賢賞愛不倦有書三萬卷文
學之盛晉宋以來未有可比歲饑菲衣減膳每霖

雨積雪察民病困振賜之百姓賦役煩苦輒斂容
變色每朝未五鼓入候內殿燕居坐起恒向西南
面未登大寶而卒朝野聞之無不惋愕

蕭績字世謹武帝第四子南康簡王也七歲爲南徐
州刺史主者受貨洗改解書績覺而詰之其人首
服爲南充州以善政稱尋徵還百姓詣闕頌績尤
異乞留許之遭董淑媛憂居哀過禮固求解職大
通三年卒績寡玩好少嗜欲居無僕妾躬事儉約
租秩悉歸天府後少府有南康國無名錢數千萬

子乂理字季英生十旬而孤三歲能言見簡王宮
人喪畢散去乂理哀感左右停者三人每讀書見
忠臣烈士未嘗不撫卷興歎謂當無愧古人及侯
景陷臺城入齊乞師見害

蕭確字正仲□陵王綸子武帝孫也少驍勇習騎射
兵法人以爲狂確曰聽吾爲國家破賊鍾山之役
確所向披靡臨陣對敵意氣詳贍帶甲據鞍朝夕
馳驟諸將服其勇壯及侯景乞盟憚確在外求召
入城確知城必陷不赴父綸迫之確曰景不解長

圍我入無益綸欲斬確確涕泣而入景果背盟後
景獵引弓射景弦斷見殺

蕭大器字仁宗簡文長子性寬和端巖遭侯景之亂
在賊中未嘗屈意嘗曰賊若見害雖一日百拜無
益于死何能以無益之愁橫憂必死之命故雖在
憂迫而神貌怡然或勸之北去答曰自國家喪敗
志不圖生主上蒙塵寧忍叛父避賊便涕泗嗚咽
侯景恐爲後患使刑人掩之神色不變徐曰久知
此事嗟其晚矣承聖初追謚曰哀

蕭方等字實相元帝長子也有俊才善騎射以母徐
妃失寵不自安嘗著論以申志侯景反元帝召之
因啓曰申生不愛其死方等豈顧其生帝省書歎
息乃配步騎一萬使援臺城方等身當矢石城陷
歸荊州收拾士馬甚得衆和又勸帝修城柵以備
不虞帝謂徐妃曰若更有一子如此吾復何憂徐
妃不答帝怒方等益自危因求征湘州瀕行謂所
親曰死而獲所吾豈愛生遂死焉帝追思其功謚
曰武烈所撰三十國春秋及篤靜子行于世

蕭嗣字長胤，範子。容貌豐偉，腰帶十圍，性驍果，有膽畧，侗儻不護細行，而能輕身養士，得其死力。侯景濟江，範遣嗣入援，連營渡淮，據東城。京都陷，以嗣爲晉熙刺史。範憂憤薨，嗣猶據晉熙城中，食盡，士乏，絕賊勢，方盛，咸勸且止。嗣按劍叱曰：「今日之戰，此蕭嗣効命立節之日也。」遂力戰，流矢中頸，不許拔帶，箭手殺數人，賊退。方命拔之，應時氣絕。

蕭景字子昭，武帝從父弟也。八歲居父喪，以毀聞。稍長，好學，才辨能斷。仕齊，爲永寧令，政爲百城最。武

帝起兵，以景行南兗州事。時天下未定，江北僭楚各據塢壁，景示以威信，渠帥相率面縛請罪。旬日，境內皆平。封吳平侯，行南兗州刺史。明解吏職，吏不敢欺。年荒，計口賑恤，又爲饘粥于路，以食之。死者給棺具，人甚賴焉。天監中，爲左驍騎將軍，歷雍、揚、郢三州刺史。所至有能名，卒贈開府儀同三司，謚曰忠。

蕭勵字文約，景子。位太子洗馬。母憂去職，毀不勝喪。繼遭父憂，水漿不進，廬于墓後。襲父封，除淮南太

守以善政稱遷宣城內史猛獸患息又遷豫章道
不拾遺男女別路徙廣州刺史去郡之日吏民悲
泣廣饒外國商舶舊爲刺史所侵勵秋毫無犯卒
贈侍中謚曰光

蕭業字靜曠弟藻字靜藝象字世翼皆長沙王懿子
也宣武之難俱匿王嚴秀家東昏收嚴秀拷死而
業兄弟獲免於禍天監初封業長沙王藻西昌縣
侯象嗣桂陽王業爲南充州刺史運私邸木僦人
作甍爲城武帝善之徙湘州尤著善政藻爲益州

鄧元起在蜀自以宿將有功聚斂山積藻擊斬之
以外府賜將士內藏歸王府一無私焉州人作亂
命騎追擊蜀人大安遷侍中歷雍兗二州刺史人
咸稱之推善下人常如弗及自遭家禍恒布衣蒲
席不食鮮禽象爲丹陽尹舉無失德朝廷稱之湘
州丹陽舊有虎患業象在官皆相枕而死咸謂守
尹德感神明侯景之亂或勸藻奔江北藻曰吾固
國之台鉉不能剪除逆賊正當同死朝廷不食而
卒

蕭秀字彥遠年十二母止與弟愴居喪以孝聞秀美風儀性方靜雖左右近侍非衣冠弗見天監初封安城郡王京口自崔慧景亂後人戶流散秀招懷撫輯惠愛大行歲祲以私財贍民歷江荆郢雍四州刺史所在立學校招隱逸照姦慝約己省費祭埋暴骨冬月作襦袴以賜凍者卒于雍州初郢人相送出境聞其疾咸爲請命及卒四州人裂裳爲白帽哀哭送迎之秀於武帝爲布衣昆弟及爲君臣小心畏敬過于疏賤帝益以此賢之

蕭偉字文達清警好學天監初封建安王遭生母陳氏喪毀頓過禮大通中爲中書令大司馬偉性端慤親賢愍窮四方知名者多歸之平原王曼穎卒家貧無以殯友人江革往哭之其妻子對革號訴革曰建安王當知之言訖偉賜至矣

蕭恢字宏達七歲通孝經論語天監初封鄱陽郡王除郢州刺史時疾疫之後死亡甚衆恢下車命埋其無主者有以筒中布進恢恢曰此竒貨異物立命焚之累遷都督益州刺史恢爲人輕財好施凡

歷四州所得奉祿隨即散之有男女百人封侯者
三十九人第三子脩字世和少丁母艱自荊州反
葬中江遇風脩伏柩長號血淚俱下卒獲歸葬復
廬於墓武帝嘉之以爲衛尉卿後爲梁秦二州刺
史漢中有蝗躬至蝗所深自咎責飛鳥羣至食蝗
殆盡墮書勞問在漢中七年移風易俗人號慈父
蕭愴字僧達都督荊州天監初封始興郡王時軍旅
之後公私匱乏愴勵精爲政闢屯田減力役存問
兵喪之家人甚安之大旱禱雨輒注自以少居重

任開導物情訟者決于俄頃無留事滯獄江溢隄
壞躬率將吏築之雨甚水漲或請避之愴曰王尊
尚欲身塞河隄我獨何心自逸刑白馬祭江身爲
百姓請命水退隄立被水數百家登屋緣木愴募
人救之一口萬錢人賴以免及卒荊州人皆巷哭
子暎字文明年十二爲國子生武帝曰吾家千里
駒也除淮南太守以諸兄未有除命抗表讓焉普
通中丁父憂隆冬臥地因患癥結詔以父愴艱難
王業追贈爵邑辭不獲乃乞頒邑諸弟帝爲改封

新榆縣侯歷吳興太守徐州刺史皆有惠政人吏懷之

蕭洽字宏稱思話子也七歲能誦楚辭及長博好學博涉善屬文位南徐州從事清身率職餽遺一無所受妻子飢寒累遷臨海太守爲政清平不尚威猛民俗便之拜司徒左長史有文集二十卷

蕭眎素思話从子性靜退少嗜欲好學能清言榮利不關於中喜怒不形於色任情通率不自矜尚武帝賜錢八萬一朝散之親友自中書侍郎求爲諸

暨令到縣十餘日挂衣冠於縣門而去獨居屏事非親戚不得至其籬門卒謚貞文先生

蕭琛字彥瑜洽从弟少明悟有才辨嘗著虎皮靴策桃枝杖直造王儉坐儉與語大悅遂辟爲主簿永明中載使通好於魏明帝用法嚴峻杖尚書郎琛密啓止之累遷吳興太守郡有項羽祠置神座廟名爲憤王甚有靈驗遂于郡廳事安施神座前後二千石多避舍琛至歷階聞室中喑啞聲叱之曰生不能與漢祖爭中原死據此何也遂撤去之後

頻典大郡有名聲不事產業有缺則取之不以為
嫌歷尚書侍中帝每呼為宗老卒謚曰平所撰漢
書文府齊梁拾遺諸書數十萬言孫密博學有文
位散騎常侍

蕭介字茂鏡穎悟有器識博涉經史善屬文大同中
為武陵王長史以清白稱武帝曰始興郡頻無良
守其以蕭介為之及介至甚著威德徵為少府卿
後侍中缺帝又擬介為之多所匡正遷都官尚書
每軍國大事必先訪焉及欲納侯景上表極諫帝

不能用介性高簡少交游惟與族兄琛眎素洽从
弟泚輩交酒賞會時人以比謝氏烏衣之游介染
翰成章文無加點

蕭立南蘭陵人年十七射策甲科自廷尉評載遷侍
御史文學政事為臺閣領袖獨孤及序其文比之
賈馬

蕭文琰南蘭陵人竟陵王子良嘗夜集學士刻燭題
詩一寸四韻文琰曰如此何難乃與吳興邱令楷
濟陽江洪餘姚虞羲共打銅鉢響絕詩成皆可觀

覽

李安人南蘭陵人少有大志常拊髀嘆曰大丈夫處世富貴不可希取三將五校何難之有高帝即位爲中領軍封康樂侯累官丹陽尹後爲吳興太守於家載米往人服其清卒於官

陳慶之字子雲義興人從平建鄴散財聚士嘗假節總知軍事與魏兵相持十四旬凡四十七戰平三十餘城大通間魏遣侯景下楚州又擊走之豫州饑發廩以賑多所全活州民表請樹碑頌德卒謚

曰武慶之祇慎儉素不衣紈綺不好絲竹射不穿札馬非所便而愛撫軍士得其死力子昕

陳昕字君章能騎射十二歲隨父入洛還都朱异訪以北事昕聚土畫地指揮分別异甚異之慶之在縣孤魏驍將軍騎校戰昕躍馬直趣其寨魏將潰去侯景圍歷陽時昕守臨川因啓采石急須重鎮王質水軍輕弱恐虜必濟勅昕代質未至景已渡江爲景所執嚴守之昕因說守者使降守者許之與盟射城中遣昕夜縋以入武帝大喜簡文遲疑

事泄景邀昕得之逼昕更射書不從見害

魚天愍義與人隸陳慶之麾下初慶之納元顥于魏也攻滎陽未拔而元天穆以大兵至梁士卒皆恐慶之曰我衆才七十虜三十餘萬今日惟有必死乃可得生當及其未盡至亟取其城據之耳乃鼓之天愍踰堞先登將士蟻附而入遂執都督楊昱天穆引兵圍城慶之力戰破之進拔虎牢

何之元字世伯廬江人父法勝以行業聞卜居晉陵之元幼好學有才思居喪過禮梁司空袁昂表薦

之除信義令其宗人敬容位望隆重頻相顧訪之元終不一造或問之對曰德薄任隆必近覆敗吾恐不獲其利而招其禍識者稱之著梁典三十卷隱居晉陵人雅重之名其居曰何墅

陳

周文育字景德本新安人姓項少孤貧陽羨周蒼養爲子教以書計育曰誰能學此取富貴但有大槩耳遂教之騎射既壯隸陳慶之麾下與白水蠻戰蒼歿于陣育馳取其尸身被九創慶之偉其節厚

加贈遺而遣之後從陳武帝戰白城抽槊陷陣殺傷數百人以功封壽昌縣公終開府儀同三司後爲熊曇朗所害贈侍中司空謚忠愍

周寶安字安民文育子十餘歲便習騎射以貴公子驕蹇好狗馬聚惡少高祖患之及父西征繫于王絀遂折節讀書與士君子游綏御士卒甚有威惠父爲熊曇朗所害徵領舊兵从平絀朗天嘉中重拜吳興太守襲封壽昌縣公以平留異功除給事黃門侍郎終衛尉卿謚曰成

蕭允字叔佐介第三子通達有識鑒始仕梁爲太子洗馬侯景陷臺城百僚奔散允獨整衣冠坐于宮坊景軍敬焉弗之逼也尋居京口百姓懼賊波駭允獨不行曰死生定分豈可逃而免乎閉門靜處卒免于難陳宣帝即位允爲光祿卿性敦重未嘗以榮利干懷後隋師濟江允遷關右時南士至長安者例授官允與尚書僕射謝朏辭疾不就文帝義之竝厚賜帛卒年八十四

蕭引字叔休介子也方正有氣度聰敏博學善屬文

侯景之亂朝士多歸梁元帝于荊州引曰諸王力
爭禍患方起正逃難之日非擇君之秋吾家再世
爲始興郡遺愛在民南行以存家門爾時始興歐
陽頴爲衡州引往依焉頴子紇反都人惶駭引曰
君子正身以明道直己以行義亦何憂乎及番禺
平引始北還宣帝拜爲金部侍郎引善隸書帝稱
其筆勢翩_々欲飛帝每忿怒見引輒解引性抗直
爲權貴所裁久不遷擢及呂梁覆師戎儲空匱轉
引庫部郎在職一年器械充足後主即位爲中庶

子官者李善慶蔡脫兒等多所請託引皆不許或
諫以少爲身計引曰吾之立身自有本末安能爲
李蔡致屈就令不平不過免職耳竟以此奪官卒
于家

蕭濟字孝康蘭陵人好學博通經史爲梁太子舍人
預平侯景功封松陽縣侯陳文帝守會稽以濟爲
長史及即位授侍中厯守蘭陵陽羨等郡所在皆
著聲績太初中入爲五兵尚書加金紫光祿大夫
未拜而卒

蕭摩訶字元胤蘭陵人果毅有勇力年十三遇侯景
亂單騎出戰真有敢當者既而趨侯安都齊兵入
寇安都被圍摩訶獨騎大呼直衝齊軍安都以免
天建中從吳明徹伐齊齊師退走進爵康平侯又
以平始興王叔陵功封綏建郡公後主爲隋兵所
執摩訶請曰一見舊主死無所恨賀若弼哀而許
之入見俯伏號泣仍于舊厨乞食進之辭訣而出
守衛者莫能仰視終爲隋人所害子世廉警俊果
敢性至孝摩訶凶終追慕彌切終身不執刀斧時

人嘉焉

張厓晉陵人傳三禮于同郡劉文紹與吳郡陸翊吳
興沈德盛會稽賀德基俱以禮學自命廣沈文阿
儀注撰五禮後爲國子博士

隋

陳杲仁字世威晉陵人繼母病思牛炙適屠禁割股
以進母病良已郡上其事詔賜旌表年十八舉進
士仕陳爲監察御史遷江西巡察大使隋大業中
奉詔平長白山及江寧以功授銀青光祿大夫義

宣中與沈法興等翦東陽賊二十餘萬拜大司徒
賜宮妹廐馬粟帛時稱其忠孝文武信義謀辦爲
八絕煬帝被弑沈法興入毗陵陽爲起義陰實欲
據之懼杲仁不附已遂遇害後屢見神郡人即其
兵仗庫立廟祀之

蕭該蘭陵人梁都陽王恢之孫初封收侯荊州平與
何妥同至長安開皇初賜爵山陰縣公拜國子博
士詔與妥正定經史該性篤學通詩書春秋禮記
尤精漢書及文選音義並爲世珍及卒門人起墳

樹碣焉

蕭春蘭陵人有雋才任青楊巷有何妥者任白楊頭
時人爲之語曰世有兩雋白楊何妥青楊蕭春

唐

錢九隴字勇業武進人父文彊爲吳明徹將九隴善
騎射事唐高祖功授金紫光祿大夫从破薛仁果
劉武周从平洛陽佐皇太子討劉黑闥封郟國公
貞觀初爲眉州刺史改巢國卒贈左武衛將軍潭
州都督謚曰勇陪葬獻陵

蕭德言字文行引子明左氏春秋甫冠爲岳陽王賓客陳亡徙關中詭浮屠服止歸江南仁壽中授校書郎貞觀時歷著作郎弘文館學士與魏徵虞世南等奉詔哀次經史百氏帝王所以興衰者上之帝愛其書曰使我稽古臨事不惑者公等力也德言晚節學愈苦每開經輒被濯束帶危坐妻子諫曰老人何終日自苦德言曰對先聖言何復憚勞詔授晉王經乞休不許下詔敦勉封武陽縣侯進秘書少監久乃得謝高宗立拜銀青光祿大夫全

給其祿遣使致問壽九十九贈太常卿謚曰博衛遯陽羨人少習書劍遊并汾間唐初建義旗遯以藝勇進禽竇建德拜將軍宿衛母老辭歸以孝敬睦閨門以然諾重鄉里及卒廟祀于荆溪

蔣儼義興人擢明經第爲右屯衛兵曹參軍唐太宗將伐高麗募爲使者人皆憚行儼奮曰天子雄武四夷畏服蕞爾小國敢圖王人即不幸固吾死所也請行至則囚于莫離支脅以兵不屈納諸窟室高麗平得歸帝竒其節授朝散大夫爲幽州司馬

治最高宗朝累遷殿中少監數陳時政進蒲州刺史號良二千石致仕復召爲太子右衛副率中宗在東宮多失德儼數諫諍又貽書責洗馬田游巖等媿不能奮後封宜興縣子卒贈禮部尚書

劉子翼字小心晉陵人隋著作郎峭直有行常面折僚友短退無餘訾日子翼罵人人都不憾貞觀初召用以母老辭詔許終養江南巡察使李襲譽嘉其孝友表所居爲孝慈里母喪服闋拜吳王府功曹參軍終弘文館直學士

蕭嵩貌偉秀美鬚髯神龍初始調洺州參軍事桓彥範爲刺史待以異禮歷宋州刺史遷尚書左丞以吐蕃回紇兵變節度河西判涼州事完樹碑塢懷保邊人用間出奇多有成蹟尋擢宰相在公慎密人莫見其際初與裴光庭不協光庭卒帝委嵩擇相嵩推韓休及休同位峭正不相假至校曲直帝前嵩怒乞骸骨帝曰朕未厭卿何庸去乎嵩曰幸陛下未厭得以乞身有如厭臣首領且不保又安得自遂帝爲改容乃授尚書與休同罷

高智周晉陵人高宗時以進士爲費令取俸與丞尉均民安其化刻石頌美三遷蘭臺大夫得告還里嘆曰進不知退取禍之道也俄拜壽州刺史治尚文雅行部先見諸生質經義及政得失乃錄獄訟攷耕餉勤惰以爲常儀鳳初進中書門下平章事請致仕許之卒謚曰定

徐仁紀晉陵人聖歷中授左拾遺數論事不合曰三諫不聽可以去矣遂移疾歸神龍初宣慰司表其行可勵俗召拜右補闕復抗言出爲靈昌令

薛登義興人通貫文史議論與徐堅劉子玄齊名天授中累遷左補闕時選舉濫上疏曰古之取士必攷素行敦朴爲先彫文爲後願降明制文試効官武閱守禦又兼保任之灋則請謂可絕貪競自銷又四夷質子多在京師每爲邊患登復疏請禁絕武后不納久之出爲常州刺史遷御史大夫僧慧範怙太平公主勢奪民邸官不能直登將治之或勸以自安答曰持憲直枉朝奏暮黜可也遂劾奏反爲主所搆出爲岐州刺史遷太子賓客坐子累

歸田家苦貧詔給致仕祿卒贈晉州刺史

許景先義興人由進士釋褐夏陽尉神龍初獻服慈閣賦擢左拾遺論事切直外補尋以茂才異等進左補闕宋璟蘇頲擇侍御史難其人以授景先彈按不避強近與韓休張九齡等更知制誥張說稱其文得中和之氣開元間上自擇刺史景先由吏部侍郎出爲虢州賜詩優賚後徙岐州終吏部侍郎

王遇晉陵人與弟邀同行道中爲賊所執將釋其一兄弟爭死賊感其義俱縱之

蔣乂字德源義興人祖環開元中弘文館學士父將明天寶末辟河中使府安祿山反佐其帥全并潞等州兩京陷被拘陽狂以免累官集賢學士乂性銳敏博覽強記該綜羣籍將明在集賢值兵興圖籍殺舛白宰相請引乂整比得善書二萬卷貞元中擢右拾遺累遷司勳員外皆兼史任亦登集賢義章公至冒哀成禮乂上疏以爲不可帝雖不從實嘉乂有守帝嘗登凌煙閣視左壁額剝文字漫

缺顧左右無省識者又曰此聖歷中侍臣圖贊也
帝前口以誦補不失一字詔問神策軍建置本末
中書討求不獲又條據精詳順宗既薨議祧廟有
司謂中宗中興不當祧祧則五王不得配享又曰
中宗賴五王反正不得爲中興且禘祫功臣合食
太廟則五王固不廢享廟議遂定遷兵部郎中刪
正制勅爲開元格後勅李錡既誅詔削屬籍又言
錡祖神通有功配享父若幽死社稷不宜連坐故
止削錡及子後修德宗實錄遷右諫議大夫累封

義興縣公卒贈禮部尚書謚曰懿又居館職二十
年每大政宰相所不能決必咨訪之又據經義憲
章參酌時事允切該詳初以是被遇終亦以是忤
貴近嘗疏裴延齡罪惡及拒王叔文當世高之結
髮志學老而不厭雖甚寒暑卷不釋手有書萬五
千卷所論議百餘篇子五係伸偕僊佶係爲右補
闕宋申錫被誣文宗怒甚係泣諫獲免開成未轉
諫議大夫李德裕惡之出爲桂管觀察使人安其
治復貶唐州刺史宣宗召爲給事中集賢學士累

遷檢校尚書右僕射封淮陽郡公仲舉進士歷翰林學士判戶部侍郎宣宗雅愛信之每見咨天下得失嘗言爵賞稍易人且偷人有覬心亂由是生帝嗟嘆仲三起帝三留未幾以本官同中書門下平章事懿宗即位以仲兼刑部尚書監修國史偕以父任歷右拾遺史館修撰補闕主客司郎中初柳芳所作唐歷大歷以後闕而不錄宣宗召偕等分年撰次累遷太常卿撰次文宗實錄蔣氏世禪儒三世踵脩國史世稱良筆咸云蔣氏日歷天下

多藏焉僊佶皆爲刺史係子曙亦進士歷官起居郎黃巢之亂闔門無遺類遂絕意仕進

蔣渙義興人與兄洌俱擢進士渙歷鴻臚卿日本使遺之金帛不受唯取牋一幅爲書以遺其副具道人臣無私交之禮父卒兄弟並廬墓手植松柏千株渙終禮部尚書封汝南公

蔣防義興人漢出亭侯澄之子後年十八父命作秋河賦援筆立就李仲奇之命賦鞞上鷹詩尾聯云幾欲高飛上天去誰人爲解綠絲條仲識其意薦

之後歷翰林學士中書舍人

秦景通晉陵人與弟暉皆精漢書號大小秦是時治漢書者非其指授謂無師承兄弟相繼爲宗賢館學士

蕭穎士字茂挺恢七世孫開元末舉進士第一先進皆器其材名播天下天寶間召爲集賢校理宰相李林甫欲見之不詣林甫怒調廣陵參軍事流播吳越間史官韋述薦其才召爲乘傳至京師以不屈林甫愈見疾俄免官林甫死調河南府參軍事

祿山寵恣穎士憂亂託疾遊太室山已祿山反屢獻守禦計時不能用客金陵之三隣召見拒之尋授揚州功曹參軍事至官信宿去後客汝南逆旅歿年五十二門人謚曰文元先生

劉禕之字希美晉陵人子翼子初直昭文館歷弘文館學士高宗密與參決時政分宰相權時號北門學士尋拜相王府司馬擢同中書門下三品一日私語鳳閣舍人賈大隱曰后能廢昏立明盍反正以安天下大隱表其言后怒賜歿于家年五十七

初禕之得罪睿宗以舊屬申理之姻友冀得釋禕
之曰太后威福由己而帝營救是速吾死也在獄
上疏自陳臨誅洗沐神色自若

李紳字公垂其先趙郡人父悟任晉陵令因家邑之
梅里紳爲人短小精悍於詩最有名元和初擢進
士李錡鎮江南辟爲從事錡寢不法紳數諫不聽
會朝廷遣使召錡錡不欲行脅使者代奏稱疾令
紳作疏紳陽怖不能爲字下筆輒塗去盡數紙錡
怒罵曰何敢爾不憚死邪對曰生未嘗見金革今

得死爲幸即注以刃令易紙復然乃囚紳錡誅或
欲以聞謝曰本激于義非市名也乃止穆宗召爲
右拾遺翰林學士與李德裕元稹同時號三俊敬
宗立李逢吉惡之遷滁壽二州刺史時霍山多虎
紳至虎盡去開成初爲河南尹河南多惡少或危
帽散衣擊大毬當官道車馬不敢前至是皆望風
遁去遷宣武節度使蝗不入境其感通如此致仕
卒諡文肅

李戡字定臣宜興人幼孤好學掇薪自爨夜無然膏

默念所記後赴選試日吏唱名乃入戲恥之遂返
江東陽羨里

施肩吾武進人擢進士第後隱洪州著閒居詩以見
志

魏璞字不琢毘陵人長于詩文氣真而志放杜門二
十餘年不交豪達飯蔬窮學澹如也雅與陸龜蒙
皮日休交懽每江南秋風時菰脆鱸肥璞乘短舫
載一甌酒偕皮陸輩浮煙水世人高之

南唐

陳喬字子喬從廬陵殺無錫爲觀察判官稍遷中書
舍人元宗既失淮甸欲釋機務將委國事于宋齊
邱喬排闥入諫曰大權一移臣見淖齒李兌復作
也元宗警悟乃止於是引喬入見后及諸子指喬
曰此忠臣也他日國家急難汝子毋可託之及元
宗南遷留喬輔太子監國後主即位遂命總軍國
事開寶中宋太祖遣使召後主入朝後主欲往喬
曰陛下與臣俱受先帝顧命委以社稷往而見留
悔將何及宋師南伐城陷後主命喬與世子仲寓

13256

4

四初年

7000

送降款喬遽歸府投款承雷間後主促之急喬入
見曰自古有不亡之國乎降無益也臣謂宜城下
一戰而歿後主執喬手泣曰盍與我北歸喬曰臣
當大政而致國家如此非死無以報臣死而歸以
逆命之罪則陛下保無恙也掣手而去入視事堂
自縊而歿吏爲撤榻瘞之宋克南唐詔求喬屍以
禮改葬

毘陵人品記



毘陵人品目三

宋

張觀

杜鎬

許九

張必

張昱之

張次元

葛宮

葛家

葛書思

陳思道

孫達

時父

邵靈甫

沈樗

蔣堂

胡宿

胡宗安

胡宗愈子端修

杜杞兄植弟樞

蔣昂

袁默弟點

凌浩

丁寶臣

錢公輔

丁隲

蔣之勉

蔣之奇

蔣階

蔣燦

蔣興祖

蔣芾

虞大熙

單錫

弟錡子發孫時

張巨

陳敏

沈初

錢顓

許德之

王岡

余中

邵材

強翊

李堪

錢道人

許恕

劉谷

呂大策

錢即

龐安仁

張壘

沈積中

周孚先

周恭先

鄒浩

鄒柄

唐棣

霍端友

霍洞

李謨

毘陵人品記卷三

宋

張觀字仲賓毘陵人南唐舉進士歸宋拜監察御史

三司言劍外賦輕詔觀往按疏言遠民不宜輕動

撫之猶慮失所况增賦以擾之乎太宗然之復上

言方今遠人未服邊鄙不宜陰陽未序倉廩猶虛

淳朴未還奢風尚熾刑法未措禁令猶密封祀猶

闕誠願陛下體貌大臣使沃心造膝極意論思上

嘉納詔遷度支判官俄出為諸路茶鹽制置使以

言忤旨改知黃州遷揚州皆有善政召爲三司河東判官以越局言事出知道州移廣南西路轉運使坐奏黎桓丁濬事被劾卒觀博覽史漢論事切直有古人風

杜鎬字文周無錫人博學彊記太宗朝爲國子監丞崇文院檢討時將南郊彗星見宰相問之鎬曰當祭而日食猶廢况謫見如此乎上爲罷郊祀遷著作佐郎歷秘閣校理太宗觀書秘閣鎬對經義稱旨又論黃金貴賤及天寶黎園事敷奏詳明再遷

爲駕部員外郎判太常禮院編次館閣書籍會修太祖實錄命鎬檢討故事以備訪問景德初授龍圖閣待制加都官郎中从幸澶淵凱旋遇懿德皇后忌日或以軍中鼓吹爲疑馳問鎬鎬曰武王載木至伐紂前歌後舞可據也與修冊府元龜拜右諫議大夫龍圖閣直學士特命班次樞密直學士儒者榮之真宗每得古物異書以詢鎬皆能究其本末凡所檢閱必戒書吏云某事在某書某卷幾行覆按無一差謬士大夫有所論譔訪以古事雖

晚輩卑品應各無倦所居僻陋僅蔽風雨和易清
素士類推重官至禮部侍郎

許九無錫人力田爲業早喪父獨與母居歲饑九乞
食養母人厭其數數斥之九晝夜悲痛斷手取信
血不出人以其異復乞入市因取所斷手置杖頭
示信市人哀之咸餽食其後母子果全于難進士
孫浩聞于邑令令以九毀傷肢體爲不孝逐之浩
與俱去留養于家母卒九漆其斷手口誦浮屠言
與母俱歿

張必毘陵人隨李煜入朝太宗授之中館家多食客
一日太宗問曰卿何食客之多必曰臣之親舊多
客都下貧乏絕糧臣累輕而俸有餘常過人飯亦
不過菜羹已爾一日上遣人伺其食時突入取客
食以去果糲飯菜羹上始信其不欺時謂之菜羹
張弟鑄字希賢祥符中進士四典名郡五任憲司
皆有殊績子昱之

張昱之字景山亦舉進士歷知溫州蔡齊薦其材擢
提點淮南路刑獄揚崇勳知亳州恃恩不法誣陷

蒙城令昱之庶出之徙廣南東路轉運使夷人有
犯其酋長竊恠治酷昱之請悉用漢法徙河北轉
運使備邊諸州發卒斬西山木卒逃入契丹者歲
數百計昱之戒斬木毋得深入卒不復逃還爲鹽
鐵副使擢天章閣待制轉河北都轉運按察使內
侍楊懷敏任邊事殺保州通判石待舉謀爲亂昱
之自魏馳至部分諸將召懷敏曰不即來當治以
軍法懷敏既至不解兵昱之曰將欲反耶叱去兵
衛懷敏不敢動還除戶部副使奪職知虢州後與

从父鑄並以光祿卿致仕縉紳榮之昱之喜吏事
所至有聲退居築家廟率子弟奉祀焉

張次元昱之子以父任累轉太常中書提舉淮南市
易事以稱職聞知信陽軍興學作士學者感孚除
江淮荆浙福建廣南提點坑冶鑄錢司事躬自巡
檢務革積弊卒于道山陽徐仲車聞之嘆曰張公
所性高明義而能果公不可撓清不可汙攷其所
尚蓋古之剛者也鄒忠公雅重其人既沒序次其
行事傳之

葛宮字公雅江陰人舉進士授中正軍掌書記善屬
文上泰平雅頌十篇真宗稱善召試學士院出知
南克縣東川饑部使者檄守資昌兩州以惠政聞
知南劍州諭降土豪聚黨阻山澤者山多銅銀吏
挾姦罔利歲課不登宮變法裕國歲羨餘六百萬
三司使以聞論賞宮曰天地所產吾顧盜之又何
以爲功乎累官工部侍郎卒年八十一宮性敦厚
恤宗黨撫孤嫠衆以長者見推

葛密字子發宮之弟性恬靜舉進士爲光州推官有
異政仕至太常博士年五十上章乞休姻黨交止
之笑曰俟罪疾老歿不得已而休官者安有餘裕
哉即退居青陽湖上號州堂逸老年八十四而卒
生平爲詩慕李商隱有西崑高致湖上集

葛書思字進叔密之子亦進士調建德主簿欲迎父
之官父難之書思曰曾子不肯一日去親側豈以
五斗米移素志哉遂投劾歸養十餘年近臣表其
志行起爲泗州教授弗就居父喪哀毀骨立盛夏
不釋苴蔴終禫不忍去塚舍久之出爲封邱主簿

長陽人言卷三
仕終朝奉郎父子清節後先相映崇宣間特詔賜
謚清孝

陳思道江陰人鬻醢爲生買物不酬價人服其德母
病衣不解帶者數月飲食隨母多寡母喪水漿不
入口七日既葬結廬墓側日夜悲慟晝則白兔馴
狎夜則虎豹環廬而臥咸平初詔賜束帛旌其門
孫達晉陵人母周氏嘗割股起父疾戒達勿从王金
陵學母卒哀毀踰禮崇宣間郡守李孝節請表其
閭裔孫鎬年老病疽其子裂肝以療尋愈淳祐間

郡守李迪表其所居里爲申孝以昭世德云

時父宜興人尚書時彥之父逸其名故稱時父初爲
鄭州牙校年六十餘無子入蜀部綱妻勸其市妾
獲一女甚端嚴叩其由來默不對且起見其以布
括髮怪問之女泣曰妾本京都人父雅州掾道卒
母鬻妾爲扶柩資父惻然亟以女還其母而不索
其金更出所餘助之歸葬還告其妻妻曰公陰德
厚矣何患無子一夕夢偉丈夫衣金紫坐中堂尋
有娠生子彥字邦美舉進士仕至吏部尚書

邵靈甫宜與人侗儻好施予家儲穀數千斛咸平中
大饑或請乘時糶之曰是急利也或請損直糶之
曰是近名也或曰將自豐乎答曰有成畫矣乃盡
發所儲僱傭除道自縣至湖汊鎮四十里浚蠡河
橫塘等水道八十餘里通菴畫溪入震澤邑人爭
受役皆賴全活而水陸又得俱利子梁登進士第
孫劉魁南省蓋積善之報云

沈樗字斯年無錫人淳厚樂善饒貲好施假貸多折
券歲歉傾廩賑卹嘗以金萬緡佐軍興朝廷欲官
之不願賜號達義處士

蔣堂字希魯宜興人舉進士知臨川縣發摘豪僭明
道初召爲監察御史禁中災有司欲罪宮人堂言
火起無迹恐重天譴遂得詔原論郭后不當廢坐
黜嘗發運江淮歲薦士二百人或疑其濫曰十得
二三亦足以報國矣尋以事謫官越州奏復鑑湖
侵于豪右者擢天章閣待制江淮發運使先是發
運使以上計爲名賄遺權貴堂曰吾豈爲此歲入
可附驛奏也前後五年未嘗一至京師後以樞密

直學士知益州克拓學舍選賢以教諸生儒風大振以禮部侍郎致仕卒堂清脩純飾遇事毅然不屈貧而樂施好學工文詞延譽晚進至老不倦尤嗜詩學有吳門集二十卷

胡宿字武平晉陵人登第爲揚子尉縣大水民被溺宿率公私船救之全活甚衆進集賢校理通判宣州有囚憚箠楚自誣伏宿疑之辟左右問之良久繙閱初詞蓋婦人與所私殺其夫而誣之以自釋也知湖州前守滕宗諒大興學校費錢數十萬宗

諒去僚吏疑其欺不肯書歷宿誚之曰滕侯有過盍不早正俟其去而非之豈咎人分誦之意乎僚吏大慙謝又築石塘百里捍水患民號曰胡公塘入知制誥內都知楊懷敏坐衛士之變被斥未幾復召宿封還詞頭命遂寢京東兩河地震宿通陰陽五行災異之學疏言應在西北二邊明年王則果以貝州叛時議謂士大夫七十當致仕不知止者令有司案舉宿謂非優老之義武吏第察其任事與否勿斷以年文吏當使自陳全其節及言新

樂舊樂難與並用間歲貢士不若三年皆如其言
唐介取嶺南帝遣中使監護宿言事不可測介如
道歿陛下有殺直臣名帝悟追還中使涇卒之變
詔劾治三司使三司使包拯護弗遣宿曰計吏支
折不以時安得無罪更拒制命紀綱廢矣拯懼立
遣吏拜樞密副使曾公亮任趙滋興兵治界河事
宿言于英宗曰今者南北通好內外無患近邊遽
來上不過侵誣尺寸此城砦之吏力能辨詰何至
興兵甲哉縉紳多恥燕京外屬顧天時人事未至

而妄意難成禍且隨之願守兩朝法度以惠元元
天下幸甚宿爲人清謹忠實內劄外和守道自信
不以進退爲意臨事重慎不輒發發亦不可回羣
居不譁笑居母喪三年不入私室雖貴達常如布
衣時每語後進曰富貴貧賤莫不有命惟當修身
俟時毋爲造物所嗤世以爲名言治平中數乞謝
事詔以太子少師致仕卒贈太子太傅謚文恭

胡宗炎字彥聖宿之子由將作監主簿登第累陞吏
部郎中哲宗崩遼使來弔祭宗炎以鴻臚少卿送

皇陽人語 卷三
雙桂軒
境上使者不易服宗安以禮折之須其聽命乃相見既還升爲卿初父宿使遼遼人重之後知鴻臚即其子也輒嘆胡氏世不乏人俄以直龍圖閣知潁昌府歷密州卒

胡宗愈字元夫宿之从子舉進士甲科英宗嘗問宿子弟誰可繼卿者以宗愈對召試學士院神宗立擢同知諫院王安石以李定爲御史宗愈疏言御史當用論薦不宜任執政意及蘇頌李大臨不草定制坐絀宗愈復封還詞頭安石怒出判真州元

祐初進御史中丞時更定役法書成宗愈言法貴均一若持兩端則於文有害請刪之哲宗嘗問朋黨之弊對曰君子指小人爲奸則小人指君子爲黨君子蓋義之與比者因具君子無黨論以進拜尚書右丞言者攻之出知陳州徙成都蜀人安其政召拜禮部尚書遷吏部卒子端脩亦以直言入黨籍

杜杞字偉長以父鎬蔭補將作監簿累遷至度支判官虞部員外郎廣西歐希範率衆破環州轉攻桂

管勢甚熾仁宗授杞安撫使杞至破白崖等寨及其五洞斬首千餘級復攻環州焚其山林積聚希範走保荔枝洞并擒戮之廣西平除天章閣待制知慶州番酋孟香率部落內附夏人以兵索香詔許還之杞言彼違約舉兵香不可與因移檄問罪夏人驚服杞博覽強記通陰陽術自推其數曰吾年四十六歿矣卒如其言兄植弟樞皆有時名

蔣昂字希遠義興人仕宋康定初調蒲州司法參軍為政不忍杖罰號曰仁主時百姓相約曰有犯仁

主法者眾共斥之訖二載不杖一人復轉涼州經畧使卒

袁默字思正無錫人父繹為鄉碩儒默少卓犖中進士擢京兆府教授入為司農簿獻無逸傳神宗召對遷光祿丞太學博士哲宗即位除湖北轉運判官默學問淵深人倫宗之謝顯道解論語嘗共辨確弟點字思與熙宣初在太學直講為學者領袖與默共號二袁舉進士累遷通判杭州知淮陽軍詩甚工東坡見其所作有驚心駭目之歎

凌浩字直翁無錫人與同邑陳敏受業于胡安定之門以經術知名治平初登甲科令蓬萊武陟召拜太學博士推安定之學以教多士翕然尊師之出守渠陽年六十五浩與敏皆未及引年而告老人稱其高

丁寶臣字元珍晉陵人與兄宗臣同登景祐初進士俱有文聲尤工於詩時號二丁寶臣以太子中允知剡始至流大姓一人衆皆悅服除弊興利甚衆移知諸暨其治如剡越人咸以爲循吏云後歷秘

閣校理同知太常禮院久處館職英宗深知其賢每論人材必稱之後爲言者所指出倅永州卒

錢公輔字君倚武進人少從胡翼之學有名舉進士知明州時衙前法病民爲均其役同修起居注知制誥英宗即位陳治平十議王疇爲翰林學士未久擢副樞密公輔論疇望淺不草制上謂沮格詔令坐謫呂誨等救之不得踰年起知廣德軍振作士類重拓學宮神宗立復知制誥入見上勞苦之使錄十議以進命知諫院嘗白事中書富弼謂曰

上求治如飢渴正賴君輩同心以濟公輔曰朝廷所爲是天下誰敢不同所爲非雖欲同之不可得也王安石雅與之善既執政排異己者出滕甫知鄆州又主薛向更鹽法議公輔于帝前數言甫不當去向當黜拂安石意罷諫職出知江寧府徙揚州以病乞越州改提舉崇福觀卒

丁騭字公點晉陵人舉嘉祐初進士以經學倡後進尤長於易春秋爲文自成一家有文集二十卷李定用事辟騭爲屬以疾辭蘇軾曾肇孔文仲輩交

薦騭司馬光當國騭謂之獨後光曰真自重之士也除太常博士改左右正言元祐間士風險競相爲朋比有五鬼十物之號騭上疏請窮治之後出知處州

蔣之勉字敬叔宜興人博通圖典爲西浙大儒屢薦不仕號荆南先生

蔣之奇字穎叔宜興人堂从子嘉祐二年進士英宗初選殿中侍御史陳謹始五事進忠賢退奸邪納諫諍遠近習聞女謁凡數百言時論偉之歷江淮

荆浙發運副使元豐六年漕粟京師至六百二十萬石鑿泗州股河以避長淮之險無覆舟之患哲宗朝知廣州以平寇功除寶文閣待制知熙州謹斥堠修守備羌不敢犯紹聖中鄒浩以言事獲罪之奇折簡贈別坐責守汝州徽宗立復爲翰林學士拜同知樞密院崇寧初除觀文殿學士知杭州善經學工詩文有文集雜著百餘卷卒封魏公

蔣璿字夢錫之奇子登元祐初進士擢大司樂與梁師成議樂舞不合師成怒璿曰一代典禮當質諸

經何用怒爲不顧而去時燕雲初復廷臣議上尊號璿言裕陵郤尊號爲萬世法奈何諛悅以虧盛德出知興元府王靖作亂擒戮之撫平其黨後引疾奉祀鴻慶宮

蔣璨字宣卿蚤喪父鞠于世父魏公之奇卓越不凡魏公器重之以之奇蔭奏補將仕郎歷知平江臨安二府後以侍郎守臨川告老遷太中大夫提舉玉龍觀卒璨善爲詩孫覲稱其奇麗清婉咀嚼有味其擬東坡作詩律句法厠蘇詩中殆不可辨有

景坡堂詩卷

蔣興祖之奇孫以蔭調饒州司錄睦州盜起劄郡皆震興祖糾吏卒繕戰具盜不敢犯遷知武陽治爲畿邑最武陽古浪沙也土脈脆惡大河薄其南每積雨必隄潰興祖董治之露宿隄上彌四旬隄完不壞靖康初金兵犯京師過其邑或勸使逃避興祖曰吾世受國恩當死于是監兵與賊通斬以徇金數百騎來攻不勝去明日復益兵來衆寡不敵興祖與其妻子俱死詔贈朝散大夫

蔣芾字子禮之奇曾孫紹興末進士授建康推官秦檜欲羅致爲己用芾堅拒之故終檜之身不得召用孝宗朝累遷起居郎兼直學士院宦者梁珂撓權尹穡論之罷穡芾抗顏繳奏語徹德壽宮上皇歎其忠除簽書樞密院事累遷右僕射中書門下平章事屢疏條奏邊防軍政甚悉母喪去位詔起復之芾力辭帝銳意恢復手詔使決和議恢復二策芾以天時人事未可舉兵凡二千餘言拂上意尋落職提舉洞霄宮卒

單錫字君錫宜興人嘉祐二年進士明陰陽圖緯星
歷之學蘇軾賢之以女兒之子妻焉弟鐸字季隱
亦嘉祐間進士詳究吳中水利蘇軾守杭問之因
出水利書并圖以獻軾上于朝不果行遂隱居不
仕鐸子發舉八行科修陽羨風土誌錫孫時字行
可宣和末進士累官監察御史上封事言飲酒擊
毬二事孝宗嘉納尋除右諫議大夫上目疾久不
眎朝復疏諫上曰卿言可爲愛朕矣及卒上爲悵
悼

虞大熙宜興人皇祐元年進士神宗朝陳襄在經筵
以治行薦及臺閣選所薦三十二人大熙與胡宗
愈皆預焉累遷至侍讀

張巨字微之武進人嘉祐初舉明經少從胡安定學
與蔣之奇胡宗愈丁隲爲四友又學易于歐陽修
以薦克國子監直講王安石新經行巨與同官數
人引去時論高之有易解十卷文集四十卷

陳敏字伯修無錫人少孤廬於墓所受業安定之門
安定一見奇之曰此錫山之英也熙寧初舉進士

徽宗朝諸蔡用事斥司馬光諸賢爲姦黨令州郡
皆立石時敏守天台曰誣司馬公是誣天也碎石
挂冠而歸大觀中詔求八行有以敏薦守令勸駕
歎曰咎歸今往出處何戾耶弗就蘇軾遺書與之
曰風氣凋喪植立于頽波狂瀾中惟吾伯修與景
純而已景純謂刁學士也年八十一終于家

沈初字子深無錫人熙寧中進士文辭典麗元祐尚
辭賦朝廷嘗以初及林希佚等五賦頌天下爲格
流傳至西夏夏人織爲文綺官終國子監直講

錢顓字安道無錫人舉進士爲寧海軍節度推官守
用威嚴僚屬奔走聽命顓當官而行無所回撓由
是獨見器重熙寧間召爲御史裏行王安石行新
法宰臣曾公亮依違不言顓疏安石說堯舜以致
公輔首財利以爲容悅公亮畏避固寵貶監衢州
鹽稅將出臺責同列孫昌齡曰君奴事安石得御
史自以爲得計不少念報國犬彘不若即拂衣上
馬去聞者悚然後徙秀州家貧母老貸于親舊以
給朝晡怡然自適蘇軾遺之以詩有烏府先生鐵

作肝之句世因呼爲鐵肝御史

許德之字振叔無錫人父希道爲鄉宿儒授四子各一經德之晁穎悟舉進士爲揚州法曹與晁詠之韓韶蘇象先同爲掾號維揚四雋侍臣薦其才徽宗召對言治道無多術惟在進賢退不肖有賢不能用以非賢而遽信皆無益於治擢司封郎中終顯謨閣學士知婺州

王岡字壽祺無錫人嗜學耽書登進士第通判揚州丞相呂頤浩統戎辟置幕下高宗南渡頤浩爲御

營使以岡爲參議官多用其籌策紹興間歷左司郎頤浩去國岡以朝散大夫直秘閣致仕

余中字行老宜興人幼穎悟熙寧五年與兄貫試禮部中選而貫被黜請自黜以薦兄士論高之明年復魁大廷紹聖初使虜還奏河朔城隍隳圯乞葺治以戒不虞宣靖間金人來寇城多不堅長驅而南始思其言終雪川守

邵材字聖規宜興人熙寧間試開封第一與父潛同舉進士嘗爲監察御史郡上疑獄刑部議當貸歿

用事者謂不當貸仍欲坐言貸者材抗言疑獄當
貸而奏者反獲罪恐獄吏由此便文自營不復以
疑獄聞矣時司馬光極論新法之害王安石語材
劾光材曰君實正人可厚誣乎即日自劾而歸後
終鴻臚卿

強翊字君翔晉陵人元豐五年除河南密尉調金壇
簿時章惇少與翊善後惇漸入傾險翊心惡之惇
居潤時翊任屬邑惇問慰殷至而翊未嘗通一書
及惇以宰相起知交讓翊失策怡然自若徐曰諸

公以此爲獵華膺地耶尋引年致仕

李堪字仲任常州人舉進士景德間令古田務本抑
末建學立社尊高年行鄉飲毀淫祠黜異教暇復
集諸生耆民討論政理治化翕然

錢道人逸其名顛之弟也隱慧山與東坡遊道人有
詩云直須認取主人翁東坡爲作兩絕戲之曰首
斷故應無斷者冰消那復有冰知主人苦二令儂
認認主人、竟是誰有主還須更有賓不如無鏡
自無塵只從半夜安心後失却當年覺痛人已又

贈以詩云毘陵高山錫爲骨陸子遺味泉水齒賢
哉仲氏早拂衣占斷此山長洗耳

許恕字如心江陰人家北郭號北郭先生能詩得古
體論事多激昂部使者薦授澄江試書院山長不
樂即棄去與山僧野子相往還人莫識也恕少有
志才能自樹會天下多故去之海上慕韓伯休爲
人旁通其術所著有北郭集

劉谷字季朴江陰人有隱操熙寧間嘗召爲修撰尋
復去辭蔣靜自宜興來學谷一見許妻以女及卒

蔣挽以詩云行藝已書丞相筆姓名還結裕陵知
又云他日如尋隱君子女山深處一孤墳

呂大策字彥發江陰人善詩尤精於書被詔不就人
號曰呂詔君

錢即字中道宜興人舉進士授安州司理申理冤抑
轉睦州推官有獄久不決部使諭往按治且咬以
薦牘即日豈以數十人命易一薦牘乎平反之全
活甚衆歷廊延環慶經畧安撫所至有聲績童貫
宣撫陝西頓減市價賤入民粟關內騷然即屢抗

章極陳其害坐貶永州團練副使睦寇作亂起知
宣州悉意軍事以功進龍圖閣學士貫引爲參謀
即以老固辭致仕卒謚忠定

龐安仁字宅道晉陵人通五經尤長于易張正素鄒
道鄉諸賢皆執經受業

張學字子厚武進人登進士甲科以無他兄弟不忍
離親調官不赴閉戶讀書四十年手校數萬卷元
豐元祐間大臣交薦詔拜秘書郎勅郡縣敦遣竟
不就學孝弟脩於家忠信行于友蹈中守常爲名

流所重以不造門爲恥卒賜謚正素先生

沈積中晉陵人舉進士累官戶部尚書宣和中知真
定府上疏論燕山不可取師果敗績童貫惡之奪
其職建炎中追復資正殿學士

周孚先字伯忱晉陵人偕弟恭先往河南从程伊川
學與楊龜山相友善伊川每謂孚先兄弟氣質純
明可與入道在門凡十七年同門擬之子夏恭先
服膺拳之惟以顏子爲法聞父疾兄弟徒步馳歸
五日抵家父已卒哀甚牛馬亦爲之淚下不食隣

嫗至以感傷而歿既葬因廬於墓免喪聞伊川訃復馳至洛歸而爲城東書院以祀二程生徒自遠至者衆不能容又于城西創書院孚先主教於東恭先主教於西楊龜山先生至郡遂以城西書院館焉謂諸生曰先生實去予兄弟百倍此真爾師也孚先由鄉薦入太學特恩調四明鹽場改建德尉皆不就命白衣上殿賜承事郎改奉議可祠後爲臨安教授所著有伊川語錄論語解紹興間郡守黃公灝奉先生兄弟附饗城東書院

周恭先字伯溫氣質淳厚篤學信好學諸同游咸心讓之由鄉薦入太學釋褐授坑冶幹官每以沽名爲戒終身恬於進取謂子孫曰吾沒後毋爲誌文碑銘以重吾不德

鄒浩字志完晉陵人登進士第調揚州穎昌府教授呂公著范純仁爲守皆禮遇之元祐中上疏論人才不振切中時弊哲宗親擢右正言有請以王安石石三經義發題試舉人者浩論其不可而止章惇用事威虐震赫浩上章露劾數其不忠慢上六事

惇衛之明年賢妃劉氏立浩遂上言郭后與尚美人爭寵仁祖既廢后并斥美人所以示公也陛下之廢孟氏與郭后無異罪廢之初天下疑立賢妃詔書有別選賢族之語疑始釋今竟立之豈不上累聖德頃妃從享景靈雷變甚異宣制之後霖雨飛雹陰淫不止天意昭然望不以一時改命爲難而以萬世公議爲可畏帝持其章躊躇四顧凝然若有所思乃付外章惇詆其狂妄遂削官羈管新州徽宗立亟召還朝帝首及諫立后事獎嘆再三

詢諫草安在對曰焚之矣退以告陳瓘瓘曰徇其始此乎異時姦人妄出一紙則不可復辨也初劉后爲賢妃生子緣是得立然生子纔三月薨浩凡三諫隨削其稿蔡京用事素忌浩乃使其黨爲僞疏言劉后殺卓氏而奪其子徽宗詔暴其事遂竄昭州五年始得歸疾危楊龜山往省之猶憫以國事爲問高宗即位贈寶文學士謚曰忠浩爲人忠鯁修潔記覽該綜士之及門問道者甚衆自嶺表歸即屏居小圃號曰道鄉學者稱爲道鄉先生

所著有易繫辭論語孟子解

鄒柄字道久浩之子莊重篤學幼負俊聲弱冠棄科舉从龜山楊時游靖康初自布衣薦除編修建安間疏請雪其父遷謫非辜且不出秦陵雅意奏可柄素剛鯁與人不苟合克世家學終天台守

唐棣字彥思宜興人从伊川學語以入德之門無如大學其他莫如語孟棣自是有所悟入又嘗問聖人之言可踐否伊川曰苟不可踐何足以垂教萬世他日又問克己復禮如何是仁皆得其說纂次

伊川語錄百四十餘條又復推演師說官終秘書丞

霍端友字仁仲武進人弱冠入太學通六經崇寧初進士第一歷官大司成上言朝廷重內輕外可令內外侍從更出迭入俾天下之勢常如持衡度首尾無軒輕之患且自請補郡出知陳州爲政不立聲威陳地汙下疏新河達淮無積潦詔取瑞香花于陳端友曰不可自我作俑疏罷之召還爲吏部侍郎蔡京令人致意欲以中執法相處端友不奮

遂致仕卒贈少師

霍洞字大清端友从孫喜爲詩居城東之梅坡自號
筠寮嘗宿田舍見催科吏詩云北風吹晴屋滿霜
翁兒赤體悲無裳閨中幼婦飢欲泣忍飢取蔴燈
下緝一身勿暇私自憐鳴機軋二明牖前織成五
丈如霜布翁作襴裙兒作褲明朝官中催租急依
然赤體當風立又歲饑見守者出游詩云朝來五
馬去尋春誰信家二甌有塵枕席道傍宜細問恐
非芳艸醉眠人守聞爲之罷游

李謨字茂嘉無錫人幼孤家貧力學孝養其母登進
士第徽宗知其才擢太常丞累遷寶文閣移鎮京
口卒謨歷事三朝皆蒙眷獎屬當時艱智畧精敏
隨事應變稱爲奇才

毘陵人品目四

宋

李綱

張守

胡交脩

李端彥

李端行

施垆

唐作求

沈松年

沈有開

費肅孫衮

胡唐老

胡世將

胡瑄

蔣循祖

李熙靖

吳懋

葛勝仲

兄次仲
子立方

葛郊

袁植

吳範

蔣靜

吳師古

陳之茂

陳之淵

尤衮子棊
孫煊

喻樗

陳篆

蔣汝通

元簿

陳得一

呂克成

周葵

戴達先

邵及之

耿秉

李祥

蔡戡

丁逢

錢之望

邱密

邱定夫

張訢

薛極

蔣重珍

向士璧

錢相

趙發

胡鏜

李晦

包天麟

曹宓

姚訔

陳炤

胡應爰

徐道明

莫謙之

蔣捷

曹鉅

錢紳

董蕃

繆鑑

毘陵人品記卷四

宋

李綱字伯紀祖贍自邵武徙居無錫登政和二年進士以敢言著聲及金人攻汴徽宗傳位太子自稱道君除綱兵部侍郎金兵渡河徽宗東幸宰執議請欽宗暫避敵鋒綱力陳不可去之意上意頗悟會內侍奏中宮已行上色變綱泣拜以死邀之未幾復決意南狩綱趨朝乘輿已駕矣綱入見曰六軍父母妻子皆在都城願以死守萬一中道散歸

陛下孰與爲衛上感悟輟行綱傳旨語左右曰敢復有言去者斬禁衛皆拜伏呼萬歲綱治守戰之具不數日而畢敵兵攻城綱身督戰斬酋長十餘人衆數千人金人乃退求遣大臣至軍中議和綱請行不聽遣李稅金人須金幣以千萬計求割太原中山河間地以親王宰相爲質稅唯不能措一辭還報綱引前議力爭弗聽以皇弟康王少保張邦昌爲質時四方勤王之師漸有至者綱奏言金人兇悖已甚非用師不可吾若扼河津絕饗道

以重兵臨敵營堅壁勿戰俟其食盡力疲以一檄取誓書復三鎮縱其北歸半渡而擊之此必勝之計也上深以爲然姚平仲勇而寡謀先期率步騎夜斫敵營不克亡去金使來詰用兵之故宰相李邦彥悉委罪於綱欲縛綱以與金金使反以爲不可遂罷綱太學生陳東等詣闕上書明綱無罪軍民不期而集者數十萬哭聲動地帝急召綱綱入見泣拜請死帝亦泣命綱復克京地四壁守禦使下命能殺敵者賞衆無不奮躍金人懼稍引却

徽宗還綱迎拜龍德宮北兵已去上下恬然置邊事於不問綱獨以爲憂議調防秋之兵奏言邊患方棘調度不給宜稍抑冒濫以足國用時太原圍未解耿南仲忌綱以綱爲河東北宣撫使綱移疾乞致仕不許又乞展行期御批以爲遷延拒命趨召數四綱曰臣以愚直不容于朝此行無復還理進而死敵臣之願也陛下宜察臣孤忠以全君臣之義上爲感動陛辭言唐恪聶山之姦未幾相恪山綱嘆曰事無可爲矣即日乞罷乃召綱赴闕以

綱專主戰議喪師費財落職金兵再至上悟和議之非召領開封府事綱被命即率勤王之師入援未至而都城失守高宗即位拜尚書右僕射趨赴闕御史顏岐論綱爲金人所惡不宜相不報岐乃封示綱以沮其進綱曰國家艱危豈臣子避嫌疑自愛惜之時遂行進對內殿涕泗交集上爲動容綱疏陳十事一議國是二議巡幸三議赦命四議僭逆五議僞命六議戰七議守八議本政九議久任十議修德翌日班綱議于朝惟僭逆僞命二事

留中綱言二事乃今日政刑之大者大率言邦昌能以死守節敵人未必不悔禍而邦昌偃然正位號擅止四方勤王之師及知天下不與方請太后垂簾聽政而議奉迎僭逆如此不正其罪而反尊崇之此何理也又僞命臣僚一切置不問何以勵士大夫之節時黃潛善主邦昌甚力綱因泣拜曰臣不與邦昌同列當以笏擊之乃詔邦昌知潭州吳开莫儔而下皆遷謫有差綱又言近世士大夫寡廉鮮恥不知君臣之義靖康之禍能仗節死義

者惟李若水霍安國願加贈卹上從其請上謂綱曰卿昨爭張邦昌事內侍輩皆涕泣卿今可以受命矣綱拜謝有旨兼統御營使疏請置東北招撫司河東經制司使宣諭天子恩德不忍棄兩河于敵國之意絕其從敵之心資其禦敵之力使朝廷無北顧之憂因薦張所爲河北招撫使傅亮爲河東經制副使有詔欲幸東南避敵綱極論其不可不報而遷綱尚書左僕射除黃潛善右僕射與綱並未幾詔罷經制司召傅亮赴行在綱言必欲罷

亮乞付潛善施行臣得乞身歸田綱退而亮竟罷
乃再疏求去御史張浚論劾綱遂落職自綱罷張
所以罪去傅亮以母病辭歸招撫經制二司皆廢
車駕遂東幸兩河郡縣相繼淪陷凡綱所規畫軍
民之政一切廢罷金人攻京東西殘毀關輔而中
原盜賊蠭起矣紹興二年除知潭州五年召赴行
在車駕進發幸建康八年王倫使北還綱上疏曰
朝廷遣王倫使金奉迎梓宮今倫與金使偕來以
詔諭江南爲名不著國號而曰江南不曰通問而

曰詔諭此何理也雖與衆論不合上不以爲忤九
年除知潭州荆湖南路安撫大使綱具奏力辭曰
臣區區進退何足多少然數年之間亟奮亟躋上
累陛下知人之明實有係于國體詔以綱累奏不
欲重違遂允其請次年薨年五十八訃聞上爲嗟
悼贈少師綱負天下之望以一身用舍爲社稷生
民安危雖身或不用用有不久而其忠誠義氣凜
然動乎遠邇每宋使至燕山必問李綱趙鼎安否
其爲遠人所畏服如此自號梁溪漫叟有梁溪集

易傳內外篇等書

張守字子固晉陵人登進士第除監察御史建炎初上在維揚粘罕將窺行在宰臣汪伯彥黃潛善以爲不足畏葉夢得張浚皆欲南渡守獨抗疏上防淮渡江六事又疏請大臣惟以選將治兵爲急汪黃不悅遣守撫諭京城守聞命就道因上言金人必來寇願早爲之所不聽遂有臨安之幸遷御史中丞論朱勝非不能思患豫防致苗劉猖獗勝非竟罷呂頤浩初相舉行司馬光之議欲併合三省

詔侍從集議守言光議較然可行毋徒集衆紛紜衆莫敢異議者將奉上幸武昌爲趨陝之計守與康勝皆持不可又陳十害議遂寢六月久雨恒陰詔言闕失初守爲副上疏言陛下處宮室之安則思二帝母后穹廬毳幕之居享膳羞之奉則思二帝母后羶肉酪漿之味服細暖之衣則思二帝母后窮邊絕塞之寒苦操予奪之柄則思二帝母后語言動作受制于人享嬪御之適則思二帝母后誰爲之使令對臣下之朝則思二帝母后誰爲

之尊禮至是復申其說金人寇淮諸將獻俘行在
守䟽兩河山東皆陛下赤子驅迫以來諭以恩信
賊兵可不戰而潰守在福州上詔問攻戰守備綏
懷措置四事守言四者莫急於措置措置苟當則
餘不足爲陛下道矣措置之大畧有二其一措置
軍旅神武中軍當專衛行在而以餘軍分戍三路
一軍駐淮東一軍駐淮西一軍駐鄂岳或荆南擇
要害以處之使北至關輔西抵川陝血脈相通號
令相聞有唇齒輔車之勢則江南斯可奠枕而卧

也其二措置軍食諸軍旣分屯諸路則所患者財
穀轉輸也今宜舉兩浙之粟以餉淮東江西之粟
以餉淮西荆湖之粟以餉鄂岳荆南量所用之數
責漕臣將輸而歸其餘于行在錢帛亦然措置旣
定俟至防秋復遣大臣爲之統督使諸路首尾相
應綏懷之畧亦在是矣張浚罷劉光世兵柄而欲
用呂祉于淮西守言必得門望素服諸將心者乃
可浚不聽遂至酈瓊之變江西盜賊未息守知洪
州開諭羣盜使之自新數月悉平建康闕帥上曰

此重地也須大臣有德望者無如張守至鎮數月
卒諡文靖

胡交修字己懋晉陵人崇寧初進士首選詞學兼茂
科歷遷學士兼侍講首論天下大勢謂淮南無藩
籬之衛湖廣有腹心之憂江浙根本未立秦蜀指
臂不相救宜詔大臣脩政事選將帥蒐補卒乘以
張國勢撫綏疲瘵以固國本又應詔論弭盜保民
豐財裕國強兵禦戎之要語皆切至累遷刑部尚
書江東留獄追逮者尚六百餘人交修言待六百

人俱至則瘦死者衆矣請以罪狀明白者論如律
疑者从輕詔從之朝論欲以西蜀交子行於諸路
又議大舉交修皆力陳其害上問蜀帥于交修以
從子世將對後果爲名帥自重兵守蜀餉道險遠
水陸皆梗交修言三月以後九月以前留守關正
兵餘悉就糧他州則守關者水運可給分戍者陸
運可免詔行其議後以端明殿學士知合州請免
上供以萬計在州數月卒交修簡重寡言進止有
度爲文不事雕琢自其從祖宿從父宗愈至交修

及世將皆在禁林中興以後學士三入者自交修始

李端彥字相之武進人父鎮舉進士以詩名端彥博學多聞崇寧初登第臚傳丙科祐陵覽其對曰直諒可嘉特陞甲科仕至宗學博士

李端行字正達無錫人弟尚行字師尹俱有俊聲同登大觀初進士端行為太學博士高麗遣子入學用夷禮端行曰吾聞用夏變夷以國禮繩之嘗作詩詆蔡京出宰郵縣發憤乞閒終身不復仕尚行

宰蕭山治行顯著召爲太學博士累遷江南東道轉運使以言事去職賦性嚴憚學易深造日抄萬言閉戶讀書罕窺其面

施垆字林宗武進人登進士第宣和末除江西提刑朝命鑿銀林河通大江垆懼導江入浙則蘇秀必受漂溺之患亟疏寢其役徽宗下詔獎諭進秩一等持憲閩浙守信州有能聲終敷文閣待制生平篤意孝養得親書必冠帶跪讀遇恩奏補先及弟姪鄉邦稱焉

唐作求字叔孝無錫人舉進士公卿薦之徽宗召對稱旨累官朝散郎致仕學術該敏家訓嚴肅振勵後進唐氏自作求以儒名家从弟孚字益裕亦有識嘗遍謁元祐君子設論移日皆窺其奧

沈松年字性仁無錫人登進士靖康之際丐歸田里以圖史自娛女弟適洪忠宣皓皓使虜歲久松年教誨諸甥皆中博學宏詞科迺入相遵位樞密邁入翰苑名聞夷夏時謂非是舅不能有是甥云

沈有開字應先松年之子少從呂伯恭游學志其大

者不務華藻口耳陶然自樂登淳熙間進士爲太學博士下簾重扉不妄請謁留丞相異之揖與語聳聽移日丞相拔擢淳熙知名士有開陰贊之不以爲功遷秘書丞宣宗即位召入禁內問民疾苦遷起居舍人忌者排以爲學黨坐廢十年屹然不爲動起知徽州復改知太平強使應命輒乞休以直龍圖閣致仕家居落寞終日危坐時貴者求見皆辭以老疾而獨與朱晦翁通書問焉

費肅字懿恭無錫人少穎秀嗜學登進士第靖康末

高宗開大元帥府於鄆肅主餽運罷歸隱錫山建炎末以薦召赴行在時被召者三人獨肅抗節引辭不起天下高之孫衮博學能文中進士著梁溪漫志

胡唐老字俊明宿之曾孫父嘗夢披金甲者兩神人告曰吾唐世老將後生子長名唐老次名世將同登進士第靖康初擢殿中侍御史金人再犯京師攻圍日急唐老請對曰康王北使爲河朔士民所留殆天意也請就拜大元帥俾召天下兵入援從

之時朝廷趣西北兵入衛而不立帥唐老謂必無功不聽後范致虛果以孤軍敗渚澗間京城破金人搜括金銀民間多藏匿者金人怒杖唐老幾死後知衢州苗傅敗走亂兵圍城唐老拒之會大雨雹城上矢石俱發賊解去以功擢秘閣修撰歷知鎮江府兼浙西安撫使建康失守潰卒戚方等趣從遇害詔贈徽猷閣直學士謚忠愍

胡世將字承公初爲監察御史累遷兵部侍郎紹興

間帥蜀奏用轉搬摺運之法以充軍儲公私便之
從祖修簡嘗帥成都有治行父老曰不圖再見吾
父人方之張詠號小乖厓金人陷同州世將駐師
河池或勸以退保世將指所坐帳曰吾誓死于此
矣遣大將吳璘等出屯要害金人逡巡不敢度隴
得全師而還母喪起復遂復隴州破岐下等屯兵
威稍振以瘍發致仕卒謚忠獻

胡瑄字德輝晉陵人宣和初進士嘗受學於楊龜山
又介龜山謁劉元城于南都問答論辨皆得其精

蘊而元城許瑄能護至道理乃以其所聞退而筆
之爲護道錄先是陳東上書攻六賊言者以其書
乃瑄所潤色忌之又與李綱同舟東下敗梧州趙
鼎當國以熙豐元祐舊史蕪穢屬瑄與張嶠修正
鼎去位瑄出守嚴陵鼎復相又舉瑄與嶠筆削成
書時秦檜力主和議瑄與同館朱松等抗疏忤檜
引去疏詞侃侃皆瑄手筆瑄安貧樂道至老好學
不倦爲一時表正云

蔣循祖宜興人歷知建昌軍問民疾苦宣布詔條賞

善懲惡民大和會游操謂其治行慕黃霸及于土
木之役終始經營不愆于素方之精力當出霸右
李熙靖字子安晉陵人唐衛公德裕九世孫祖均父
公弼至熙靖皆舉進士而熙靖又舉詞學兼茂科
累官太學博士以父老乞便養除提舉淮東命下
乃得河東而淮東乃臧祐之也蓋省吏納賂易之
或使自言熙靖曰事君不擇地吾其發人之私求
自便耶宰相聞而賢之留爲兵部員外郎以父憂
去見忌於王黼蔡攸留滯貶秩者累年徽宗召對

言燕山雖定宜益思患豫防兩宮北狩虜立張邦
昌熙靖憂憤廢食家人進粥藥寬解之終無生意
故人視其病相持啜泣索筆書王維百官何日再
朝天之句而卒贈端明殿學士

吳懋字禹功宜興人第進士調當塗縣主簿歲饑官
出粟糴者全集人擾亂相蹂踐以歿懋命布灰于
地踈其行坐循灰以進左受粟右輸金未晡而周
人無譁者縣有圩田秋雨圩決懋晨夕督治民賴
以濟移宿松以簡靜爲治凡追逮者書期縣門聽

其自至田里間不識游徼嗇夫之面縣稱大治金
人立張邦昌百官作勸進表懋當草牋將自裁會
有爲之者乃免王時雍用事坐政事堂懋罵之曰
反虜吾不能擊汝如段秀實邪時雍面頸俱赤不
能對後吳升莫儔以表狀詣虜營懋不屈歸高宗
即位召復故官除司農卿不拜擢知明州治聲流
聞加直秘閣改知吉州尋卒

葛勝仲字魯卿書思之子登紹聖初進士調杭州司
理叅軍薦試學官及詞科皆第一歷遷太學正上

視學多獻頌勝仲獨獻賦遷禮部員外郎兼國子
司業雅樂成遷太常卿宋自建隆至治平所行典
禮歐陽修嘗哀爲書百篇號太常因革禮勝仲續
之增至三百篇及建春宮以勝仲爲諭德作仁孝
學三論獻之太子復采春秋戰國以來太子善惡
成敗之迹日進數事詔嘉之進國子祭酒尋知汝
州論括田擾民爲李彥所劾徙鄧州爲朱勔所惡
尋罷建炎中起復湖州時羣盜縱橫聲搖諸郡勝
仲修城堡作戰船閱士卒賊不敢近歲大饑發官

廩賑之民賴以濟紹興初再知湖州乞歸十餘年而卒謚文康兄次仲字亞卿亦嘗爲大司成子立方第進士以郎官攝西掖忤秦檜奪職更化召用言者又以附會沈該罷去遂不復起

葛邲字楚輔勝仲孫少警敏以國器稱蔭授上元丞金人犯江上元當敵衝調度百出邲不擾而辦後登進士第除國子博士論州縣受賂及鬻爵之弊孝宗獎諭之除著作郎歷正言首疏治亂生於所忽宜專以畏天愛民爲先又論征權歲增之害詔

令條陳邲對以六事切中時病歲旱詔求初政得失邲應詔言罷兵以來諸將皆以賂得遷其勢必至於培克取償邲爲宮僚八年孝宗眷遇甚渥光宗受禪除叅知政事邲勸上專法孝宗正風俗節財用振士氣執中道恤民力選將帥收人材擇監司明法令上嘉納之除知樞密院事紹熙中拜右丞相專守祖宗法度薦進人材博采公論宣宗即位邲又上疏言今日之事莫先于修身齊家結人心定規模判紹興府錢穀刑獄必親嘗曰十二時

中莫欺自己其實踐如此除少保致仕卒贈少師
諡文定配享光宗廟庭

袁植字材老無錫人崇寧間進士中詞學科擢監察
御史金人入寇陳安邊十三事以誅佞人爲先不
納引疾去建炎初召爲左司諫直言忤宰臣出守
岳陽會虜騎大入叛臣李允文擁衆怙亂植條奏
其奸允文怒執植正色詆賊不少懼遂遇害允文
誅追贈龍圖閣學士

吳範字執侯江陰人大觀政和間詔舉八行閭里以
範應不就子仲基仲達皆第進士

蔣靜字叔明宜興人第進士調安仁令俗好巫疫癘
流行病者宜歿不服藥靜悉論巫罪毀淫像投諸
江知陳留縣與屯將不協罷去徽宗初立求言靜
上言多詆元祐間事遷國子司業帝幸太學命講
書無逸篇賜服金紫進祭酒以顯謨閣待制知壽
州徙江寧府茅山道士劉混康以技進賜號先生
其徒倚爲姦利奪民葦場彊市廬舍府吏觀望不
敢治靜悉抵于法徙睦州移病提舉洞霄宮越九

年召爲大司成出知洪州復告歸加直學士卒年七十一

吳師古宜興人舉進士紹興中秦檜主和議胡銓抗疏得貶師古鋟其疏傳諸夷夏坐流袁州

陳之茂字卓卿無錫人與張九成俱廷對忤權相黜之九成叩頭殿階曰臣之學不如陳之茂之茂能言人所不敢言宜獎不宜黜高宗覽其對悚然曰忠言也賜同進士出身調休寧尉以經學爲諸儒倡張魏公嘗薦之于朝仕至吏部侍郎終直學士

院之茂剛果英特論議宏遠深識治體壽皇初銳意天下事默察方正特立之士期立事功每深器待將倚以大用而沒縉紳惜之

陳之淵字宗卿與兄之茂同入太學同登進士同爲吏部郎中終秘書修撰立朝涖官不治貲產澹泊自如未嘗以名位矜人人皆服其厚德

尤袤字延之無錫人擢進士第爲泰興令鳩工築城金陷揚州獨泰興得全太宗正闕丞人爭求之陳俊卿曰當予不求者遂除袤秘書丞缺僉以袤對

張栻曰真秘書也尋遷著作郎兼太子侍讀出典
台州築城高厚明年大水賴以不沒除淮東提舉
改江東推行朱子荒政民無流殍累遷樞密院正
兼左諭德高宗崩除太常少卿自南渡來典禮散
失上下罔措每有討論悉付衮斟酌損益定廟號
建議事堂命皇太子參決庶務衮以儲副之位止
于侍膳問安乞懇辭以彰殿下之德臺臣乞定喪
制衮奏佛老之教矯誣褻瀆非所以嚴宮禁宜一
切禁止孝宗嘗論人才衮奏曰近召趙汝愚中外

皆喜如王藺亦望收召上曰然次日語宰相曰尤
袤甚好兼中書舍人復詔兼直學士院力辭且薦
陸游自代上不許光宗即位屢以謹始爲言又舉
唐太宗不私秦府舊人爲戒紹熙元年起知太平
州除給事中韓侂胄以武功大夫和州防禦使袤
奏侂胄四年間已轉二十七年合轉之官今又欲
超授四階是朝廷官專爵徇侂胄之求非所以爲
摩厲之具也命遂格上以疾一月不省重華宮袤
上封事勿憚一日之勤以解都人之惑後數日駕

即過重華宮中外歡呼尋轉侍讀上封事曰近年以來給舍臺諫議事往往不行至姜特立召尤爲駭聞自古云小人甚難譬除蔓州猶且復生况加封植乎時上已屬疾國事多舛表積憂成疾請告不報疾篤乞致仕又不報遂卒年七十謚文簡表少從喻樗汪應辰游樗學於楊時時程頤高弟也方乾道淳熙間程氏學稍振忌之者目爲道學將攻之表在掖垣首言道學者堯舜所以帝禹湯文武所以王周公孔孟所以設教近立此名詆訾士

君子賢人君子欲自見于世一舉足即入其中豈盛世所宜有表歿數年侂冑擅國禁錮道學賢士大夫皆受其禍識者以爲知言子棐爲工部侍郎孫焞初爲將作監主簿後帥淮西以儒者守邊威惠並濟終翰林學士

喻樗字子才其先祥符人高宗南渡徙桐廬後至無錫居焉少慕伊洛之學從楊時游登建炎進士爲人質直好議論嘗謁趙忠簡諷之曰公之事上當使啓沃多而施行少誠意多而語言少趙奇之引

爲上客紹興初趙贊高宗親征樗曰六龍臨江兵
氣百倍然公度此舉果出萬全否趙曰中國累年
退避不振故贊上行若事之濟否未可知也樗曰
然則當思歸路張德遠

若使宣撫江淮荆
浙以兵赴闕則其來路即朝廷歸路也于是趙奏
起張知樞密院張曰此行舉動皆合人心曰子才
之功也薦授秘書省正字兼史館校勘樗言趙張
宜同在樞府他日趙退張繼之則氣脈長若同處
相位萬一不合賢者自相背戾後果如其言樗與

張九成皆言和議非便忤秦檜出知舒州已而致
仕檜歿復起爲大宗正丞孝宗即位用爲浙東提
舉常平以治績聞所著有易義四書性理窟行於
世院張下脫謂趙二字

陳篆字師文無錫人氣豪邁讀書過目不忘下筆成
文語意俱到傳爲楷式經學尤該明願執弟子禮
者遠近交至一出規矩皆爲良士紹興間舉進士
官止于州縣子翥亦舉進士

蔣汝通字亨伯江陰人早入太學晚乃授官不仕而

去以琴書圖史自娛好古博雅尤邃於性命之學
嘗著質旋以祛支干五行配合之說年八十餘精
勤不衰

元簿字泉卿宜興人幼業進士輒棄去喜爲詩自號
耘軒有歲晚書懷云他鄉故鄉老若此新歲舊歲
窮依然烹茶但有二升水沽酒初無三百錢其處
約安貧亦足尚也

陳得一字晞夫晉陵人崇宣間乘桴至日本得卷書
上丹題付通微三字乃天文日歷也遂精推步之

學高宗朝日食正朔御史張致遠薦得一至秘書
俾正歷差特命以官辭不受賜號通微處士始符
丹題云

呂克成字世德無錫人有俊才學問精確從游者常
數百人與同邑陳師文友善兩浙士子稱師者必
以克成師文爲重克成以恩科第一終蘄州教授
周葵字立義宜興人少力學登宣和末進士調徽州
推官高宗移蹕臨安諸軍交馳境上葵攝郡應變
千里帖然召爲監察御史在職兩月言事至三十

章且指宰相趙鼎不任職上爲改容張浚議北伐
葵謂此存亡之機不可不慎三上章言之或謂葵
沮大計罷知信州秦檜當國意葵前論事必憾趙
鼎於是復以葵爲殿中侍御史一日內降差除四
人葵奏曰願陛下以仁祖爲法大臣以杜行爲法
檜不樂又論事輒忤檜意落職屏居鄉里憂患頻
仍人不能堪葵獨安之檜死復起爲禮部侍郎奏
科舉取士宜精選通經博古之士置之前列其穿
鑿乖謬者黜之出知太平州州人紀其功德水壞

圩隄葵悉繕完旁郡皆水惟當塗歲熟市河久涸
葵城中家出一夫官給之食併力浚導公私便之
孝宗即位除兵部侍郎權戶部手詔數問錢穀出
入葵言陛下咨詢庶政出入意表今皆微文細故
此必有小人欲乘閒售其私者不可不察蓋指龍
太淵曾覲也孝宗爲之色動金主爲其下所斃張
浚曰此恢復之機葵謂不可輕舉累數百言始終
守自治之說及靈璧敗績上思其言拜參知政事
葵固請去上曰卿何請之力也對曰預政以來大

率十事之中不從者七八安得不媿于心此臣所以欲去也及虞允文陳康伯爲相葵決意去位除資政殿學士提舉洞霄宮起知泉州請老卒贈太傅諡惠簡

戴達先字子善無錫人父滂有文行紹興初達先與弟幾先同舉進士行藝並優文體粹然爲之一變太學諸生稱曰二戴執政有薦達先者高宗召對擢太學博士孝宗求直言達先條天下利害戰守事宜召試館職歷知池州江陰軍移袁州爲政長

者心仁貌莊平居恂恂臧否不置口幾先字子微亦以宰臣薦召教諸王稍遷國子司業對便殿論王安石蘇軾學術功利仁義之差上嘉之累遷直龍圖閣號錫谷居士

邵及之宜興人乾道中爲司封郎時和王楊沂中子乞襲封吏部長貳欲上其事及之曰國朝故事異姓王無襲封者雖趙韓王開國元勳及身而已斥去之尋上章請老除直徽猷閣致仕孝宗命輔臣舉漢公卿餞二疏故事由是朝士皆歌餞之爲一

時盛觀

耿秉字直之江陰人登紹興進士出知廣德軍值歲大祲發常平倉活饑民萬餘且自劾矯制之罪宣宗特加獎異歷兵部侍郎兼給事中劄方清儉兩爲浙漕所至以利民爲事以終煥章閣待制

李祥字元德無錫人學于尤遠初得龜山之傳登隆興初元進士爲錢塘主簿時姚憲尹臨安俾攝錄叅選者以上命監視鍛鍊嘗誣武臣子謗訕鞠于獄祥不許邏入門既而所告無實白尹尹驚弗從

祥曰即坐譴自甘尹具論如所讞上喜擢官大宗正丞軍器少監祥言內外賢才宜更出迭入請自臣始出提舉淮東常平茶鹽淮西運判兩淮錢濫惡祥疏更鑄新錢淮人以安邇國子祭酒丞相趙汝愚以韓侂胄啖言者去國祥力爭曰頃壽皇崩兩宮隔絕中外洵之國命如髮汝愚不畏滅族決策立陛下風塵不搖天下復安社稷臣也奈何使精忠巨節怫鬱黯闇何以示後世言者劾罷之太學諸生揚宏中等上書留之俱得罪言者喜曰道

學解散矣後請老以直龍圖閣致仕卒謚肅簡祥
以公心發公論汝愚之誣賴以明道學之名賴以
解嘗對孝宗言唐虞盛治在君臣和又進五規以
廣上意言恢復事本末有序終始一致既歸錫山
或叩以立朝事掉頭不答

蔡戡字定夫晉陵人登乾道甲科持節五羊所部十
四郡歲以礦銀爲病戡積鹽羨代輸民甚便之擢
湖南憲使時李昂霄有異謀戡乘其未定單車馳
喻之其黨相顧駭愕叩首服罪宣宗朝爲京尹歲

澇糴艱戡亟請發粟民賴以濟韓侂冑當國乃請
老有定齋集行于世

丁逢字端叔晉陵人乾道初進士爲激賞所幹官金
主遣使賀上生辰怙貴驕黠侮館伴衆憤莫能制
逢曰示弱何以爲國上書乞借上方劍斬虜使書
奏御筆付宰相曰此人才氣可尚卿先一見速具
奏來遂賜對遷天府倅上方留意邊事命逢知安
豐盱眙二軍皆有政績除川秦茶馬凡供帳公費
悉屏去人服其廉介而馬政修舉召還歷卿監終

寶謨閣待制

錢之望字表臣晉陵人少放達好奇計逆亮闖江以策干虞允文謂虜有內潰之勢允文用其策亮果殞符離之敗之望道謁張忠獻請三邊並出師使虜罷于奔命則大功可立忠獻不能用之望登乾道中進士授江西帥屬時賴文政招獠朝廷旰食參政龔茂良薦之望遂倂文政除部郎知楚州募力士五百人躬自訓閱虜不敢謀大奚山盜起除秘閣修撰知廣州一戰滅賊擢華文閣待制知

廬州卒

邱宓字宗卿江陰人隆興初進士虞允文奇其才舉以自代賜對言恢復之志不可忘恢復之事未易舉宜甄拔賢才責以內治遵養十年乃可議北向時方遣范成大祈請陵寢宓言無益大計徒以驕敵孝宗不悅出知秀州華亭捍海隄久廢鹹潮壞田蘇湖皆受其害宓奏勅築隄成而三州瀉酒皆爲良田除直秘閣知平江府奏楮幣折閱請公私出納並以錢會各半天下稱便被命接伴金使之

賀生辰者金歷九月晦與統天歷不合密要說金使合从慶歷節正日隨班上壽金使屈服孝宗悅以忤樞密王抃落職光宗即位擢煥章閣直學士四川安撫陞辭曰臣入蜀後吳玠脫至死亡兵權不可復付其子臣請便宜撫定諸軍以俟朝命玠歿密奏請他將命張詔代挺李仁廣副之遂革吳氏世將之患其後韓侂胄復以兵權付挺子曦曦果叛識者始服密之先見宣宗朝自慶元府入朝韓侂胄知密平日主復讐冀可與共功名示以北

伐議密曰中原淪陷我不可一日忘然兵凶戰危勝負未可知首事之禍其誰與任議遂寢改知建康府侂胄聞金置平章宣撫河南奏以密宣撫江淮以應之密言金人未必有意敗盟中國但當申警軍實釁自彼作則我有辭矣侂胄又議除密內職宣諭兩淮密曰使名雖異其示敵人嫌疑之迹則同不宜輕舉侂胄滋不悅乃除密寶文閣學士江淮宣撫使時宋師克泗州而潰于宿壽密欲全淮東兵力爲兩淮聲援奏泗州孤立淮北所屯精

兵幾二萬人萬一金人南出清河口及犯天長諸城則首尾中斷莫若棄之還軍盱眙從之金人自渦口犯淮南或勸密棄廬和爲守江計密曰棄淮則與敵共長江之險矣吾當與淮俱存亡益增兵爲防時金人有和意密以用兵出侂冑謀請移書與敵宜暫免係銜侂冑怒罷密及侂冑誅起知建康府淮南運使招輯邊民爲御前武定軍分爲六軍餘汰歸農月省錢米幾十萬以病丐歸卒謚忠定密儀狀魁傑神機英悟常慷慨語人曰生無以

報國死願爲猛將以滅敵其忠義之性然也

邱定夫字景游密四世孫與兄揚州教授景唐弟淞陽縣丞景南三人同居一門之內怡怡如也二子堅基皆爲儒官克世其家云

張訢毘陵人紹熙間知邵武光澤縣嘗倣社倉之法境內以宐諸市里之民貧無蓋藏及中下之家生子不舉者皆人爲之給又附倉列屋以待行旅凡疾病無所歸者悉就養焉其法甚精朱熹爲之記丁常任字卿秀寶臣从孫博學強記累官戶部侍郎

極論復讎大義言極憤切孝宗爲之動容官寶謨閣待制致仕爵晉陵縣男食邑三百戶壽八十三終于家

薛極字會之武進人日記萬言後舉進士嘉定間朝廷議更楮幣朔安邊司極與有力嘗上疏宣宗曰願陛下深思顧諟之難益懷兢業之念勿謂帝德罔愆而急于進脩勿以天灾代有而應以不實紀綱雖舉必益求其所未至德澤雖布必思及其所未周上嘉納之立朝三十餘年多所裨益終叅知

政事封和國公致仕卒

蔣重珍字良貴無錫人從尤文簡學嘉定末進士第一授建康府簽判與太守議荒政不合引疾乞祠即所居築一梅堂琴書自娛與魏鶴山真西山爲深交紹定初召對首以本心外物界限爲言且論苞苴無窮之費民有無窮之憂會行都火史彌遠當國乃極言主柄下移權臣勢重天下知有相而不知有君上讀之感動他日星變復申前說進爲君難六箴皆極剴切召爲秘書郎端平初入對上

五事乞召用真德秀魏了翁進崇政殿說書進講
戒勿白家事務以積誠寤主每草奏齋心盛服有
密啓則手書削稿遷著作郎邊帥議和戰不一重
珍奏乞專意備守不得已則用應兵不聽及關洛
師大衄復進兵議重珍言恥敗而欲勝之則成忿
怒生靈之命豈可以忿怒用哉又言邇來用臺諫
頗主不必矯激之說似畏其剛方太過豈欲其平
易省事乎又言更化以來舊弊未去者五徇私調
停覆護姑息依違而又益之以輕易遷起居郎三

辭不許自劾其不能取信朝廷之罪久之詔守刑
部侍郎致仕卒諡忠文學者稱爲一梅先生

向士璧字君玉武進人紹定間進士累官大理卿合
州告急捐家百萬以供軍寶帝嘉獎之開慶初涪
州危士璧往援時賈似道宣撫六路檄士璧以軍
事付呂文德士璧不從以計斷浮橋奏授元兵圍
潭州甚急士璧破之進兵部侍郎似道嫉其功諷
御史劾罷之又責償守城時所用金穀逮至刑部
士璧不能償而死復拘繫其妻子徵之德祐初詔

復其官立廟潭州

錢相字君玉晉陵人幼穎異以詞賦稱登嘉定間進士端平間以真德秀薦累遷監察御史有直聲自起居郎入經筵歷兵禮吏部尚書以親老丐祠年八十一而卒以德壽稱

趙發字達甫江陰人嘉定末進士端平初上欲除發諫省會當國者先遣所親諭意發謝絕之命遂寢終秘書省校書郎發和而肅介而通粹然君子之儒

胡鏜字伯遠江陰人嘉定末進士歷知寶慶府工部郎官學有根本一室蕭然凝塵滿几處之晏如嘗有詩云貧居三不往薄宦兩無求三不往者州郡時貴富室也兩無求者薦剋財貨也由冊府典名藩同館以詩送之曰院靜書千卷庭清水一盂蓋實錄云

李晦字顯翁無錫人育於外祖尤梅澗家從其猶子棟學凡有觀覽即通其旨咸淳中領鄉薦肆意經史下至稗官小說無不涉獵有事文類聚校正白

虎通風俗通等集自號慧泉散吏子元昭慈湖書院山長元明亦隸儒選

包天麟字仁甫江陰人咸淳間舉博學宏詞科嘗注易詩書春秋年八十三而卒手未嘗釋卷元旌表其門贈江浙儒學提舉子植樅俱登第

曹密江陰人第進士仕至朝奉郎江陰廢郡爲縣屬毘陵民間舊無產稅出丁鹽錢所輸特重密爲請僅存什二人皆德之

姚訔宜興人元兵圍常州州守趙興鑑遁州人王良臣等以城降訔與陳炤謀起民兵復之事聞授訔知常州伯顏圍城訔與炤王安節等力戰固守招降百端終不聽顏怒役民運土爲壘并日築之且殺人煎油作砲日夜夾攻城中甚急而訔守志益堅力屈城陷與炤安節皆死之

陳炤字光伯無錫人登咸淳初進士素號知兵及元兵攻常州姚訔爲郡守時炤以胸山令守母喪訔辟爲通判或止之炤曰鄉邦淪沒何可坐視遂墨衰率義兵戰禦既而伯顏自將攻圍城陷訔歿之

炤猶巷戰家人請曰城東北門圍未合可走常熟入臨安炤曰去此一步非死所矣日中兵至死焉詔贈朝奉大夫有司立廟祀之炤率兵時其子應龜出家貲犒軍乞援兵于文天祥宋亡應龜杜門不出衣冠無改以終其身

胡應爰字煥卿宿八世孫咸淳初進士兵至常郡守姚訾見應爰喜曰君吾劇孟也署爲節度判官應爰歸告父兄曰吾家世受國恩今戎馬在郊實立功圖報之秋吾不得復徇家矣父與其兄應發咸

曰圖報之義父子兄弟同之豈容臨難苟免乎乃命其弟應登奉母及其妻子出遯以存其宗應爰選壯士三千人自將乘城爲訾畫曰吾州京師北門然城卑塹狹兵皆市人北兵乘勝銳且衆不可當宜樹柵傅城益調粟繕械爲守備計訾然之伯顏命元帥唆都率兵二十萬圍城應爰與諸將分門出戰各大捷殺其將校甚衆唆都請益師攻圍益急餉援俱絕城陷訾歿之應爰巷戰力屈就擒唆都曰若即多殺吾將校者邪應爰曰吾欲殺汝

何將校邪恨力不及爾峻都怒遂遇害年才二十
七同縣包圭者素有謀畧亦爲言用畧武進縣被
執不屈進士字下脫一元字

徐道明常州天慶觀道士元兵圍城請于郡守姚訢
曰計將安出訢曰死守而已道明還告其徒曰姚
公誓與城俱止吾屬亦不失爲義士乃取觀之文
籍置石函藏坎中兵屠城道明危坐讀老子以刃
脅之不動遂遇害

莫謙之宜興人爲郡城寺僧糾合義士捍禦鄉閭詔

爲溧陽尉率兵巷戰没于陣贈武功大夫同時有

萬安僧亦起兵舉義旗曰降魔其詩曰時危聊作

將事定復爲僧亦戰歿武進護國寺後石
塔相傳僧葬其下

蔣捷字勝欲陽羨人徒武進德祐進士平生喜著述

主於理義不爲勦說其于小學詳斷發明旨趣尤
與元初遁跡不仕大德間憲臣交章薦捷不就不
臣二姓盖天植其操云家竹山學者稱爲竹山先
生

曹岬字巨山江陰人第進士分教京口李寶辟置幕

府寶檄告山東文出岨手氣直辭壯激厲士心人
百其勇凱旋特授左宣教郎終通判饒州

錢紳字紳仲無錫人登進士任知州既仕而歸隱居
漆塘山中志尚高潔工詩嘗著詩話若干卷所居
有湖山之勝得泉于居之南味與惠泉無異名曰
通惠作亭其上

董蕃字子衍宜興人冲約靜修恬于進取元初舉茂
異除釣臺書院山長不就所著有通鑑質疑巴西
鄧文原爲之序

繆鑑字君寶江陰人孝友勤儉好學樂施宋政日紊
不復仕進以詩酒自娛學士大夫至今誦之

田比陵人品記



毘陵人品目五

元

陸文圭

徐憲

王彬

陸垕

惠希孟

梁益

吳方

李辰

倪瓚

虞薦發

陸以道

王逢

強以德

虞志道

孟栻

李士龍

杜有開

許晉

張阿蟠

單濟之

岳浚

陳汝霖

弟肅
孫尚簡

俞奕曾

俞遠

張端

陳祖仁

王文靜

陳傑

劉煥

丁岷

孔元虔

毘陵人品記卷五

元

陸文圭字子方江陰人天資穎悟讀書過目成誦博
通天文地理律歷醫卜算數之學宋咸淳初以春
秋中選宋亡隱居城東絕意仕進朝廷屢遣使幣
徵之謝不起學者稱爲牆東先生年八十五而卒
將屬纊語門人曰吾州二十年後必被兵死當葬
我以不食之地勿封勿樹庶無暴骨之患後果如
期而亂塚墓盡發而文圭墓保無恙有牆東類稿

二十卷

徐憲字元度無錫人性端雅博洽能詩延祐間由校官辟三公府掾以幹畧稱時漕運道梗奉旨度東薊州曠地爲田募江南力穡之民耕之皆憲經畫樹藝有法上嘉其成績拜南臺監察御史終兵部侍郎子伯樞博學好古洪武初舉明經孫胤亦能詩有雙桂集

王彬字文甫武進人蚤孤事母盡孝母歿哭泣幾喪明天歷己巳歲饑貸粟賑其鄉鄰全活甚衆郡縣廉其實將上聞彬力求寢免卒年七十四葬之日慟哭送者數千人

陸垕字仁重江陰人父渙宋江陰軍安撫副使招集義勇扞衛鄉井垕左右之至元間伯顏兵南下垕時未冠率其鄉人直入軍門與伯顏議論兵遂不入境奏授江陰軍判官累遷浙西廉訪副使風裁凜然剷腸嫉惡所至夷其強暴貪墨褫職者數十人有以簫鼓逐神者召而杖之投其土木偶於江累官廣東廉訪使發奸摘伏人以為神既謝事歸

吳陔人語記 卷五
斤其餘粟分贍族人設塾教里中子弟又為立均
田灑無病役者比卒人皆追思之謚莊簡

惠希孟字秋雁江陰人聰慧過人無書不讀家居如
對大賓趨蹌進退動合矩度兄希賢弟希點皆無
嗣希孟奉兄如父撫弟如兄著雜禮纂要家範五
卷

梁益字友直江陰人博洽經史與陸文圭齊名學徒
千里從之其教以變化氣質為先所著有三山藁
詩緒餘史纂及詩傳旁通深有裨於朱子

吳方字季仁江陰人受學于陸子方之門延祐中有
司薦為學錄不就自號懶庵居士歲饑方罄其粟
以賙一鄉蔡港務虧官稅錢將鬻女以償方為之
代輸其人請以女備使令拒弗納寓官有受代死
無所歸者方讓所治壽藏葬之金華黃侍講潛銘
其墓曰動人者義澤物者仁時以為知言

李辰字吉父江陰人家貧力學有志操有司交薦其
才召試迪功郎母老歸養數年母卒哀經不釋寢
苦蔬食廬墓六年絕意仕進鄉邦賢之

倪瓚字元鎮無錫人父炳季父煥皆以德操著瓚有
潔癖厭與俗交好讀書禮樂制度靡不改究爲詩
雅澹有致日坐清閤不涉世故閒作畫數筆輒
有丰神家故饒貲一日棄去曰天下自此多事矣
孤舟篋笠載竹床茶竈飄飄五湖三泖間僞吳張
士誠招之不往其弟士信致厚幣冀得一畫竟裂
而返之一日士信偕諸文士湖遊聞異香縷從
菰蘆中出遣人跡之乃瓚也榜掠幾死終不開口
諸文士力救得免人問曰何以無一言曰開口便

俗從此超然遠遜亂平還里隱居不仕至并日而
食有富人厚爲餽遺徐出扇索書艱然曰吾書可
貨取耶富人慙而退所著有雲林詩集

虞薦發字君瑞世居丹陽後徙晉陵父果避地無錫
薦發幼穎悟未冠舉於鄉性孝友族人有被掠於
兵與從異教者悉還之爲經理其田宅處約好施
歲歉有畜米損直與人平生口不言錢邑久廢學
招諸生講說義理攷論德業士聞風而至贊邑長
舉鄉飲禮建祠祀龜山先生以喻尤李蔣四公配

名五賢爲鄉校官十餘年未嘗受廩祿當路欲致
之于朝謝不往遂辭學事杜門謝客號薇山老人
以見志素不喜佛老不道鬼怪事詩書自娛至老
不倦卒年七十八

陸以道字士宏無錫人明易遯程朱之源得象外之
旨累官翰林待制著宋鑑提綱

王逢字原吉江陰人弱冠有美名臺省薦辟皆不就
居黃山號席帽山人又號梧溪子至正間盜起民
多脅從浙帥欲屠之逢曰民非樂亂無父母爾帥

悟乃止避地無錫民有橫罹鋒刃者收其骨瘞之
偽吳張士誠開藩辟士逢不受辟居梁鴻山未幾
遷松之青龍江又移居橫泖卜隱烏注所著有梧
溪集

強以德字振之無錫人幼孤弱冠授采石書院山長
歷官儒學副提舉所至並有政教以母老棄官歸
養捐貲構義學延師以教鄉里子弟買山置義塚
貧不能喪者予之棺槨詔表其門曰善義

虞志道字彥高薦發子教授湖學受知於趙承旨踐

履篤實事親長盡誠敬撫諸姪若已出待後進如
儕輩傾貲赴人之急未嘗少吝尤明于義利之辨
後學皆尊師之

孟栻字叔敬無錫人博學有才至正初以儒試吏時
方寇作御史大夫納麟署爲行軍鎮撫嘗領所部
過無錫張士誠逼杭守者皆潰栻以孤軍護平章
會失退保北關官軍妄殺無辜要太守賞栻白守
立賞格必獲首乃賞首多賞以官有獲台民指爲
方寇壻冒賞者栻覈其誣曰豈可以此取功名耶

獲平民悉縱之治書帖木列思分臺于發調栻總
兵復蘭谿寇至栻嬰城死守御史交章薦之累陞
福州路判官以浙東宣慰副使致仕更名主一既
歸慧麓日與從游者講忠義之事所著有不貳心
藁尤精篆書

李士龍江陰人讀書知大義有膂力習武事後丞相
脫脫南征累功睦州同知撫農閭兵民賴以安長
鎬氏掠地至睦士龍率所部擒斬之寇兵益至力
不敵有以敵號遺之者士龍斬以徇及勢不可爲

取槩植地曰吾報主盡矣勿令敵所吾頭遂倚馬
仰藥瞠目而逝年才二十五

杜有開字伯陽江陰人家貧資束脩以給妻吳辟纒
助之天歷間歲歉朝夕不繼吳昆弟數促有開鬻
墓木墓田有開誓死不可遂飢而死吳昆弟欲挈
吳以歸吳曰夫爲孝子我獨不得爲孝子婦乎亦
相繼飢死王逢以詩悼之曰白玉雙聯環瘞在春
申山

許晉字德昭江陰人至正壬辰紅巾賊起陷江陰晉
潛聚惡少資以衣糧保護鄉井賊黨抄掠誘使深
入殪之又陰遣人約官軍與賊戰己爲內應官軍
與賊遇不利晉戰益力賊黨復持其後其子如璋
與家僮破圍而入父子俱戰沒官軍求得其屍還
葬父老見屍車皆墮淚曰父死于忠子死于孝名
其里為忠孝里

張阿蟠無錫人生甚微致和間父母以歲饑就食晉
陵父卒蟠方成童傭身於染人馬氏以養母歲習
其業馬亦歲增其直每遇滋味必遺其母遇暑夕

炳艾爲母祛蚊隆冬煨楮拙奉母積二十年母終蟠痛哭幾絕鄉人因稱爲張孝子

單濟之字君濱江陰人至正乙亥寇燬其家父兄皆遇害時濟之尚幼挺身出救不獲蚤夜思復讎乃糾合民兵卒擒賊磔之讎既復闔門避世非慶弔不入城市歲饑爲粥以食餓者隱約慕義以終其身年垂七十卒屬續之夕捉筆自記曰人皆有死我豈獨仙霧散雲收白月在天

岳浚字仲遠宜興人飛九世孫博學好義爲石門縣尉未幾乞歸侍親積書萬卷延好學之士恣其檢閱一時名士多游其門

陳汝霖字伯雨無錫人端恪有守以詩經中乙科兩任學職造就有方從弟肅博學宏才累官翰林學士兵部尚書河南行省左丞死王事孫尚簡篤學勵行稱有家法

俞奕曾字仲山江陰人性高簡喜讀書家故饒獨被服儒素折節名士至元乙亥之亂家無子遺乃築環堵之室焚香默坐杜門却掃四十餘年不入城

市間從野老泥飲田間幅巾藜杖從容竟日居貧
力學至老其節益著號時齋至元中縣學諸生迎
致為師輒辭謝

俞遠字之近奕曾子自號空谷神骨秀竦好著小冠
戴方山櫬笠衣白綺裘儼然神仙中人行出一市
人盡驚好讀書隱居教授篤行古道里中多化之
至正壬辰鄉寇竊發所過殘毀遠築土為室壘壘
為榻嘯歌其中如澄江八景篇傳誦人口

張端字希尹江陰人博學能文有詩才尤精書翰動
止雅飭有古儒者風度家於溝南鄉人重之咸稱
溝南先生所著有溝南集初用薦起家紹興路和
靖書院山長累官南昌路儒學教授江浙行樞密
院都事海鹽州判官

陳祖仁字子山武進人至正初進士第一累官翰林
學士參知政事時四方兵起伏闕凡再上書皆不
報大明兵至通州順帝北遁祖仁將出建德門有
勸之南歸者曰祖仁生平自恨不能擇君今日又
不能處死何以立于天地遂死焉

王文靜宜興人少穎悟耽讀書不樂仕元隱居梅西日從事吟咏以自娛晚際昇平有薦之者竟以老辭不就所著有蠅聲集山陽金鉞序之曰文靜壯而將以有為也遭夫勝國出而足以達道也值乎衰年惜其窮約卒歲不為朝陽之鳴鳳而僅以蠅聲自鳴也

陳傑靖江人好讀書積書充棟出粟賑饑授江陵路稅課副使不赴趙文敏虞文靖嘗客之

劉垺靖江人工詩尤精書法趙子昂奇其蚤慧題小齋遺之後遂以名集

丁岷靖江人端方坦蕩善人倫經其品藻者皆以為榮所著有滄洲集

孔元慶靖江人宣聖裔孫宋季偕弟避亂來居構書院教生徒修隱士之操不求祿仕

毘陵人品目六

明

謝應芳

子林

張翼

子壽

蔣賢

徐績

孫作

吳雲

桑慎

張宣

馬治

浦源

黃常

沙良佐

李琛

子景修
孫戡

華希顏

姪幼武
子悰

周世忠

弟世衡
從孫益

設綽

王惟允

薛復

王思明

儲福

孫慶

顧士傑

焦先生

李時可

俞溥

朱煥

子衡

王亨

趙鉉

錢本中

儲可求

錢仲益

王皞

王達

倪峻孫敬

楊得安

劉敬

芮善

周衡

胡濙子長

唐復

毛節

俞德惠

吳肇

吳運

褚錦

曹恕

孫泰

李步行

陳濟弟浚

陳洽

何澄

孫亶

王謙

段民

段寔

白瑜

徐鑑

吳潤

徐晞

俞璿子文
孫世仁

趙琬子仲壽

顏澤

呂銘

吳禮

馮善

殷序

張思安

嚴木

潘方

昆陵人品記卷六

明

謝應芳字子蘭武進人自幼潜心理學至正初隱白
鶴溪上構小室顏曰龜巢因以為號授徒講學指
授斐然浙江行省舉為三衢清獻書院長不就壬
辰^兵起避地吳中見三高祠祀范蠡張翰陸龜蒙乃
曰范蠡計滅吳且綰載而去未足為高士吳中有
三高泰伯仲雍季子是也宜正祀典而以張陸附
之時張士誠竊據全吳應芳懷顧榮之志力不能

除乃葺顧元公墓著懷古錄以見志明興江南底
平始歸年踰七十隱居芳茂山一室磬然晏如也
傷世俗沐於異端作辨惑編三卷思賢錄五卷其
所敘述皆以正人心息邪說為主在鄉表鄉忠公
之墓正張睢陽之像去學宮土地祠之配變喪禮
用佛教之俗素履高潔為學者所宗縉紳過者必
訪其廬語以世教民隱祇肅而退年九十七而終
子林字瓊樹工文詞精字學著延陵通紀字學源
委等書洪武中舉為新鄭教諭

張翼字飛卿無錫人倜儻有氣節輒面折人或議其
太甚翼曰口所以出言當言反訥惡用口為國初
莫天祐據無錫魏國公徐達遣兵圍之令曰即不
下屠其城翼說莫天祐出降民賴以全翼嗜學為
詩歌頃刻成章子籌字惟仲博學工古文以學士
詹同薦奉詔纂修昭鑒錄累官禮部尚書

蔣賢字仲賢宜興人慷慨尚義元天歷至正間連歲
旱賢發粟賑饑死無以斂者施之棺國初天兵駐
太平賢率鄉民獻粟千斛上嘉之賜墨勅拜知宜

興州以老辭乃官其子貞

徐績字伯凝武進人元末隱居力學張士誠逼令入仕堅守不出遊梁谿適高皇帝命將統兵圍無錫績與張翼說莫天祐出降乃免錫民德之留績家焉洪武初舉明經歷武岡順德太守以惠愛為理久任凡十八年上念其老給驛送歸檢其行橐惟書數卷硃一笏而已年九十七終

孫作字大雅江陰人性方介博極羣書尤邃於性理文辭宏肆至正間避地三吳惟載遺書兩敝篋而已洪武初以明經薦與修日歷與宋濂同事意氣相得除翰林編修遷國子司業濂以近代儒者况之為著傳

吳雲字友雲宜興人洪武初以布衣授宏文館校書郎累官刑部尚書時元孽梁王自恃險遠尚據雲南學士王禕往諭不聽仗節死朝議不欲勤兵遣雲復往梁王使人勅降雲曰朝廷念一方生靈不忍加兵特遣招降而反欲降我乎我終不為汝屈遂遇害雲甫平始知雲死節其子黻扶櫬歸至江

夏力不能前留葬金口鎮弘治間詔謚忠節與王
禕並祀雲南賜祠額二忠

桑慎字仲修武進人孝親睦姻苦學力行追踪古人
洪武初任監察御史有折檻之風行部廣東奏誅
衛使張榮坐不避八議安置瓊州無毫髮怨尤之
意

張宣字藻重江陰人讀書過目成誦十歲能詩文長
益肆力問學楊維禎與為忘年交洪武初以秀才
徵為翰林編修上呼為小秀才眷遇甚隆後坐謫

濠州道卒所著四書點本刻置郡庠

馬治字孝常宜興人少好學精通經史洪武間舉秀
才任內邱知縣遷建昌府同知所著荆南倡和集
浦源字長源無錫人工詩與閩人林鴻輩號十才子
嘗送人赴荆門詩曰雲邊路遠巴山色樹裏河流
漢水聲寄山西省掾詩曰衣上暮寒吳苑雨馬頭
春色晉陵山為世膾炙授晉府引禮舍人

黃常字叔彛江陰人與同里包英惠連並以博洽聞
洪武初舉明經不就隱居由里山後薦為本府訓

導三月告歸注小學通義行世

李琛字伯器無錫人宋尚書琳八世孫敦實有文元季避亂惟以先世譜牒誥勅自隨難平自蓉湖徙居南市橋授徒養親舉孝廉不就與浦長源輩為詩社優游以終子景脩克守儒業孫戡戩孝友勵行不就薦舉開門授徒有琛之風

沙良佐武進人國初薦知江西新城縣廉慎自持以寬字民篤於學校不四五年人足衣食庭無訟至百姓戴之

華晞賢字以愚無錫人元末不仕洪武初辟舉以老辭隱居東湖賦詩自娛有東湖集從子幼武事母至孝篤志問學雅好吟咏有黃陽集子棕韡穎敏好學尤精于易徵孝廉不就人稱貞固先生

周世忠字士行無錫人與弟世衡自相師友避亂入吳有挽之仕張氏者不聽吳人丁仲舉高之妻以女亂定歸隱揚名里從孫益篤信好學亦有隱操諉綽字公綽無錫人性質直嘗客松江同舍郎令娼狎之綽不亂諭娼以理娼感泣改行晚為亭長有

盜當刑夤緣求脫畏綽撓之以百金餽綽呼鄰里
逐之洪武間以人材舉督賦蘇郡守餽百金綽拒
之曰太守不知我耶守爲媿服其介如此

王惟允字俊民無錫人國初以薦授南鄭縣丞撫綏
其民不遺餘力歷宣化二州同知以鎮江府通判
休老

薛復字復善江陰人洪武初以博學應徵與宋濂王
禕輩訂定典禮授汝寧知事軍民德之尋辭職家
居二十年讀書教授屏絕世故久之徵拜御史尋

陞廣西僉事部內民夷雜處一以德義化之甲申
考最復任尋卒

王思明字克明武進人洪武初以薦召爲右傅侍燕
邸寅畏恭謹未嘗有失先是以離亂故籍多委棄
獨笈負諸圖史以隨上問及因捧批點綱目及大
學衍義以獻曰此二書萬世之龜鑑也上嘉納之
平居正襟危坐焚香閱書無少怠惰置日歷於左
右題曰司馬公平生所爲未有不可對人言者某
日所爲舉筆於斯若不可書必不可爲其自治如

此卒諡康懿

儲福無錫人洪武初隸燕山衛籍生平喜讀書慕顏
真卿文文山之爲人建文未挈母妻逃去文皇即位
詔搆戍卒入伍福在錄中調曲靖衛復挈母妻以行
因仰天哭曰吾雖一介賤卒義不爲叛逆之臣在舟中
日夜泣不輟竟不食而死妻范氏年二十奉姑甚謹
每哭其夫走山谷中不欲聞之姑也然貧無以存一日
往澗水邊浣衣見其傍有蓆草因織蓆養姑姑卒廬于
墓側年八十餘卒范卒草

不復生土人義之即其廬葺爲庵名崇孝

孫慶字思敬武進人少孤事母最孝母病瘍慶吮而
愈母染寒疾割股進得平復後母終墓所號泣忽
產靈芝五莖鄉人以爲孝感所致

顧士傑字文英武進人洪武初父督國賦時法嚴升
合註誤輒坐死適父病兄士俊當就逮士傑年十
七方負笈鄉塾歸謂父老兄家督何可死竟赴京
獄瀕刑有旨願永戍遼者免死立黃旗下願戮者
立紅旗下士傑曰人生自古誰無死寧忍兒孫負

甲兵竟趨紅旗下受戮隣人孫作官京師哀而殮之作顧孺子孝義傳

焦先生逸其名江陰人家虞門里高皇帝故人也及帝爲天子遂隱洪武初有詔下有司徵求甚急恐爲有司累謁帝于金陵持雞酒直馳甬道入與帝班坐飲如微時帝贈以金玉角三帶任其所取取角者除千戶亡何挂帶而去不知所之

李時可靖江人任俠自喜楊廉夫造之以赤玉盤盛脯白玉斗盛漿並徑尺又設櫻桃燕瑪瑙作埒水晶爲食床佐酒青衣皆絕色高皇帝下江南徵粟萬石助軍興後沿巨楸浮海去

俞溥字彥淵無錫人由賢良授都府照磨上褒其才智練達累陞戶部尚書江西行省參知政事與張公籌同致政歸日相往來布衣蒲履一蒼頭携杖尋梅問竹人不知其爲兩尚書也

朱煥字文仲武進人國初以才畧辟參元帥吳公戎幕張士誠據蘇州吳每擒其脅附戮之煥言於帥多所縱釋歷官福建按察司卒子衡循居喪有聞

衡舉爲九江郡幕

王亨字仲理無錫人性嚴正舉秀才擢四川按察僉事大振風紀蜀人懍敬之號王鐵面

趙鉉字文鼎江陰人元末兵亂鉉時尚幼與母相失明興平吳鉉歸故里思母輒涕泣不食歲時號慟絕而復蘇歷走吳越間三年不獲後遇鬻牛者言狀得於鄞之畫錦坊相持痛哭悲感傷人奉母以還蓋母子違絕者十八年更十二年以壽終論者以比朱壽昌云

錢本中字文德武進人洪武中薦知吉水門無私謁小民迫於豪強哨聚山谷詔大帥討之本中乞緩師乃單騎往諭衆羅拜願自新全活數萬人改知安樂以註誤免學士胡廣言于朝復知吉水卒于官百姓留葬其地負土爲墳至今祀焉

儲可求宜興人穎悟善屬文尤深於理學洪武中察舉任本縣訓導累官禮部侍郎

錢仲益名允昇以字行無錫人洪武中以文行舉爲本縣訓導累遷太常博士翰林修撰預脩實錄稱

爲良史雅好棋文皇呼之曰棋仙自號錦樹山人
王暉武進人洪武中知潁上縣慈祥愷悌以德化人
時稱良吏

王達字達善無錫人少攻苦問學究極羣書舉明經
歷官國子助教文皇在潛邸聞其名即位召對稱
旨擢翰林編修預脩實錄終侍講學士自號耐軒
又號天游道者所著天游集梅花百詠

倪峻字克明無錫人洪武庚午舉于鄉官給事中文
皇帝好佛上疏力爭忤旨遣使占城劉正不撓夷

人服之孫敬官御史按福建時議欲開銀礦敬抗
言無避事遂寢景泰末朝政多闕災異迭見敬陳
敬天脩德六事謫尉宜山論者謂祖孫皆古之遺
直云

楊得安宜興人博學有名薦知南和縣擢知嘉興府
爲政和易與物無競察察咸推服之終僉都御史
劉敬字季恭武進人洪武間舉人材知剡城廉明寬
厚惠政大行朔望延訪父老以失得秩滿百姓詣
闕願留陞建昌府通判益勵廉勤均差徭公賞罰

吏民畏服累陞易州知州刑部員外郎

芮善字性存武進人淳厚無詭辭媿行言溫色和洪武丁丑進士歷中書舍人司經局洗馬侍襄王講讀王出封領右長史王重之號曰坦然未幾歸老王製金蘭圖之

周衡字士平無錫人舉明經授本府訓導洪武十二年召試稱旨擢右正言上嘗下詔蠲江南租已復徵之衡言上不信於天下上默然未幾衡告歸省上與期六日還朝衡七日至上怒曰朕不信于天下爾不信于天子遂棄市

胡濙字源潔武進人洪武庚辰進士授兵科給事中永樂初進都給事中時傅建文君逃去舊臣多從行上疑之因遣濙以訪張三丰爲名偵建文君所在濙以無他虞爲報上疑始釋既而太子監國或謀奪嫡飛語上聞濙疏太子孝謹七事儲位以安乃太子初不知也既嗣位始得之大喜以濙爲忠慎將大用之會晏駕宣德初累陞禮部尚書賜第給閭時武進有沒官田因賜之尋兼戶部事裕陵

登極益禮重之土木之變廷臣議迎上皇時王文
厲色曰孰謂虜可和不索金帛且索土地憂方大
耳衆相顧不敢言澗竟上奏迎儀汪景泰元年楊
善使虜澗言宜附服食進上皇不報上皇歸又請
明年正旦朝于延安門不許懷獻太子立進兼太
子太師是年十一月上皇萬壽節澗請令百官拜
賀於延安門又不許六月疾作又明年上皇復位
力疾入見請老官其子長宜世鎮撫卒諡忠安長
宜以孝行聞詔旌其門

唐復字復亨武進人洪武庚辰進士令餘姚拊循細
弱甚著恩愛擊斷無滯百姓宜之調零陵又調交
趾時安南國黎季犛亂復爲書數千言諭以禍
福又著華夷解示之季犛驚服南荒真安太宗見
其書命付史館已乃爲當路者所蔽置不錄後陞
大理寺副宣德間知平樂府除姦釐弊扶弱抑強
事神字民勸農興學百廢具舉風俗丕變及去位
百姓思之立祠于學宮之傍

毛節字伯尚武進人洪武間邑舉爲鄉三老郡遣節

負版詣京過金山有咏雪詩留題壁間上幸金山見詩稱賞索其名於廷臣中無有也節適進所負版上見其名微行訪之邀入酒家對飲節偶抽竹簪刺齒上命賦之有一掠能教萬髮齊之句薄暮望見塔燈復賦云光明願與君心竝徧照逃去州野中上撫掌稱許出一緘謂節曰吾有故人守常煩致之至郡開緘乃上書以節爲御史巡按江西勅也守以禮送節之任微服出行部遇兩惡少裸而相持節解之大爲所詆遇一媪號泣節問故媪

曰邑有小姑神歲必以童男女祀之不則降殃妾不幸生二女去歲既取其長今及其少是以悲也又一媪亦泣節復問之媪曰妾有一子爲妖所攝死將至能無痛乎節入署卽爲檄召城隍之神神見夢曰吾陰司也當以夜謁是夜節燃燭坐堂上漏下二鼓有絳衣者長跽於庭節讓之曰國家建爾爲城隍之神當爲民祛邪除害胡縱兩妖爲祟城隍謝曰某不德實不勝妖稱小姑神者白狐惑男子者其家老樹也明府按臨彼已遁去明日節

令毀小姑山祠伐媪家後老樹併捕二惡少杖殺之一境清寧其所按部多類此人皆稱爲真御史小民書其姓氏奉之

俞德惠字用濟無錫人洪武間以經明行修徵授行人使蜀復使廣右值寇作亂惠驅車而前猝與之遇不屈而死

吳肇無錫人洪武間以經明行修徵拜御史建文君嗣位益加眷注見齊黃削奪親藩太驟嘗從容借漢事為喻上優納之適父喪歸服未闋靖難兵渡

江聞宮中火因北向慟哭曰有老母六不能狗也即奉母挈妻子匿山中居無何復變姓名從建文君亡泝楚入蜀至滇有人識之于西平侯第正統初釋禁始婦卜築于常之孟墅託醫以養母人無知者母年九十餘卒自是亦不復言醫矣

吳運江陰人八歲喪父祖父母老而瞽母邢氏寡運每晨出販果餅以資贍養母賴以活竟守節不貳母仲夏抱病渴思飲冰不可得運齋告戒天呼號絕忽雨冰奉母食之病亦隨愈母亡刻木肖像

晨夕上膳如常人稱其孝部使者以母子節孝奏聞旌其門

褚錦字克文宜興人家貧爲村學究資性慈厚生平多善行如茶亭還雪後之遺金西館拒夜奔之少婦皆偉節也

曹恕字以忠無錫人博學工文詞以薦爲漳州訓導士習一新因祖母年高乞休忤旨戍山西永樂初復以薦起建言四事皆切時政賜復職所著有植梧集

孫泰武進人繼達長子襲涼州衛指揮陞昌平都司靖難兵起竭力守禦戰于懷來中流矢裹血力呼死之立廟盧姑墓在郡城芳茂山

李步行無錫人城東賣菜傭也父嗜酒步行鬻菜必市酒歸飲父又閒進時物體無完衣而父便身之物常給里中有不順之子父母諭之必曰何不學李步行

陳濟字伯載武進人博學強記與弟浚洽並有道望時稱河東三鳳永樂初召修永樂大典以布衣任

總裁書成授春坊贊善命授諸皇孫書眷顧特厚
所著有元史舉要通鑑集覽等書

陳洽字叔遠濟弟與浚同胞生浚有學行不就辟舉
號真趣居士洽淹貫經史用薦爲吏科給事中永
樂初累遷吏部侍郎大理寺卿佐英國公張輔討
交趾平之陞兵部尚書鎮撫其地宣德初交趾再
叛命成山侯王通討之通輕率欲渡河洽力止之
弗聽麾兵以渡與賊遇洽躍馬突入賊陣身被重
創益奮不顧竟遇害詔贈少保諡忠愍官其子樞

給事中嘉靖初立廟本郡賜額忠節

何澄字彥澤江陰人永樂癸未舉于鄉以部郎言事
忤旨謫武當已復上疏激切下詔獄洪熙改元釋
歸宣德中薦擢知袁州與民休息頌聲四達正統
中乞休所居植竹數百竿引以二鶴自號竹鶴老
人雅意翰墨

孫亶字叔誠江陰人洪武中以貢授吏部郎出守鞏
昌躬行節儉崇重學校治理流傳西戎賓服歲饑
絕種亶解帶袍易蕎麥百斛分給民益親附丁內

艱軍民上章借留詔起視事九載秩滿復詣闕請
進三品祿秩還治府事凡三十年不離鞞昌致仕
歸篋笥蕭然家居八年卒

王謙字益夫思明之孫父彥昭遇文皇於潛邸命爲
皇子講讀謙三歲能誦孝經九歲持母喪如成人
讀書禁林上摩其頂曰真書種也及長博聞強記
卒業太學詔辦事內閣試中書舍人土木之難衆
議紛沓謙獨上言也先君臣猜忌勢必不久宜固
守以撓其銳卒如其言景泰改元屢疏時事由吏

部郎中調南太常少卿英廟復辟召見言事切直
復舊職忌者沮之九載弗遷後出守夔州奏罷歲
獻省費千計牢無滯獄盜不入境夔人畫像祀之
段民字時舉武進人好古力學精練吏事性廉介不
可干以私登永樂甲申進士授刑部主事轉郎中
以平恕稱永樂十八年山東妖婦唐賽兒反三司
俱以縱寇逮簡任事者民以叅政討平之是時索
妖婦急盡逮北路諸尼已又逮天下出家婦女人
情洵洵民爲解釋綏輯始安無何駕北征勅民轉

餉出塞民爲曲算費省而事給忽奉旨考察所過
郡縣吏宣德二年召主會試明年陞戶部侍郎尋
改刑部又奉旨考察京僚典試考功吏禮二曹事
民皆以特勅至之其以廉謹受知於上如此至是
適遘疾稍瘥將出視事或止之民日數百人因坐
獄中翹跂待我可自佚哉出三日疾大作遂卒僅
遺俸金四兩都御史吳訥力爲經紀始克斂萬歷
間補謚恭肅

段寔字伯誠民之長子性端介有父風承民之後貧
甚無以爲居周文襄忱初撫江南買宅一區居之
以諸弟婚娶衣食鬻所居分給之以蔭補太學生
授兵部主事從征麓川凱旋寔獨不言功橐中亦
惟圖書數卷絕無長物也官至福建叅政
白瑜字楚英武進人永樂甲申進士授給事中出爲
鈞州判官廉勤有爲秩滿民不忍其去保留復任
後終福建市舶司正提舉嘗念士子之貧輸田若
干畝于邑庠至今士受其惠

徐鑑字子明宜興人永樂初由舉人任刑部主事言

事繫獄尋赦出遷戶部郎中守瓊州廉靜寡欲興學勸士治教大行在郡四年卒于官巷哭家祭柩還送者填海濱士民請立祠專祀孫溥大學士吳潤字汝德武進人以邑諸生舉修永樂大典除刑部主事歷知建昌姚安廣信三郡休養生息興學育才士民愛戴之累陞江西布政使丁母憂諸郡連章乞留詔起復前職在任六考民熟其化不忍舍去景泰初累疏請歸年七十九卒于家

徐晞字孟晞江陰人永樂中由縣功曹歷郎署擢兵部侍郎鎮甘州復鎮涼州莊浪諸要害陞南戶部侍郎會征麓川以督餉功陞兵部尚書卒晞爲功曹時有以勾戍誤及者求脫于晞貧無可餽令妻佐觴有殊色晞絕裾走及官郎署有同舍郎佯詈一吏意實在晞晞若不知也者同舍郎死晞爲歛送其篤行雅量如此

余璿字彥衡江陰人祖鎮卿國初任教諭造士甚衆璿世其業橫經講授弟子日衆以儒士舉脩永樂大典書成賜寶鏹應求賢詔被召尋卒子文字日

章博學工文居家孝友所著有學古類編等集孫世仁亦以敦行稱

趙琬字叔琰武進人領永樂辛卯鄉薦由校官累遷國子司業景泰間駕幸太學賜坐講經陞諭德掌司業事在太學十七年矩範端嚴裁成有序士有親老而貧者存恤之婚喪疾病輒捐俸以助士愛而憚之所著有梅庵集子仲壽以蔭官知州有惠政居喪哀慟幾至喪明人尤稱之

顏澤字澤民江陰人永樂壬辰進士太宗一夕夢緋衣人見澤以新進士入朝協夢即除知鎮遠府時鎮遠初入版圖澤因俗爲治奏請立學得視列郡其化大行人以佛子稱之累官叅政

呂銘字允銘無錫人永樂間由饒州稅課擢刑部主事立剖寃滯擢知西安府以循良著聲

吳禮字幼文無錫人永樂初由諸生爲功曹授刑部主事出知鈞州督太和諸宮事政令嚴明軍民欽肅入爲禮部員外郎

馮善字擇賢無錫人永樂中舉明經授本學訓導轉

望江教諭並有師模望江有三孝祠祀王祥孟宗徐仲源善以孝爲百行之本學校爲風化之源請從祠于學尋以母老乞歸

殷序字序賓無錫人永樂甲申進士知黃巖縣尋知高唐州公勤強幹不避盤錯文皇北征序處置迎鑿事多稱旨擢江西布政改四川宣德初西戎叛圍茂州序與大帥趙德戰敗之賊登山壘石自固兵不能攻序命積薪畧與山等縱火焚之絕其歸路賊窘投崖下前後擒獲納款者七萬八千餘人

賜勞優渥轉雲南布政乞休歸自號西郊居士張思安字克讓無錫人永樂壬辰進士歷官湖廣僉事時夷陵多虎患思安移文黃陵祠具言吏治不臧盍殃其身縱虎噬人人則何罪虎患遂息後以註誤落職例許贖罪貧不能辦就謫鍾吾宣德間復起陝西按察副使致仕

嚴本字志道江陰人永樂中以布衣薦授刑部主事遷大理寺正多所平反會朝廷初建北都分遣京官下郡國督辦甚急本至太平寓僧舍有懷金餽

他督者誤投本所本笑卻之即日彼舍人莫知其
故事竣懷金者言之人始歎服本爲人耿介不阿
廉潔不染用法平恕行履端確有古人之風所著
有律疑解略刑統輯義

潘方字孟賢武進人幼孤奉母至孝母疾每夜籲天
祈減己算爲母益壽母喪哀慟屢絕終身布素士
大夫私謚曰節孝先生

毘陵人品目七

明

秦樸

孫霖

翟厚

華恪

子澤

王紱

徐琳

錢秉

子惟常

李庶

吳謙

王忠

楊浦

過儀

潘諒

王超

陳全

鄭觀

子畏謹
從子彙

吳益

俞雍

張志道

徐雍

郭觀

高曇

成始終

孫周

楊璿

弟琛

顧琳

張鑑

卜祉

劉本道

黃敏

吳玉

劉弘

錢綱

陳士名

孫樞

薛恒 顧協

卞榮

厲昇

盛顥

施玘

余樞

王俱

劉觀

徐溥

趙啟

徐轄

趙瑾

薛章憲

李庭芝

杜宥

龔穆

張遜

毛瑄

澄江懶漁

杏林叟

朱昱

朱憲

秦旭

秦夔

秦旦秦爽

子鏜銓涵

白昂

吳淵

沈暉

陳賓

陸簡

張盛

李雲

蔣朝憲

周玉

芮畿 弟稷

張勳

陸淵

諉綱

薛為學 弟承學

邵珪

邵暉 子棠

毘陵人品記卷七

明

秦樸字物初無錫人貌古行端不爲矯飾衣冠言動
黃蘗里開孫霖世濟德美以子金貴受封益務韜
斂出入未嘗御章服人或稱之

翟厚字公厚無錫人與同郡余璿俱從王耐軒游學
有源委治家孝敬尤嚴于祭祀所著有錫山遺響
續通志畧

華恪字叔端無錫人性淳謹不言人過望重鄉邑嗜

學問尤精於史子澤亦能詩

王紱字孟端無錫人官中書舍人工詞翰畫竹絕倫
寓京邸夜聞簫聲悅之乘興作竹石詰旦贈吹簫
者蓋富商也其人大喜過望具兩駝求對幅紱曰
俗子何足當我筆索所贈毀之其高介絕俗類此
徐琳字廷璽鑑子淳厚有器識以子溥貴姻黨有虧
官稅者祈琳爲言緩征琳捐貲代輸終不請託有
稱貸者以田來償計所入畧相當輒還之嘗語溥
曰吾族子姓皆祖宗一體賙恤未備吾心歉焉其

後溥置義莊實琳啓之也

錢秉字公治無錫人博雅端純善睦宗族歲饑與從
子惟常出粟千石賑給鄉邑詔表其門

李庶字舜明無錫人居家敦行孝弟朔望謁先祠退
坐中堂男女叅會必有戒詞尤矜細行縣舉爲鄉
飲賓晚結茅渠水杜門讐校每風日晴美曳杖行
歌悠然自適年八十六卒所著有錫山志子覺登
進士

吳謙字伯禮無錫人力學攻古文詞有聲德器雅正

嘗被誣戍廣右操行益勵事白歸鄉里稱曰復民
王忠字守正武進人父友諒爲稅長輸納後期法當
死忠年十七詣京請代會赦免宣德間由國子生
授兵部主事廉慎不苟以母老引疾歸養與邑之
耆英爲真率會徜徉自得清白之操可方古人
楊浦字宗廣武進人五世同居食指以千百計尊卑
上下藹然禮義之風鄉邑皆欽仰焉

過儀字廷章無錫人風流蘊藉善詞翰有司嘗薦于
朝不就放情詩酒畫松特妙山水小景亦佳

潘諒字友貞武進人宣德丙午鄉舉歷官南吏部郎
時胡忠安方柄用諒與屬戚未嘗干進需次久不
調後出守臨江行賈給符錢頗不貲諒分給同官
有餘以資賓旅謝事歸行李蕭然所居卑陋人不
能堪怡然自足

王超字景昇宜興人衣冠朴雅有古人風恥與時輩
爭進取所著有東臯野語

陳全宜興人以貢任袁州推官廉平明允擢御史三
領勅印馬巡河清戎所至兵民感頌升楚僉憲致

仕

鄭觀字尚賓武進人宣德中以儒士舉歷監察御史終廣西僉事性剴方識量宏遠自窮約至貴顯終始一節家置一室名存餘倉給祭祀之外以周貧乏風尚簡素可爲世規二子畏薦授府經歷謹中鄉舉通判贛州從子鼐天順丁丑進士知武定州陞山東叅議乞休歸清約如寒士

吳益字永貞無錫人由國子生授淮安知縣爲政豈弟民愛之猶父母考最陞太僕寺致仕

俞雍字文熙無錫人正統舉人知公安縣公恕勤敏脩舉庶務每勸民畊織揚文定公溥嘗延譽於朝謂有古循吏風升廉州通判致仕

張志道武進人由太學生知陳州勸課農桑民安其化遭旱蝗鄰邑災志道禱于神蝗不入境後以憂去民咸思之

徐雍武進人正統初知崑崙縣問民疾苦好賢禮士卒于官民哀痛之

郭觀武進人爲御史正統初按山東首劾三司正佐

三四人寘諸法郡邑吏者不法者多聞風解綬去
剖斷疑獄不少撓滯尋以忤貴近移廣西僉事
高曇字景雲無錫人由國子生授漳州府判正統己
巳鄧茂七構亂曇督軍餉遇寇欲掠其芻糧脅之
以又不屈罵賊遇害詔贈工部員外賜葬漳民立
祠祀之

成始終字敬之無錫人正統己未進士授行人擢賢
監察御史陞湖廣僉事有詩名初始終從張思安
授業登第歸乘騎拜其師凡五往弗出後徒步往

始出見聞者重思安而賢始終孫周進士官至僉
事以風裁稱

楊璿字叔璣無錫人正統己未進士授戶部主事累
官山西叅政河南陝西布政都察院副都御史在
山西八年督餉實邊事集而民不知勞在陝五年
遇西夏有警洪渠水溢調度隄防不遺餘力荆襄
南陽流民嘯聚以百萬計璿受簡命往撫遠近帖
服未幾盜起房竹璿諭之弗悛一鼓而殲渠魁脅
從悉宥之移河南敷求民瘼搜抉吏姦禁游未抑

豪強剖決獄訟夜以繼日勞瘁疾作乞休不允卒于官從弟琛登進士官禮部郎中亦以勤敏著聲顧琳字汝玉江陰人正統間以歲貢任大理寺副疑獄盈案譚笑決之權豪請^其無所徇己己之變作詩遺廖忠愍託事致諷薛文清公薦爲左寺正論事愈力爲同官所構下獄歲餘得釋英廟復辟琳建言時務成化改元公卿稍專恣琳論劾不報歎曰可以去矣遂乞致仕屢薦召之卒不起家居十有五年卒

張鑑字叔明武進人領正統辛酉鄉薦將謁選聞繼母凶問或勸其就銓而後發喪鑑曰哀發于衷豈能暫遏功名外物吾不能以彼易此即日奔喪銓曹重之制終授南吏部主事歷戶部郎中在部晁久出納清慎子壘領鄉薦鑑即謝事歸囊無餘貲處之裕如也

卜祉字景福宜興人正統辛酉舉人官戶部郎以廉慎稱天順初承委叅訂天下版籍事竣復命蒙勅褒獎方家食時尤落^二負奇節嘗肄業學宮路拾

遺金二裹密伺失者驗實還之人服其介
劉本道江陰人由掾史授刑部照磨從征雲南正統
間從討閩寇凱旋陞戶部員外郎景泰間西北邊
饒請給價買牛易種與之貴州邊倉侵盜事覺株
連不解本道往按逾月而辦天順丁丑進戶部右
侍郎總督糧儲先是漕運京糧陸運四十餘里勞
費不貲本道建議乞于京軍歇操餘月運糧至京
而漕運之糧止於通州交納歲積羨耗五十餘萬
石詔賜二品服以寵異之

黃敏字叔才正統中任興化府經歷潔廉自持人不
敢干以私莆田丞舞文厲民敏械治之後爲丞所
誣罷歸莆人立去思碑于郭門外

吳玉字尚璞宜興人正統間由歲薦授戶部主事權
鈔淮上清操苦節有如貧士卒于官蕭然破麓與
旅櫬來歸聞者皆歎惜之

劉弘字超遠無錫人正統甲子鄉貢歷長垣知縣順
天推官東平知州致仕弘氣高視世俗瑣屑輒訾
薄之政尚嚴明文亦奇古

錢綱字孝常無錫人由國子生授偃師知縣威惠兼濟治有成績致仕卒綱平生負直氣好辨說不苟容于物其爲政亦以是推行之自謂無愧言愧行云

陳士名字孟聲無錫人正統間以太學生授貢州新添衛知事苗賊攻城死守得完升南靖知縣以寬簡稱比致仕歸邑人感而思之過錫山必瞻拜其廬

孫樞字叔綱武進人由國子生授象山知縣廩正不苛民懷其惠轉太監都司斷事致仕貧無以自給郡守劉珏輟俸資之

薛恒字履常無錫人儒士舉知蘭谿縣以公廩著聲卒于官同邑顧協有文學名恒從之游協有鳴志集恒梓行之

卞榮字華伯江陰人正統己丑進士歷官戶部郎中能爲古詩歌客京邸卷冊填委頃刻應人之求無不滿意既謝事歸益肆力詩文名動吳越有蘭堂集

厲昇字文振無錫人性褊介與人不苟合論是非賢
否必伸己見乃已人或迂之昇笑曰吾不迂誰當
迂者以貢士授青田知縣持廉秉公致民隱致
仕歸民立生祠祀之

盛顯字時望無錫人景泰辛未進士拜監察御史以
劾武臣石亨忤旨出知東鹿縣百姓爲之語曰東
鹿令錫山盛清如水明如鏡丁內艱東鹿人詣闕
乞還舊令服除仍知東鹿累官刑部侍郎山東旱
饒議改顯副都御史往撫下車禱雨輒應枯槁復

甦又雜採古今救荒之政行之一境以宣年未七
十乞休歸建方塘書院老焉

施玘宜興人母疾刲股療之平生嚴謹對人不作褻
語嘗與一僧善僧病篤出私蓄託玘治後事玘令
僧封誌之僧死斂殯周至而以所寄歸其徒封識
宛然年九十七而終

余樞字季樞無錫人明敏博學攻古文辭景泰初領
薦授景陵訓導陞岳陽教授轉楚府伴讀乞歸卒
門人私謚曰淵敏所著有玉庵集

王與字廷貴忠子也景泰辛未進士及第授編修天
順間爲東宮講讀憲廟踐祚擢左庶子成化初以
念母求改南丁內艱服除會南京祭酒屢以賄敗
用特薦起與脩舉教法課學業裁躁妄士風一新
九載秩滿擢南京吏部侍郎累陞南京吏部尚書
再改乞致仕卒于家贈太子太保謚文肅與爲人
言動不苟尤以孝友稱憫兄子澄之孤移其蔭蔭
之嘗購別業有故塋在欲徙之與不忍闕其垣使
歲時祭掃焉

劉觀字廷賓武進人景泰辛未進士授禮科給事中
歷湖廣叅議福建叅政觀性狷介所至聲稱籍甚
成化庚子陞廣西右布政使未赴卒

徐溥字時用琳之子景泰甲戌進士第二人授編脩
累官少師華蓋殿大學士謚文靖贈太師弘治初
天子明習國事燭溥忠誠逐劉吉而任之命內閣
撰三清樂章溥言不可欽天監正李華罷忽傳旨
復官溥言內降一行倖門遂啓臣不敢阿從武岡
守劉遜忤岷王王奏逮詔獄溥言遜情輕謹重乃

得釋中官李廣以左道惑上溥言其邪妄廣竟敗
誅溥在位十餘年百姓樂業四陲無警天下號治
平焉嘗置義田以贍族請命于朝復其繇以爲勸
云

趙啟字叔成武進人景泰甲戌進士拜監察御史以
言事忤旨黜知介休尋召還按湖廣河南興利除
奸風采凜然按江西會大旱勅啟賑濟條畫有方
軍民沾惠詣闕請留因陞爲江西按察使時有請
設各省巡撫者獨江西以啟在不更設也後改山

西送者填道立祠祀焉

徐轄武進人景泰甲戌進士及第性聰敏學問該博
凡有製作援筆立成文不加點與修實錄欽賜五
倫等書性喜飲終日無醉容不屑蓄財作家位居
清要屢空晏如惟日與翰墨爲生而已

趙瑾字公韞無錫人好善喜施孤貧無歸婚嫁失期
殮葬不具者皆資給之景泰乙亥饑疫死者多棄
原野瑾買棺置通衢縱取不問開義塾教訓鄉閭
子弟有鬻田者匿其券將構訟券遺道傍犬銜置

瑾前遺券者詣瑾謝瑾曰實未有券也以此益稱長者年九十三卒

薛章憲字堯卿江陰人博物洽聞傑然稱古作者性復喜佳山水興至輒輕千里赴焉居賓坐中斂衽默然古貌瞿々人望而欽之所著有鴻泥堂集晚號浮休子

李庭芝字瑞卿宜興人廉直簡慤雅有古道嘗同業師許恒應南試恒暴仆闈中庭芝哀慟即投卷負其屍出土人無不歎慕景泰癸丑中式累官平樂

知府致仕家徒壁立妻子不免饒寒泊如也

杜宥字叔寬江陰人景泰甲戌進士授監察御史按西夏貪暴屏息與倪敬等言事坐貶英廟復辟起知英德縣猺寇爲患剏築邑城城成而寇至帥兵乘之潰去通判韶州流亡來歸未幾以冒瘴癘卒龔穆字孟遠武進人讀書守禮教授鄉閭多所造就門人王僎爲學士往候穆方躬耕岸水灌田僎竦立桔槔下穆曰子盍先入吾室田功畢方得歸僎抵其家久之穆歸所餽金帛悉不受受其肴核即

以對設酣暢而別後薦之爲鄉飲賓不赴

張遜字時敏無錫人舉景泰丙子鄉試授同安知縣
內監侵民田遜復之適歲饑村徭補救荒政稱最
擢福甯知州改涿州涿爲天下極衝尤多閹豎家
遜不阿不激處之帖然陞福州知府振舉廢墜摘
發侵渙聲籍甚會以述職過家遘疾卒

毛珵字良寶武進人領景泰丙子鄉薦官泉州知
府能以簡靜御囂煩既歸鄉人有誚其不能自潤
者珵曰家世清白志之不忘正所以潤吾身也家

居屏跡讀書人問何樂曰每觀一書輒有新知以
斯爲樂子汝乾亦登進士官南京御史

澄江懶漁或曰張機也字子樞志不在漁有託而逃
焉者所爲多陰德事作留耕堂以示世吳郡高啓
有澄江懶漁說

杏林叟姓董匿其名隐居暨陽山中不知其所自出
嘗遇異人授鍼術能立起人危疾或報之賞謝曰
吾衣食幸自給無庸是也第令人種樹舍傍久而
成林因號曰杏林叟吳郡高啓作杏林叟傳

朱昱字懋陽武進人博綜羣籍留心著作尤長于詩
聞王學士達善梅花百律追和之晨起濡墨不移
晷百篇卒就至今傳焉所至倒屣倡和盈卷王文
肅與脩郡志借力於昱者多昱又爲續志八卷文
肅嘉賞尤亟稱其孝行云

朱憲字子成武進人好讀書慕古幼作詠天詩朱昱
見而竒之爲諸生游心理道峭直崖異以註誤免
家赤貧邵文莊移書郡守以官屋居之尋又以詩
袖幾大譴唐中丞爲言當道得白以窮愁終

秦旭字景暘無錫人莊重寡言居處有度里中有爲
不善者輒相戒勿令秦翁知善吟詠與李庶輩結
社於惠山之麓卒年八十五友人私謚曰貞靖先
生

秦夔字廷韶旭之子天順庚辰進士守武昌興學課
農緩刑均役治行爲湖南第一累官布政所至惠
澤及人既去皆立祠祀焉歷官四十年僅有田三
百畝人稱其廉父歿夔年六十餘哀毀感疾卒人
稱其孝云

秦旦字永孚奭字仲孚俱旭子旦忠厚沉默擇言而
發奭更直諒多才執旭生子三長夔以進士起家
二子居家侍養四十餘年左右無方曲盡孝敬父
患心痛醫謂胸血可療二子競攻胸出血和酒以
進父疾竟愈母傷膝創潰競以舌舐之創亦尋愈
監司以聞詔旌其門曰雙孝旦子鏜字國和母張
病痿又瘖不能言鏜以意揣其欲而調護之便溺
坐起躬自抱持積十九年如一日鏜弘治甲子鄉
薦自母病即廢南宮試有司勸駕力辭不赴母卒

而老矣乃即家授南京都察院都事與奭子銓亦
稱雙孝云鏜子淮字伯川孝謹長厚以貢授辰溪
令廉平宜民子禾成進士監稅揚州淮遺書曰吾
不治生產無以遺汝汝有今日當會此意汝子亦
不待汝遺也漸字叔度性方嚴篤行誼食廩濱貢
以子梁成進士遂棄之涵字季宏舉于鄉官通判
操執不苟自旭至淮歷四世皆恂恂篤行錫稱有
家灑者必推之子孫科第亦最盛

白昂字廷儀武進人天順丁丑進士授給事中因黃

霧之變上言六事爲應天府丞定議役法爲操江都御史降海賊劉通爲兵部侍郎脩祖陵會歲祲節費以賑饑者既而河決武原勅昂往治自陽武至儀封築隄以防張秋之決引中牟之水以入淮濬宿州古睢河以入泗又多爲渠堰于徐兗之間以殺河勢高郵築複隄以避風濤人呼曰白公堤爲右都御史令御史歲報有司賢否視所報當否爲殿最請籍天下軍戶以便勾稽籍土田高下以稽水旱爲刑部尚書奉詔修問刑條列定百餘事

迄今遵行以太子太保致仕居官四十餘年未嘗責怨于人尤厚于鄉里以緩急告悉爲排解內行修飭未嘗御二女痛弟蚤世移蔭其子立義學以教族人子弟卒贈特進太保諡康敏

吳淵字本深武進人父昌歸德府同知有善政淵舉天順丁丑進士授刑部主事歷陞福建知府郡多繫囚淵雪其枉者百餘人決遣五百餘人不浹旬狴犴爲空貧民逋租以數萬計淵爲裁省浮費勸輸有餘民不擾而公賦足民戴之若更生當路者

皆推薦之以母老致仕歸養

沈暉字時暘宜興人言動謹飭天順庚辰進士累官副都御史巡撫鄖陽總理調度聲威震疊後以南京工部侍郎致仕居家不妄與人接惟杜門玩諸儒文集及古今圖史尊崇理學屈己下賢人謂其禮躬甚潔用法不無少峻云

陳賓字朝用士名之子天順甲申進士授吏部主事歷考功郎中爲人精密峻厲恒以執法任怨累陞福建布政致仕

陸簡字廉伯武進人成化乙酉領解丙戌進士第三人授編修預脩宋元綱目累陞詹事兼侍讀學士兩典會試號得人學問該博識趣超遠卒于官贈禮部侍郎

張盛字克讓宜興人天順庚辰進士授工部主事佐理河道有功累陞山東叅政爲人廉直負氣遇事少容僚佐忌之左遷福建運同時年老或勸其稍營歸計輒面折之未幾謝病免家才舊屋數楹門人邵賢輩爲之醵金改築焉

讓作謙

李雲字時望宜興人性敦朴篤于孝友登天順乙未
進士初授戶曹改儀部奉職勤恪疏革晉邸息羊
却羌酋進獅三晉以爲美談累陞福建布政年五
十即乞休優游林下二十餘年時與野老談理農
桑雖鄉人亦忘其爲金緋岳牧也

蔣朝憲無錫人少失父母哀慟骨立貧不能葬蓆藁
枕塊者三十餘年邵文莊亟道其行衆爭賻之乃
克葬

周玉靖江人故浮梁令成化初門人戴珊以直指按
江南訪玉玉與媪曝日茅簷下見惠文諦視曰此
戴珊也問何官曰御史呼媪設雞黍留珊珊請割
俸玉辭請治宅又辭後竟無子

芮畿字惟瞻宜興人天資絕人讀書過目成誦爲文
豪邁俊逸登成化丙戌進士官刑科給事中多所
論列弟稷字惟馨亦登辛丑進士官兵科黃門聯
雁一時稱盛焉

張勳字良輔武進人性狷介潛修力學細行必謹先
世以軍功延府軍衛千戶之賞勳應襲以讓其弟

烈正統間以孝友聞明經舉不就成了化間以賢良
舉亦不就有司高其行誼舉爲鄉飲賓者七有詹
成者無子以百金託勲治後事成死勲舉還其妻
封識無改仍爲治材擇地葬焉勲始無子至是夢
成贈之蘭蕙因舉二子人以其爲陰德之報云

陸淵字文靜武進人少力學有志尚爲諸生時遇里
人負錢被逮惻然解衣與之應次入貢同學友以
母老懇讓淵曰吾親亦老然君視吾尤迫卒讓之
既司教奉化有門僕入錢云得之鬻子遽遣還之

淵行率類此卒以子貴贈戶部郎中

薛爲學字志淵武進人成化丙戌進士授御史按荆
襄撫流民請設州縣立衛所宣威布德衆賴輯寧
爭呼曰慈父未幾卒于官爲學歷臺中十有二載
風標峻爽論劄切中貴咸畏憚之呼薛繡衣既沒
荆襄之民皆立祠弟承學成化辛丑進士令麻城
強敏有幹亦以官卒

設綱字憲章無錫人舉成化己丑進士授南京刑部
主事出守廣信移萊州敦尚教化每暇輒詣學集

諸生講論經史竟日不倦念母春秋高遽引疾歸
凡官中外二十餘年囊無餘資性嗜書老不釋卷
所著祠堂攷愚慮州多獨得之見

邵珪字文敬宜興人成化己丑進士授戶部主事累
官嚴州知府性穎拔爲詩文多藻思有半江帆影
落尊前之句人皆稱善因號半江先生

邵暉字日照宜興人成化己丑進士累官吏部考功
郎中敦慎簡浚門無私謁公餘惟靜坐一室而已

子崇以孝聞

田比陵人品記



毘陵人品目八

明

蔣容

卞諲

李震子杲

顧復

李琨

王沂

華山

卜同

胡璉

周磨

繆昌

唐恒

呂卣

尤弼

白圻

莫驄

張愷子琳

胡孝

吳儼

萬盛

邵寶

白坊

王珀

胡華

華津

潘緒子符

設書

吳鳳

吳汝憲

徐紘

高璣

唐貴

顧治

楊文

羅柔

秦金

陳策

錢榮

邵經

華景

湯沐

貢南甫

黃昭史良佐

甫一作安

杭淮

徐問

王奎

惲巍

朱絃

徐淮

錢黼

嚴朔

設縉

邵天和

秦用中

張九方

錢文

子百川

周金

丁致祥

孫翰

胡忠

唐瑤

周衝

顧彥夫

周之禧

毘陵人品記卷八

明

蔣容字德夫武進人成化壬辰進士知潞州藩府軍校恣橫容不少貸王奏徵詣闕潞民隨之訟寃者二千餘人容竟得白改潼川州與中涓忤事多掣肘遂謝官歸囊有餘俸均分子姪先世所遺田廬悉讓兩弟鄉人義之

卞諲字寅之武進人成化壬辰進士為人藺清玉潔眉目如畫父嘗以誣被繫諲方幼日躬操飲食進

之獄家人請代弗聽初授兵部主事以使事經齊魯適大旱疫感疾卒發其篋得疏一通言東方水利荒政甚悉衆咸悲之

李震字時亨宜興人成化壬辰進士任兵部主事子杲字孟寅亦舉進士授南吏部主事震慎重善啟後進杲亦嚴勤敏志於古學父子官俱不顯而卒士論惜之

顧復字德中靖江人事母至孝成化間以貢士赴銓歸省母母強之銓竟以念母死死之日母夢聞哭

聲驚曰噫吾兒死矣以復衣冠置柩上每母慟則躍起覆地

李琨字德嘉江陰人成化乙未進士拜御史按山東兩廣風裁凜然臺臣有冒寵納賄者琨劾免之直聲愈震尋卒

王沂字希魯嶧之子成化乙未進士授禮部主事定錫予四夷重輕之則著爲令憲廟山陵廟祧遷祔之儀多沂草定累遷副都御史巡撫真定裁革苛斂貧困甦息增葺大同諸處關隘寇不敢犯卒于

官沂端方劉介在官三十年持身如一日母吳溺死北河沂在鬻年哀號如不能生每舟過溺所輒慟幾絕所得恩蔭以移其姪其孝友蓋天性云
華山字仁甫無錫人忠樸醇謹平居恂恂而遇事抗直不撓舉成化乙未進士知許州有王僉事子爲大司馬增怙勢殺人法當死上官欲曲全之山免冠籲天卒寘之法許隣徽藩奸民以地獻山堅執不予陞兵部郎中出爲湖廣叅議適楚歲饑發粟賑施不待報可居二年乞致仕歸華爲無姓錫右

姓其成進士自山始貴而能貧亦莫山若也

卜同字從大宜興人成化乙未進士授刑部主事累官湖廣僉憲嘗偕僚友宴集黃鶴樓憲長屬爲賦尊酒間搗千餘言出如泉湧滿座竒之

胡璉字公器宜興人質直好義勵志經學嘗建議革淫祠復岳武穆衛將軍廟增祀吳師古邵材錢即于鄉賢由舉人任新城令陞福宜知州改知歸州所至愛民慎職有古循吏之風焉

周磨字克禮武進人成化戊戌進士任江西萬載以

呂陽人品詩 卷八
劉直忤郡守調福建永春除豪強清逋賦決淹獄
擒巨盜民甚德之歲除齋居庭下忽蛙鳴逐之復
至磨嘿念曰未蟄而鳴其有寃乎因起隨蛙鳴所
之至於馬道傍有井蛙因投焉掘得枯骨有釘貫
其頂悉心推求始得主名寘之法邑人稱快爲作
青蛙記陞太僕丞卒于官

繆昌字廷謨無錫人成化戊戌進士授工部主事奉
勅勘勢家地還民民立生祠于武清出爲山西叅
議遷守遼海歲饒議以平價糶粟于軍秋收糶粟

補官萬口稱便擢四川布政使尋卒昌性寬行和
遇事若不欲忤人意於理或違則崇高不阿人有
不善未嘗斥言但正色對之而人默改庶幾恂
君子云

唐恒字公常無錫人幼喪父哀毀骨立奉母周甚孝
適大雨裂龍山麓水衝父塚恒負土填壅不克又
貧不能遷無何喪母母屬縗謂曰塚陸沉奈何恒
痛母言即以鐵鎖繫項仰天誓曰恒不徙墓不去
此鎖懷憤六年病革親友爭爲脫之恒捫鎖淚下

曰吾解此無以見吾母于地下竟抱鎖死是後山水漸殺墓得不傾巡按御史東郊祭其墓

呂卣字宜中無錫人成化辛丑進士釋褐大名府推官轉衢州永平拜監察御史爲人簡易端確不事生產妻子交謫浩然不顧也卣欲爲其子元夫乞婚邑中巨室莫有願者已而元夫亦舉丙辰進士累官南京通政使

尤弼無錫人成化癸卯鄉舉爲蒼梧令果介自信嘗七疏西南邊務多見施行四宰劇邑竟爲要人所逐居家貧甚以壽終

白圻字輔之武進人康敏公仲子年十八舉成化甲辰進士賜歸娶授南京戶部主事累陞副都御史總督南京倉儲先是叅浙藩有希權貴意請開銀礦者圻列其利害議歲輸代課公私稱便爲山東布政中涓有進香泰山者挾邀重賄圻婉謝不應尹應天時申飭康敏所定役法仍條上便宜七事皆切時弊查核倉儲宿蠹一清以內艱歸卒于家莫驄字曰良無錫人成化甲辰進士授工部主事議

建濟宜石閘歲省費數萬至今賴之有閻篁殺委
官疏寘之法權貴斂戢改兵部車駕郎興藩之國
索車千兩驄損其半爲內侍所訴有詔械繫旋釋
歸卒年四十七驄有至行少孤鞠於季父慶終身
父事之母費安人嗜笋驄從外父官汝宜其地笋
良市之趨而母已逝終身不忍食笋

張愷字元之無錫人成化甲辰進士官兵刑二部主
事爲中貴楊鵬所羅織左遷順德通判歷東平知
州會大璫李興治水張秋所至笞辱長吏吏奔走

餽遺恐後愷徒手謁之大璫知愷廉無所問更加
敬重擢守黎平諸苗感化卒見黜于逆瑾以其勁
節終不屈也瑾誅薦除山西太原知府陞福建都
轉運使以疾歸行李蕭然愷清峭壁立人不敢以
一介溷之居家三十餘年擁書閉戶屏跡公府嘗
有盜夜入其室發篋空無所得嗟嘆而去子琳篤
學有孝行嘗持金市繒遇所親以逋稅受繫卽爲
代輸說者方諸麥舟之義云

胡孝字企參宜興人成化甲辰進士官知府家至

貧篤于孝友父申爲濮州學正性嚴毅每譴責孝
必愉顏婉色以受之父卒于官孝徒步奔喪慟絕
始蘇恩愛羣弟感之如父

吳儼字克溫宜興人操勵清慎居鄉有士行舉成化
丁未進士以庶吉士授編脩久之遷侍讀學士逆
瑾欲與交權不應因摘其試士題爲罪坐黜瑾誅
復起南學士陞南京禮部尚書武宗北幸偕府部
大臣極諫其秉經議禮多合古意卒謚文肅

萬盛字巽夫宜興人由歲薦授九江府推官以公廉
自矢辨釋要囚十餘皆畫像祀之人有過無貴賤
面折不容端方剛直爲儕輩所重年未六十乞休
八十有三卒

邵寶字國賢無錫入生而質直年十八問學於莊定
山先生舉成化甲辰進士知汝州以禮讓爲治入
爲戶部郎歷陞副使提學江西以身爲教士習丕
變宸濠索題咏皆却之後濠敗人服其先見累陞
副都御史總督漕運劉瑾怒平江伯陳熊欲論殺
之饋寶千金俾劾熊寶拒不納瑾怒勒致仕瑾誅

起巡撫貴州陞戶部侍郎以母老乞終養久之陞南京禮部尚書嘉靖初復申前命俱以母病辭特詔予終養一日晨起謁先聖及家廟既退端坐而逝諡文莊寶志行端介踐履篤實一切聲色貨利嬉遊無益之事絕口不言蕭然環堵閤然自修學者稱爲二泉先生嘗曰願爲真士夫不可爲假道學世以爲名言

白坊武進人昂季子領成化丙午鄉薦授兵部司務轉吏部雖世家子而謙厚自持與寒士齒退朝理堂事退堂則闔戶讀書日有課程家居時見族有貧乏者輒衣食之

王珀字廷瑞武進人成化丁未進士授御史巡南城中涓貴戚一時肅然有嫉之者謫睢州判官改知都昌陞瑞州同知南雄知府卒于官睢有二免陰結大盜其跡甚秘珀伺而擒之都昌有讎家殺人匿其屍珀鞠而置之法南雄有權塲漢番諸貨所聚權充公帑守土者率以墨敗珀無所染珀貌嚴肅論議有條遇大事決大疑他人所難者珀處之

昌隆人言 卷八
雙松軒
裕如其材有過人者矣

胡華字惟峻武進人成化丁未進士授行人選御史
初按京師搏擊不避權貴按閩獄多疑滯因感異
夢剖斷中情人以爲神陞廣東副使先是以清牧
馬州場忤權貴其人挾逆瑾焰自廣逮華至京詔
獄罪且不測卒得理還職累陞廣東布政使以母
憂歸數年卒

華津字濟之無錫人成化丁未進士令松滋陞刑部
主事改戶部監通州倉剔弊除奸不避中貴時逆

瑾用事公卿多趨媚之津獨長揖衆慮禍叵測及
津至見瑾于左順門瑾第謂之曰華先生來何遲
盍往事之竟莫能害累陞山西右叅政卒于官

潘緒字繼芳無錫人好讀書能詩秦貞靜開吟社於
惠山結十老會時緒方壯貞靜招之或疑年少貞
靜曰古不有忘年交乎既入社衆皆稱敏性篤孝
痛父蚤世每上塚輒爲泣下母性嗜棗遇嘉棗必
懷歸家世儒醫暇取靈樞素難諸書誦繹之曰此
吾家舊業不忍棄也遂以醫名子符亦稱博洽

設書字子虞宜興人家貧事母至孝歲資館脩以贍菽水母歿每食必奠終其身爲諸生繩趨尺步言簡行恭士林重之

吳鳳江陰人家食貧賣錫爲業晨出必鬻一餅納諸懷中歸以遺母又嘗貨骨簪雜物以給養有一惡少虐取之鳳不與較或曰何懦也鳳曰設吾較之詈及父母其辱何如母亡丐貸以斂蚤夜傭作以償之既葬每夙興拜墓下進餅食如初伐樹枝爲屋棲號墓側歷十二寒暑不變詔旌之

吳汝憲字道卿無錫人朴茂方正言笑不苟邵文莊見而竒之以女婦焉補邑庠生以文不投時見黜文莊言于督學復之汝憲不屑也遂屏去青衿以皂帽常服終其身兄嘗以事繫獄汝憲亦自囚一室藉草食糲一如獄中人勸之輒泣其兄得釋而後出其治家嚴而不苛訓子姓惟務孝弟勤儉以古先賢哲爲楷與人交洞徹肺腑存心不欺無愧屋漏年七十五而卒友人私謚曰貞簡

徐紘字朝文武進人弘治庚戌進士由刑部主事陞

廣東按察司僉事時白沙先生講聖賢之學紘首
式其廬建周元公書院嶺南地連山海吏多不檢
紘發摘奸伏墨吏多望風解綬去陞雲南副使卒
于官

高璣字齊之武進人少喜讀書尤邃心理學論學必
主繕脩說理必本洛閩于伊川紫陽二先生擇其
要語繕寫成帙時之玩繹體驗於事親從兄間確
乎以繩墨自守家故貧處之裕如嘗有詩曰斲蠹
真才子言貧是乞兒孔門多樂地殫力任耕犁弘

治間詔舉經明行修之士邑人交薦之辭以親老
不就郡守敦請爲鄉飲賓亦不赴卒祀鄉賢祠中
以布衣祀者惟謝應芳朱昱與璣三人而已

唐貴字用思武進人家食貧無以爲養至手錄時藝
售之以贍父母登弘治庚戌進士授戶科給事中
寄語諸弟以權利爲戒奉勅稽覈兩廣倉庾諸逋
悉清民亦稱便比其歸名香珍藥一無所携不久
卒

顧治字世叔無錫人少長紛華心厭之避而之溧之

吳時寄居禪宮道院敝衣破履率意去來對人
非故知不出一語性甚孝居親喪哀毀廬墓癯然
骨立能文詞所著有夢言五億九居士傳

楊文字宗周無錫人少嗜學躬耕自給自諸生爲進
士凡業三經靡不精洽司教金華上治道八事入
爲國子監丞應詔陳言深切時弊監有膳餘若干
主者分致拒不受未幾遷長史引疾歸學者稱爲
浚成先生

羅柔字文徽無錫人弘治庚戌進士爲戶部郎出納
明允擢守建寧時流賊竊掠人情洶々柔挺身捍
之賊由他道去爲吏恥事逢迎有貴人督過飄然
拂衣歸入官廿載歸囊如洗徜徉湖山寄情詩酒
貴而能貧貧而能樂柔兼有之

秦金字國聲無錫人弘治癸丑進士授戶部主事中
官外戚競乞鹽引金執奏止之督學河南行部至
封邱流賊奄至逆破之于陳橋歷官副都御史巡
撫湖廣擒斬賀璋廖琪討平彬桂及香爐山諸苗
時中官旨索鯉魚秧督責嚴峻金疏言不可事

遂寢武廟南征權幸橫索金抗辭直奏以一身當
之民賴不擾嘉靖初入爲戶部侍郎尋陞尚書興
獻太后上尊號曰章聖吏部侍郎何孟春等爭之
上問倡者爲誰孟春言臣與尚書秦金等仰戴高
深欲效涓埃之助心惟一理口實一辭無庸于倡
既而冊文頒示金與孟春等俱不赴行禮上切責
會例自陳詔聽其歸後以薦起南京戶部尚書尋
改工部以引年再疏得請卒諡端敏金志在經濟
而守之以正居常恂恂樂易及當職守毫髮不可
奪獎善覆惡薦寵後進人稱長者云

陳策字嘉言無錫人少孝友弘治癸丑進士授戶部
主事遷員外郎中出守饒州值盜發桃源洞單騎
入巢諭降之以洞僻遠奏建萬年縣治縣爲立祠
尋擢福建叅政時汀漳盜起策殲其渠魁蘇世浩
餘黨悉降擢江西左布政值宸濠亂後撫綏凋瘵
民賴以安策平居任直不立崖岸及當大事經畫
周密動中機宜未幾致政歸卒

錢榮字世恩無錫人弘治癸丑進士爲戶部郎以介

執著聲武廟駕自南郊還百官迎道左邏者忽執
榮下詔獄訊鞫無所得乃免時逆瑾亂政榮三疏
乞歸養家居數年不入城府怕文雅人稱長者
其居官大節又凜不可犯云

邵經字孔述江陰人以鄉舉守潞州桑梓蔭城二鎮
負固相攻官兵不能制經單車徒步收之藩藩暴
橫繩以法一無所徇有奸黨十餘輩匿藩府率吏
卒入捕之因檢王不瀆數十事抗章列奏王亦誣
以試題犯上下詔獄窮治無所得釋之既歸貧甚

杜門自守邑令饋之灘田謝不受

華昺字文光無錫人弘治丙辰進士選庶吉士爲戶
科給事中上疏以正君心肅紀綱精選舉杜私門
爲首務至論天下之財聚於大臣大臣之財聚於
內官人皆傳誦己未劾考官程敏政擬昺外補孝
廟親定南京太僕主簿至滁免馬價後輸之罰斥
屬官常例之饋轉寺丞出守韶州清操益勵陞四
川叅政鎮守內臣饋金鉸扇百握對使者焚之復
以重寶咬昺欲市茶西番昺峻却不許遷福建布

政江彬用事部曲四出索貨于藩臬獨憚臬威名不敢肆世宗登極奉表入賀還卒于家

湯沐字新之江陰人弘治丙辰進士授崇德令擢御史按三晉時逆瑾擅政爲其私人道地沐不可遂出爲湖廣僉事尋謫武義令瑾敗以原官督廣東鹽政遷福建副使累遷大理值欽明大獄起上意有所嚮沐昌言不敢縱舍傷平明之治竟免官廷臣交薦不報沐性嚴整閨門之內肅如朝典見鄉曲後進車蓋至其門故偃蹇不出出則自踞上坐

以折其氣有善當獎借則又津之未嘗置也與父老故人班坐痛飲如微時能使忘其貴生平廉潔自喜饋遺皆屏絕故居官三十餘載門第冷落僅有竹莊數畝而已學者稱爲沂樂先生

貢安甫字克仁江陰人弘治丙辰進士爲長垣令擢御史時壽寧侯張鶴齡怙寵驕甚安甫抗章劾之壽寧銜之切骨賴孝宗神聖弗罪也武宗嗣位考功楊子器以山陵事下詔獄安甫疏救兵部劉大夏請老歸安甫疏留時論譴之逆瑾擅政相臣劉

健謝遷相繼引去安甫草疏約同臺力爭瑾怒矯
旨逮訊鎮撫司旋去錦衣獄久之廷杖三發編
戶歸家閹門不入城市瑾誅詔還官屢起再
以薦起山東僉事不三月引疾歸安甫
見正德中時事多不可意每裂眦出血不能
已自念身在外臺不能補拾遂有浩然之志屢薦
卒不起居家以孝友聞同時與黨籍者主事黃昭
御史史良佐皆同邑人

杭淮字東卿宜興人弘治己未進士授刑部主事提
學雲南故事沐府秋祀藩臬以朝命主祭翌日沐
祀請陪淮曰昨君命當往今私祀何陪焉遂不往
累官至中丞廉平明恕以志節聞牴牾當道遂解
組歸倡詠于泉石者數年累推不起所著有雙溪
集

徐問字用中武進人廉介好修弱冠登弘治壬戌進
士除廣平府教官召爲刑部主事歷郎中值權倖
縱橫問持法屹不能動出知登州調臨江以方畧
擒獲大盜數百人尋遷長蘆運使轉廣西叅政累

遷廣東左布政適遣中使採珠不中程御史欲下
令責諸賈問曰珠有禁不趨賈爲盜耶事得寢問
亦坐是受部叅賴天子聖明不問無何入覲以廉
受上賞尋撫貴州夷俗獷悍喜相毒噬問建貴陽
書院祀濂洛關閩諸賢羣多士而訓誨之夷俗漸
歸禮讓擒獨山土酋賜璽書褒勉尋陞兵部右侍
郎自謂於學問未有豁然處因請告歸棲遲芳茂
山下潛思力究凡十年起南京禮部侍郎進南京
戶部尚書甫數月復乞歸登第四十八年家無長

物田不滿百又割以贍寡嫂其學以紫陽爲宗窮
理致知爲入門敬義直方爲實際滌除習氣爲工
夫恬退廉潔則其天性也所著有讀書劄記山堂
萃稿卒諡莊裕

王奎字文明武進人弘治壬戌進士授行人選南道
御史陞江西僉事在南道時有二重獄皆已誣服
奎皆得實立爲平反江西德興尹貪墨奎將按之
其人懷百金求貸奎怒斥之卒按其奸既勦桃源
洞叛寇俘馘甚衆餘黨悉從撫諭民德之爲立生

祠

惲巍字公甫武進人弘治壬戌進士由戶曹歷湖廣兵備副使嘗王文成用兵在武昌討擒叛魁趙燧中丞毛伯溫薦以自代閹瑾索賂不遂削其功罷歸所著有東麓存稿

朱絃字廷和無錫人弘治壬戌進士知臨海縣擢御史出按貴州貴士俱就試雲南絃請兩省分試詔從之以抗直謫判福宜轉長泰民爲建祠累陞雲南府同知代府長史致仕

徐淮無錫人以貢爲上高訓導贄物一無所問貧者顧有資焉三檄之署縣皆辭母病乞致仕御史重其去淮固請而歸邵文莊爲之志

錢黼武進人以貢選冀州判官主辦內府薪炭時權奸挾勢乾沒主者率徵禁被害黼棄官歸爲人別直人有過必面折之先與吳學士仁夫輩立社講學至是與邑中士大夫家居者相追隨黼歸窳先年又窳高士大夫皆推尊之贈以詩歌題其卷曰高尚

嚴朔無錫人少失母依祖母周以育祖母病夜輒焚香額天求代祖母尋愈人皆稱其孝祖產不及中人其兄意在兼收朔甘以教授養祖母一毫無所折人皆稱其悌竟以貧老

設縉字朝章無錫人早歲即厭章句留心聖賢之學謂不離言動倫物者是兢。置力焉每臺使者行部必謁其廬所著荷橋子皆篤實力行語也

邵天和字節夫宜興人珪之子正德乙丑進士由庶吉士授吏科給事中劉瑾擅權屢差勘問外官旋

差查盤河東鹽課俱無所賄瑾銜之謫判曹州復嗾御史劾其受平陽府饋捏旨削籍瑾誅事白晉符丞歷陞雲南副使所至以清白稱卒于官

秦用中字擇之無錫人生而穎異日記千言長攻古文詞以貢歷官泰順教諭自免歸才望重于一時與莊定山李空同諸公倡和有西湖浙游二集

張九方字應臯無錫人領鄉薦授汝寧推官不畏強禦當路忌之棄官歸售文自養買舟名浮莊往來梁溪之上娛情泉石積月忘返有覆篲歸田等集

錢文字章靖無錫人生稟異質爲邑諸生累舉不第
刻意於詩所著有希齋詩子百川字東之亦能詩
所著有寒齋稿

周金字子庚武進人正德戊辰進士拜給事中陞太
僕少卿都御史爲人警敏潤達不爲拘謏詭激都
督馬昂納女弟于後宮跡疑李園金請誅昂而黜
其女女竟黜凡軍國要機金陳利害悉中機宜如
議狼山擒寇功及復哈密事者以數言而定先是
宣夏甘肅相繼告變帥臣多懷危愆金至開誠信

用寬簡以收士心大同殺撫臣宣府圍帥府幾于
激變金皆從容諭以利害衆歡然叩首而退金之
應機定變類如此家居八年起撫保定總淮漕會
章梓宮南祔諸護行者畏江險將從陸金力諍山
險甚于江卒由江行如期而葬沿江千里皆受其
德官至南京戶部尚書

梓宮字上脫一聖字

丁致祥字原德武進人年纔五十始以儒士舉登正
德戊辰進士授戶部主事漕舟自江達淮途中多
滯致祥督漕議復儀真廢閘歲省費數萬運以通

達累陞河南布政司叅政以老乞致仕歷官三十餘年囊無長物惟題詠篇什甚富孫勳落拓不羈亦有文名

胡忠字企周宜興人正德戊辰進士授戶部主事爲人不脩邊幅入官儉素一如寒士累陞廣西叅政會劇賊王鏐土官岑猛負固戕殺守臣勢甚猖獗忠攬轡就道七日王鏐就擒岑猛遁匿廣西平擢都察院副都御史鎮守延綏致仕

唐瑤字國秀貴之子由鄉舉選信陽知州累官永州知府居官以惜民財重民命正風俗爲急信當孔道裁革煩費永多客戶富室有孀則客戶強納爲室瑤斃其一二魁傑孀始得安自以不能事父養母痛心恨慕取詩有懷二人之義以自號信陽諸生有制終廬墓者造其廬永州屬吏有母年八十以離憂剪髮寄者其人居官如常力請黜之其篤厚正直欲人同歸于善類如此先世遺田三百畝屋一區歷官四十餘年無所增益鄉人稱之無異辭云

周衝字道通宜興人齡年以孝聞雖甚暑至母榻不敢裸體稍長从仲兄衢授尚書篤志於學正德庚午領鄉薦司訓萬安擢應城令以德化民民爲立生祠以耳疾改邵武教授尋遷唐府紀善王世子以讒間衝動以至情王感悟愛世子如初久之聞母訃一痛而絕學者稱爲靜庵先生

顧彥夫字承美無錫人正德庚午鄉薦授太常寺典簿累任宣波府同知所至以廉能稱署慈谿縣篆民爲立生祠及清清堂俸餘悉以給親族卒之日

貧無以殮

周之禧字子敬靜庵公從孫嘉靖乙卯舉人爲太康令生平不識機心械事性鯁直不善諧俗落職還里與相知爲真率會談學砥行人謂靜庵公不以云孫延儒萬歷癸丑會試廷試俱第一

毘陵人品目九

明

毛憲 孫中孟 葉夔

蔣亨

龔大有

吳閻

吳仕

梁幹

臧宗善

胡憲言

蔣同仁

喻義

顧可久

周振

呂朋

吳玘

蔣舜民

吳仲

楊淮 華鑰

曹珂 子景賜
孫司宰

陳彝

曹卿

孫鑾

龔大稔

惲釜

張袞

浦瑾 子應元 朱得之 弟庶 劉乾

華金孫敬夫陳周子鳳徐玩萬吉

程飛卿董紹子士弘侯祖德唐音子一

邱鏊唐順之黃正色張選

王表子立道薛甲薛南吳元

潘松周仕段鏞俞紹祖

王忱陶澤薛應旂子近吳性

蔡元銳弟元鐸浦劭弟濬陳阿皮高材

王問萬士亨萬士和周螯

華雲

毘陵人品記卷九

明

毛憲字式之武進人自幼性端重寡言中正德辛未

進士拜給事中疏論大臣怙勢為姦利者數人內

外肅然武廟西狩儲嗣未建舉朝諱不敢言憲獨

懇疏不報比回鑿有彩幣賜近臣憲疏辭不受因

謝病歸與同志講求理學學者多尊師之稱為古

庵先生憲立身治家悉有規格歲時祭祀一遵家

禮置義田以贍三族與人交情義懇至於死生患

難尤篤所著有諫垣草古庵文集毘陵正學編人
品記孫中孟歲薦司訓孝友伉直有祖風

葉夔字司韶武進人力學好古甘貧守正正德末歲
貢京師值武廟南幸貽詩以諷當事授汝陽司訓
世廟登極議大禮夔亦有繼統不繼嗣之說永嘉
聞之走書邀夔夔笑不應會繼母年高乞歸當事
不允夔投牒而去宋末死事諸臣未秩祀典奏記
當路建祠祀之慕謝子蘭之賢作景賢錄葺其墓
爲置祀田嘆人心不古自號古心已復號存齋病

革猶手書謝上蔡人能操無欲上人之心數語云
此心學之要也子金以乙科官別駕亦有父風
蔣亨字元貞武進人正德辛未進士爲南臺御史武
廟北巡亨抗章請回鑾建儲甚切三上皆不報庚
辰駕南幸駐留都伏行在以死爭人咸危之亨弗
爲動陞河南按察司僉事忤時貴遂謝事歸亨以
風節自持沉靜端毅謹守先業一無增飭其清白
尤罕儷云

龔大有字士謙武進人正德辛未進士令廣平清內

監奸胥之蠹選南京御史值宸濠之變車駕南巡復將東下人情惶懼臺諫將具請回鑾一御史當爲首胸縮畏禍大有銳然具疏上之不報既而論吏部尚書喬宇頗著直聲後中以考功法請以原職致仕

吳閻字朝言武進人正德辛未進士授行人選監察御史慷慨論事選司通關節閻劾去四人都御史陳金謀復入院閻率全臺劾止之又數論奸邪蠹政歷數錢宜谷大用等之罪值考課有讎閻者嗾宜奸也

吳仕字克學宜興人爲人劉重有廉隅正德丁卯鄉試第一登甲戌進士授戶部主事改禮部歷山西福建廣西河南四省督學設科條抑徼倖評隲文藝衡鑑甚明偶有忤于當事輒引疾去門鮮俗賓與二三高賢觴咏於石亭林泉間陶然樂也

梁幹武進人正德丁卯舉于鄉仕湖廣竟陵知縣平生方正自持後進从之游多所成就居官以廉能

稱祀名宦見竟陵縣志

臧宗善武進人自少攻苦食沒以清節自勵貢爲扶溝訓導乞歸受徒講學饘粥不給裕如也

胡憲言宜興人以貢授合浦縣丞居官廉介不苟郡守張嶽負海內望顧獨重之令數如毀不爲動俄令以墨敗守將廉其邸令陰橐寄憲言憲言爲護還之封識宛然令始悔泣守因屬憲言攝令固辭遂乞休仕

橋當要道隨造隨圯振以石柱爲之屹不動人皆

利涉以振晉陵人名晉陵橋前後爲縣八年俸入
悉代貧民輸負囊篋蕭然兩縣民立祠祀之陞雲
南巨津知州未及引年而退性最孝事兄如父聞
兄謦欬雖在別室必起立振一子兄五子析箸爲
六尤人所難也

呂朋字志同武進人中正德丙子鄉試歷官廣東市
舶司提舉爲人廉潔恬靜一介不取歷官幾二十
年家不增一椽一壠受旌薦者十餘章終回翔州
縣冗散之秩而已

吳玘宜興人正德丙子江西有寇僭號稱亂勢甚猖獗玘時爲贛縣主簿勇于赴鬪遇害事聞贈知縣錄其子入太學

蔣舜民字虞仲江陰人正德丁丑進士初任新豐有惠政其所創均田之制至今戴之累陞浙江僉事生平不喜曲事上官及與物接驩如也

吳仲字亞夫武進人正德丁丑進士令江山召爲監察御史劾武定侯郭勛不避權惡主議濬通惠河竟底績戶部歲省運錢十二萬緡今河上有吳公

祠

楊淮字東川無錫人正德丁丑進士授戶部主事監出納與中官共事釐革積弊在庫自一茗外悉爲峻却嘉靖初將升興獻主於廟淮抗疏力諍衰經執杖號慟闕下上震怒執送詔獄杖于廷時同邑兵部郎中華鑰亦同被杖而淮竟病創死年才三十八隆慶改元贈太常少卿

曹珂字國用宜興人古貌古心有隱行舉正德乙卯鍾孝二親連蹶禮闈不復應舉曰吾蚤年不能祿

養今豈可以祿自養耶末年選授都察院都事卒
子景暘字子升爲人端慤舉嘉靖乙卯知金州丞
西安有古循吏風孫司宰字伯卿舉隆慶丁卯令
肥鄉潔己愛民官至南京刑部郎中益不愧其祖
父云
陳彝武進人素擇交寡諧非其人
不友少與葉司韶
毛式之輩結社講學深究弗怠爲人樸直劉介好
惡甚嚴以貢上春官自以爲老竟拂衣歸

曹卿武進人正德乙卯舉人以親老就選授温州府
學訓導陞樂清知縣蒞事公勤御史嚴飭尤廉介
不苟取邑有巨猾莫敢誰何卿卒致之灋一邑稱
快以憂歸貧無以給也服闋赴部卒于途

孫鑿字朝望武進人正德辛巳進士授刑部主事出
審楚囚多所平反守漢中脩堰溉田民獲有秋化
墨吏逮貪帥人皆帖服會有銜之者左遷徵江抑
豪祛弊爲之益力陞雲南副使括羨賦節浮費陞
山西行太僕寺卿歸鄉人或侮之悉不校人謂其
居官以剛介著居鄉以長厚稱而廉儉之操則進

退如一云

龔大稔字士登武進人正德辛巳進士授戶部主事陞廣東僉事吏部尚書方獻夫家居侵奪鹽利籠絡貨權詹事霍韜以劄狼翼之受獻殺人有司不敢問大稔抗疏數其罪會方霍皆召入誣以他事勒致仕行至中途復有旨逮訊杖闕下黜爲民憚釜字器之武進人正德辛巳進士初知安陸州復除均州擢南戶部郎調吏部出守溫州其在安陸也獻陵更制董役者皆中官釜御之以禮法不敢

恣橫會歲饑發倉賑貸上聞以酒勞焉亦異數也既守溫與永嘉忤典選者陰用計調成都溫人以十善頌之會釜微有足疾遂稱篤不赴

張袞字補之江陰人正德辛巳進士選庶吉士改御史復召入翰林爲編脩累陞侍讀學士掌南院太常卿掌監事以頒歷諸生失儀降南京光祿卿遂致仕歸袞在翰林十四年值世廟稽古考文明大倫正大祀袞皆與議間有不合輒具奏聞未嘗阿徇上亦寵眷奉天殿成召袞入殿親授之勅無逸

殿成又召衮賜宴幽風亭亦遭際之盛云先是議禮諸臣逮繫左右無敢申救獨上疏請釋久之獲解此又衮之風采氣著者也性孝友所遺先業悉讓兩弟居鄉循一名檢脩江陰縣志簡而有法浦瑾字文玉無錫人博瞻有文登正德辛巳進士授麗水令尋卒子應元見父病劇日夜哭泣禱神請代竟不起遂自經以殉聞者哀之處州守黃體行爲作孝子傳

劉乾靖江人初官戶部勤廉公明忤逆瑾逮繫不屈選改武選釐正選格請託不行陞光祿寺卿陳言二事其一以勾稽往牒立條例慎出納其一以額辦煮醪歲輸費數萬請移北寺爲便詔從之乞致仕賜葬祭賜上脫一卒字

朱得之字本思靖江人從陽明先生游究良知之旨泊于榮利爲桐廬丞歸閉門讀書鬱有著述弟庶之丞東陽亦以長者稱

華金字子宣無錫人正德辛巳進士郎戶部不附權貴歷官天津副使不能屈節上官遂乞致仕金事

父母甚孝待庶弟友愛平居無妄言誠行初舉于鄉例得免糧役金請受役如故既第例當入朝候疏取旨送科他進士未暝即散去金於中夜猶莊坐以待俄而邊警至金猶候命世廟以爲賢召至宮出上方供勞之太宰陸完夫人金之姑也金竝官京師足不及其門完敗金爲恤其孤張孚敬驟貴用事金爲同榜邂逅于朝張曰華兄獨不能與吾共事乎金正色曰公爲相當以天下爲度乃私其同年耶張慙而退家世雄于貴自金成進士產日挫諸孫析箸兄弟交讓鄉論美之有孫敬夫甘貧尚志竟以貧死

陳周字文美嘉定人徙居無錫正德辛巳進士授戶部督漕船奏蠲閩浙逋稅周議欲開引鹽鹽商入賄以請周輒閉之曰引固欲開賄而開不可也遂出爲河南叅政行部得穴金檄致之庫代償負官租者汝民德之建却金亭周王侵民田周復之王欲折辱周不爲屈王無以難居無何病卒子鳳能詩有隱操

徐玩字味道武進人少知檢束于儒先格言錄之成
帙母歿父構危疾熟讀軒岐諸書起父于沉痾就
養無方從兄弟六人視之如同胞撫孤壻如子教
二甥如孫恂二樂易人未嘗見其疾言遽色至義
利所在介然不淆有司以筆札召輒辭曰秀才若
處女不當輕與有司接其自重如此既以貢當就
試禮部玩不赴曰吾父在吾出而歸稍後吾父倚
閭矣奈何以既衰遺體跋涉三千里博一官也自
是深居簡出讀書教子于治家處世省心養身確

有成規人皆稱之爲長者云

萬吉字克修宜興人爲人方嚴劉峻望而知其爲莊
士平生以禮義廉恥自律事父母孝弟病與共寢
食至老未嘗異錢帛吉面目清冷對人少寒溫語
然久與之處真意溢出發如也學者咸尊事之稱
古齋先生以貢爲桐廬令訓導夙夜勸課深明義
利之辨諸生皆知振拔未幾乞致仕歸

程飛卿靖江人能詩首霜蕭然不喜干謁羣偷入其
室東之薦中猶毅然曰麴生我所嗜可勿將去

董紹字宗遠武進人嘉靖癸未進士爲人真率不尚修飾令新昌邑倣俗薄前令多以賄敗紹至悉繩以法亦嚴以自治邨中所需一切取辦于家入覲誤携一銅缶行三百餘里叱還納之庫其廉慎如此子士弘亦登進士守興化有能名侯祖德字繩武無錫人生而愿慤嘉靖初以太學生丞浙之新昌擢尹江山以廉幹聞適吏部南海霍公應召至京所在咨訪聞祖德賢擢太僕丞項之以母老乞歸門庭簡寂出必徒行蕭然布衣也

唐音字希古武進人性獯介于義利大閑不待學而辨聞鄉先生毛古庵講學里中輒造其門魏莊渠先生談道於吳時音已領鄉薦當對公車竟謝不往赴吳受業讀書必反覆玩索推見古聖賢之心即兩先生言未愜于心必明辯審思期于有得而後已就選廣平雞澤縣實心幹理未嘗以上官意指爲趨向學使者至廣平諭諸士曰諸生欲爲聖賢學雞澤令即是其見重如此後卒于官無以爲斂諸監司厚賻之其子一磨辭不受一磨字仁甫

登嘉靖乙丑進士有邁往拔俗之韻雖不竟其用
蓋無愧其家風云

邱鏊字朝洪武進人宋文定公密後性簡伉而才甚
高視天下人多齷齪不可語視天下事率瑣尾不
足爲爲古今文辭必人所不經道語年十二喪父
與弟鏊廬墓三年年二十八登嘉靖戊子鄉薦家
日窘假資脩脯以養又假學醫俱以懶罷三上春
官不第棄去制義日坐小亭殘竹數竿遺編數帙
環堵缺不治久之選山東宜陽教諭一切饋遺辭

不受士甚德之不久病卒貧不能斂兵備史某贈
之金乃克棺衾以歸唐中丞割田爲治墓乃克葬
唐順之字應德瑤之子弱冠舉嘉靖己丑省試第一
楊公一清奇其才將魁廷試索所對策不應置二
甲授兵部主事丁內艱起補吏部尋改翰林編脩
時永嘉當國稱病求去勒令以主事致仕既而簡
宮僚起補春坊司諫與贊善羅洪先校書趙時春
疏請正東宮朝禮忤旨罷歸杜門謝客砥節甚嚴
日從山中游或趺坐竟日冬不爐夏不扇行不與

臥不裊衣不帛食不肉備嘗苦澁曰不如是不足
以拔除欲根年垂五十恍然有得曰此心天機活
潑自寂自感不容人力吾順此天機而已四方學
者翕然尊師之稱爲荆川先生會倭入犯東南騷
動有以邊材薦者起家兵部勅視薊鎮邊務復視
師浙直有功陞太僕少卿尋擢撫淮陽驅馳南北
竟以是病行至泰州自度不起進諸將士曰死國
吾志也良死舟中幸矣遂卒公材高意廣包絡今
古於書無所不讀自六經諸子以至甲兵錢穀象

緯歷算陰陽小技無不研究其文辭足以擅名一
家所著有荆川集所輯有諸儒文要語要儒編左
編右編文編釋編等書

黃正色字士尚無錫人嘉靖己丑進士令仁和香山
南海所在稱神明南海霍文敏爲正色座師霍氏
有犯一繩以法文敏以爲賢擢南臺御史首論兵
部尚書張瓚武定侯郭勛士論躉之章聖皇太后
梓宮還葬承天護從荆山侯崔元巨璫鮑忠怙寵
黷貨正色疏列不法狀忠等誣正色于梓宮前乘

馬上怒下詔獄賴文敏力救得戍遼正色即囚服
荷戈趨戍幾三十年未嘗離伍隆慶初復原官歷
陞南太僕卿致仕歸杜門謝客觴咏自適卒祀遼
陽三忠祠

張選字舜舉無錫人嘉靖己丑進士令蕭山仁恕廉
明召爲戶科給事中上遣勳臣代太廟祭選抗疏
諫上震怒廷杖八十三折其梃選從容曰吾不懼
死不可使天子有殺諫臣名已編戶家居謙約退
讓聚諸生說經如貧時隆慶初復原官陞通政司

叅議致仕

王表字邦正無錫人嘉靖己丑進士選庶吉士除戶
部主事乞改南得禮部以病自免歸部使者屢薦
不起表爲人潔脩寡合平生無他好願好讀書竟
老不倦所著有讀書記要代奕稿等書若干卷子
立道亦舉進士選庶吉士授編修未四十卒性行
方介類其父云

薛甲字應登章憲子嘉靖己丑進士授兵科給事中
指斥方士忤貴溪謫湖廣藩幕累遷四川僉事復

以忤分宜免歸平生殫心理學多所發明間取象山陽明遺書參伍之有所得所著有易象大旨四書口義等書

薛南字圖南武進人有志于學遍遊四方謁諸聞人
歸益深造學者多從之游性孝友盖亦篤行君子
也

吳元自無錫徙居武進爲人長厚好施邑大水民多
溺收遺骨千餘瘞之大風雪過養濟院摧頽諸警
者凍露揮金建房一百餘間歲歉出穀千餘賑濟

設粥捨棺頻歲不恠郡守趙兌以尚義旌之

潘松字惟喬宜興人篤于孝友外嚴整內不設城府
由舉人授任邱教諭生徒貧而有志者捐俸館穀
之擢新城令性端方不便承迎乞改教得福州率
勵鼓舞視任邱有加焉當道嘉其醇正優以禮貌
稱師範者必曰後齋先生

周仕字君可武進人司徒金之長子用蔭起家累官
高州守以清謹稱陞苑馬寺少卿連章乞休始仕
欲以蔭讓弟司徒不可將析產仕以同居之義泣

辭之既而仕舉子三弟偉舉子七咸得取給莫爲
紀綱家日落親識勸之析仕不得已哀慟累日告
祠以食言爲罪欲以子姪十分之司徒不可析爲
二仍割所受以益諸姪不失初意云
段鏞字子宣民之曾孫爲人孝友剛直父病疽鏞輒
爲吮母病目鏞日爲飴姊負官責鏞傾囊代償館
鄉塾教法甚嚴與人交不能容人過以嚴見憚然
其中豁達無他腸也

俞紹祖無錫人父貫病癱不能行倭至紹祖負貫竄
匿倭欲殺貫號哭請代殺紹祖貫得免倭去遇老
僕負婦鄉人憐紹祖葬之曰孝哉不愧蒿庵矣蒿
庵者俞鎧號有孝行紹祖之曾祖也

王忱字信卿武進人蚤失怙家貧授徒自給既壯古
貌虬髯繩趨矩步論議疊々初應郡試或譏其鬚
即趨出棄制舉構一室左右圖史考正五經六書
四聲字韻一本許氏說文稱爲精確史傳紀年朝
代名字上下數千載間歷々如指諸掌一時有道
之士咸樂與之游忱亦陶然自得也

陶澤字子沾武進人豪爽負氣能文章與薛應旂齊名爲諸生有司召弗往貢入國學司成亟問之亦不私謁既舉應天再試禮闈不第杜門詠歌不爲干請以貧終

薛應旂字仲常武進人嘉靖乙未進士令慈溪與知府鄭不合乞改教得九江主白鹿書院歷遷南考功郎掌內記計分宜憾給事中王燁令尚寶丞諸傑貽書囑以黜燁應旂留燁黜傑被劾降建昌通判歷陞浙江提學副使以過執忤時調陝西兵備

未幾罷歸應旂骯髒拔俗爲文亦磊落所著有宋元通鑑憲章錄浙江通志等書子近魯內行淳備以居喪過毀卒

吳性字定甫宜興人徙居武進性端介舉嘉靖乙未進士乞爲校官得南陽卓有師模陞南京戶部主事改禮部兵部數請告補北則乞南以恬退受知當事改尚寶司丞再疏乞休得致仕歸舉進士二十餘年服官不滿兩考其志尚可知已爲人不尚迂諉不採虛譽奉先之孝教家之法事事有古先

正風子可行中行俱進士官翰林諸孫科第蟬聯
不絕

本縣志

蔡元銳無錫人與弟元鐸肩其父升諸屋以避倭銳
爲賊所執殺諸途鐸以父免未知銳死也明日持
重貨往賊營贖兄併遇害事聞旌其門曰孝友
浦劬字成德無錫人島夷至繫其父去劬與濟弟謀
往代途遇他夷劬遽前稱父狀貌問安在夷怒遂
殺之明日父歸又浹辰弟歸父收劬骨葬之而立
木主于床頭每出入必呼劬曰俾兒知老人無恙

也萬歷丙辰詔旌

陳阿皮無錫人早喪父食力以養母母死鬻身營葬
嘗墮水渙者網之得不死人謂孝感所致

高材字克甫無錫人嘉靖辛卯舉人令黃巖以鋤強
扶弱爲事尚書黃綰家暴橫其僕至縣亦以賓禮
人皆扼腕材執法無所徇民皆稱快又有顯者奪
民山田民訟之材批牘尾曰一片青山一片金百
年人有萬年心鴻溝未必常爲限倏忽浮雲變古
今踏遍青山山轉我問山不語奈山何若無山下

累二塚料得爭山人更多其人慙而還之巖有奸
胥作清軍偽冊材摘發杖殺胥巖民立祠祀焉孫
攀龍萬曆己丑進士

王問字子裕無錫人嘉靖戊戌進士授戶部主事念
父年高請改南便養尋轉廣東僉事行至桐江遂
投劾歸父卒退居湖上屢薦不起善行草并點染
山水人物脩然翰墨蹊徑之外人爭購之

萬士亨字思通宜興人吉冢子少奉父訓規行矩步
不失尺寸嘉靖辛丑與弟士和同舉進士授戶部

主事轉吏部操履清嚴聞父訃水漿不入口踰五
月以積毀不起遺命以衰經殮家人從之

萬士和字思節宜興人吉仲子幼承家學有必爲聖
賢之志舉嘉靖辛丑進士選讀中秘書閣試數冠
其偶例得史職居恒與閣臣落二遂不得留當得
省垣辭補禮曹旋請改南得職方會母病遂棄官
歸服闋起南車駕調儀制出爲江西僉事久之由
督學漸歷廣轄遷南京北以副都御史督南儲轉
少司徒改少宗伯會新鄭用事意有所不可遂自

免江陵柄國循物望起爲大宗伯比至謬爲引重
朱成國薨求封王江陵受其重賄士和謂非高皇
帝約持不可又有大璫爲方士乞醮壇供奉士和
復持不可皆與江陵忤甚銜之給事中余懋學直
言褫職士和謁江陵江陵度其有匡救一揖徑出
士和故緩行謂江陵曰近日處分得無太甚江陵
色變遂謝病歸士和居官四十年凡可退以明志
辭以明節未嘗少有遲回而家居之澹泊里居之
遜讓皆忍人所不能忍性鯁直不輕諧俗特其外

貌和平人鮮知之嘗自言吾爲兩司始知實心任
事卽爲真才又曰吾仕廣于人無苟取始識得一
廉字皆真實不誑語也卒謚文恭

周慤武進人嘉靖辛丑進士爲諸生時道逢一媪以
衣質錢爲人所給輒以襤衫質而與之歲祔家人
苦饑慤持課金歸道遇死人輒買棺瘞之其好施
如此累陞登州守以憂歸囊橐蕭然猶儒生時也
華雲字從龍無錫人嘉靖辛丑進士授戶部主事權
稅九江潔己無所染請改南得兵部尋陞刑部郎

中再疏乞休雲駕倫嗜義出于天性晚歲做范文
正公捐田千畝以贍族立義莊肖孝子像其中邑
有五賢祠廓而新之增祀李忠定邵文莊名七賢
築真休園日優游其中或偕同志放舟溪墅悠然
自得古賢達之風焉

毘陵人品目十

明

尤瑛

蔡瀛

王堯卿

李魁

鄒夢桂

曹三暘

子司
勳

劉光濟

惲紹芳

金九成

邱緯

施陽得

殷旦

曹驂

黃鑿

子道
黃憲卿

吳可行

萬鵬

汪汝達

祝舜齡

趙與治

張邦定

鄒駮

孫一元

孔永芝

史元鎮

華啓直

陸南陽

徐常吉

王敬之

蔣致遠子良

史文龍

邵秀孫

陳一麟

劉昌祚

常守文

王鑑

胡濤

周子義

王升

吳中行

趙用賢

秦柱

楊德

錢焜

俞霑

顧憲成

顧允成

錢一本

王就學

張汝治

吳瑞登

許世卿

蔣士元

子弘

薛敷教

張納陞

鄒學孟

丁天毓

補遺

馬應龍

唐大卿

蔡模

褚國祥

路雲龍

毘陵人品記卷十

明

尤瑛字汝白無錫人卓犖有大志舉嘉靖癸卯鄉試
第一人登甲辰進士嚴分宜聘修家譜不就疏請
教授杭州稍遷國子監丞俱以廉靜文學稱進儀
制主事大清藩府之賄尋陞廣東僉事屢擒大酋
分宜假子饒相父私通山海寇分利瑛過梅嶺即
饋珍寶無算斥去發其奸抵大辟陞江西叅議道
卒廣民巷哭立祠祀焉子鏜以國子生選邛州判

不赴

蔡瀛字汝登無錫人家貧甚篤志好學刻自砥礪引繩而趨不失尺寸領嘉靖癸卯鄉薦錫令自下車之始一交拜無由再通聞問矣

王堯卿武進人豪爽自負以貢授鄱陽訓導陞武涉知縣恤窮辨枉節用省刑謝絕饋貽蠲除苛罰上官嘉之百事攸萃竟以勞卒于官疾革有羨餘百金仍命計吏登之籍乃瞑

李魁宜興人性篤孝父得心痛疾剗股肉和藥以進或言惟蠅可愈遍求弗獲一日至東橋忽一蠅伏不動魁喜携歸烹進之病良已又兩月父別感風疾而卒

鄒夢桂字汝丹無錫人嘉靖癸卯鄉薦少孤發憤自立不與俗浮沉祖遺負郭田悉讓弟而資館穀以自給屢上春官不第卒

曹三暘字子泰宜興人嘉靖甲辰進士授大理評事分宜以桑梓善郡邀厚賂不可卒補劇郡既巡撫滇南新鄭嘆其厚于華亭以考滿不合例竟罷歸

尋薦起官至南京工部尚書江陵奪情廷臣皆具
疏留南六卿獨無疏則趙錦主之三暘贊之也子
司勳字應麒隆慶辛未進士溫純恬雅官至布政
三暘當蔭子勳與其弟司直尤稱克讓云

劉光濟字憲謙江陰人爲人博大寬厚不自峻崖岸
然中實井井登嘉靖甲辰進士爲戶部郎適北虜
薄都城廷議遣郎一人餉大同勤王師諸曹郎昨
舌不敢往光濟奮然請行人咸壯之出守衛輝歷
江西叅藩會南贛旱民聚衆競水相殺傷撫臣以

變聞詔發兵掩捕光濟請往諭之立解散全活二
千餘人遷太僕卿巡撫江西定賦役一條編法著
爲令迄今各省直皆遵行之召爲南戶部侍郎尋
改吏部遷南兵部尚書以不署保留江陵疏乞休
歸觴奕對客酒德溫然人以王會稽白香山目之
以嗣子爲人所構邑而卒

金九成字鳴韶武進人嘉靖甲辰進士爲人寡言笑
不妄交遊爲吏廉介不受私謁初令定海銳意興
革增葺捍海堤至今賴之號曰金公塘邑資海舶

奸商勢家因之爲利力爲禁革忤要路調章正不爲少挫剗奸弊杜請託陞主事歸病卒九成居官十年妻子不免藜藿病且革會有富家求釋罪以千金爲賄九成不可郡侯自抵其榻撫之曰獨不爲妻子饕餮計乎九成曰我躬不閱遑恤我後而壁臥不復語郡侯嘆息而去因捐俸助其葬弟九臯恂禮讓尤稱友愛以貢爲武康知縣盡心民事人咸誦之

惲紹芳字光世武進人嘉靖丁未進士授刑部主事

累陞福建叅議性坦易豁達喜讀書過目輒成誦刻意爲古文詞自成一家言有集

邱緯字世章武進人嘉靖丁未進士知侯官有清節銓部計吏以緯爲第一召入以強直固守補南京刑部主事出守南陽貽書家人曰汝輩勿覬我位高祿重望豪侈也吾即死不易不三月卒于官

施陽得字復徵無錫人性恬雅家庭以孝鄉黨以誠操持以廉人多稱之舉嘉靖己酉鄉試授蘭谿縣學教諭陞富陽知縣戶部主事

殷旦字文東無錫人嘉靖己酉鄉薦簡亢方嚴言笑不苟有子試郡縣絕無干請居喪循禮人咸稱之曹驂江陰人博學好古有志節父嘗爲分宜令識嚴相國于童子時既得柄思報德每召驂謝不往又善詩賦曠達不羣樂振窮乏頗信方外服食一日浴竟體軟而卒

黃鑾江陰人嘉靖戊申首捐金六千兩築城後倭亂前後輸粟一萬石爲兵儲趙文華討倭責諸富人助軍興鑾復捐金七千兩牒鑾爲蘇州衛指揮使

萬歷間邑父老請立專祠祀之子道字吉甫任俠有父風

黃憲卿字弘度武進人嘉靖庚戌進士爲戶部郎清聲蔚起九載不調或勸之謁相嵩憲卿曰吾嫠婦也忍塗面目以取榮乎卒不往嚴氏敗始擢憲副江西年纔五十絕意仕進大都以清謹持身以儉約持家云

吳可行字子言性長子嘉靖癸丑進士選庶吉士授檢討讀書一目五行以文學著名高視一世無有

當其意者人皆忌之竟以是罷官天性孝友復落
拓不善治生產即千金立盡不問也喜堪與家言
爲兩親卜葬地不憚屢遷謂術者曰但使吾弟姪
受福蔭長房虧損勿論其存心仁厚尤人所難及
云

萬鵬字汝南武進人端方峻整孤立行一意言動取
予必稟于繩墨登嘉靖癸丑進士令松陽調新昌
請謁無所通搏擊無所避會倭夷入犯練兵築城
竟以勞瘁成疾卒巡按胡宗憲賻之始克殮初鵬

未屬纊時有當路欲以百金助者託所知示意鵬
推枕曰不意垂死受辱其介特如此

汪汝達字志行無錫人嘉靖癸丑進士令黃巖捐俸
築城寇至而民不驚撫瘡痍集流凶理豪右所侵
奪官民田給學宮以待貧士擢戶部主事遷參議
未幾致政歸歷官二十餘年清操皜然去浙之日
屬吏致罰鍰曰此例所應得汝達驚曰居官自常
俸之外尚有應得者耶竟不受家甚貧至無以供
朝夕舉棲身數椽鬻之黃巖士民知其貧醵八十

金聞于官郵致之適遇病卒遂以爲殮
祝舜齡字壽卿無錫人嘉靖癸丑進士令政和廉介
絕人吏事精敏擢南部主事卒囊金不贏兩至無
以殮

趙與治字道隆江陰人嘉靖癸丑進士知曹州以廉
介稱時分宜擅權納賄與治入覲無所饋調廣安
六年不遷後移襄陽郡丞擢戶部郎尋轉兵部丁
母憂遂不復謁補家徒壁立終身布衣蔬食往來
鄉城間野水孤航一平頭相隨不知其爲官人也

無子年八十八而卒產薄不能具喪葬兵憲蔡公
經紀之銘其墓

張邦定武進人嘉靖乙卯倭亂爲義官練鄉兵以禦
之與倭戰鄭陸橋手刃數倭馬躡被執截髮偏降
不屈遂遇害郡守金公哭之慟唐中丞弔之曰生
爲百夫雄死爲壯士規

鄒駮字道弘武進人幼喪父廬于墓刻木肖之以奉
母病刲股後以胄監官臨海丞九年陞雄縣知縣
以清謹聞積贖鍰千餘金封庫致政歸民立生祠

祀焉

孫一元字虞允無錫人天性孝友嘉靖辛酉魁鄉書
三上春官不第意度潇洒磊落不羣爲文辭數千
百言立就未仕卒

孔永芝靖江人篤于倫理父病憂劇忽有醫來曰此
須兒女肉製藥則愈永芝入密室割左股肉授醫
製藥父服之疾果愈醫忽去莫知所向

史元鎮宜興人年十六家失火欲投火救母隣人阻
之元鎮號泣突入與母俱焚火熄見其兩手與母

相握猶未釋也時人傷之立像祀于周孝侯廟詔
旌其墓

華啓直字禮成無錫人嘉靖壬戌進士爲刑部主事
時海忠介公言事忤旨被逮繫啓直持護甚力疏
請改南陞武選郎秉正不阿出守永州歷陞叅政
以端朴弗諧于時遂乞歸家居十餘年足跡不至
城府有司踵門自通多謝罷遠近仰其清節

陸南陽字伯明武進人爲諸生工于制舉著爲講義
人傳習之以貢授湖廣善化知縣廉介自守治邑

如家久之倦游遂拂衣歸疾且亟援筆書數語曰
生無愧行死無愧衾存吾順事歿亦吾宜遂卒
徐常吉字士彰武進人家貧藉館穀養母嘉靖甲子
舉于鄉絕迹干請貧益甚暑教上海癸未成進士
授中書舍人選南戶科給事管湖冊號稱脂膏之
地不一染指第令諸胥錄書數百卷而已平生下
帷攻苦寤寐詩書薪水之餘輒以攻鐫刻所著有
四書原旨詩翼說遺經四解六經類雅等書性喜
飲與知己相對陶然乃已不設城府鄉人子弟多

從之游時有啓發稱倣弦先生官止浙江僉事
王敬之字慎中武進人性孝母搆危疾刲股得愈嘉
靖甲子領鄉薦謁選都昌以王官歸

蔣致遠字汝靜武進人少淳篤長益脩飭見二程書
慨然有求道之志子弟貴顯絕無所憑藉倣屋薄
田泊如也嘗曰不忮不求平生得力在此四字自
知卒日盥櫛危坐而逝子良鼎字定卿萬曆己丑
進士四爲縣令所至見德卒于官自孝廉以及後
宦田廬不改其舊亦近世所難得者也

史文龍字應霖武進人嘉靖壬戌進士官太守居鄉循牆而走有長者之風兒童市人咸暱就之不知其爲二千石也

邵秀孫字元芝宜興人性孝友尤嚴于義利教授生徒斤之矩矱不踰尺寸少穎慧詞翰並美爲督學所賞拔屢試不第晚以歲薦所給傳金分惠宗族亦足覘其雅志云

陳一麟字曰仁武進人少爲諸生甘貧好學一室蕭然嘗首郡試不肯干謁兢自守言動悉遵矩矱晚歲究心理學得其大旨邑庠知其貧助之粟力辭不受士論高之

劉昌祚字子延武進人性狷介不能隨俗爲諸生屢試優等邑令器之昌祚皜然不染也謁選時以貌置丞簿間選司見其文亟稱之遂授雩都知縣以廉稱

常守文字以通武進人由吏員任成都衛幕以清慎薦陞廣西副提舉再任廣東一介不取丁母憂助喪無所受歸途鬻衣充費竟以貧困死

王鑑字汝明問之子嘉靖乙丑進士知武定州州苦
養馬請以銀代省費無算州有商稅括其贏募流
民給牛種令墾草田自食逃止漸復擢戶部員外
郎調吏部念父老遽引疾歸有召命俱不拜年三
十二喪偶不復娶設榻父傍朝夕依之爲孺子戀
父歿以原官召陞尚寶卿轉南鴻臚卿引年加太
僕卿致仕鑑冲夷恬粹平居無疾言遽色貧窶者
叩之無不應聞有冤抑輒走白於有司人亦信其
無他也

胡濬字原荆無錫人嘉靖乙丑進士爲令平恕近民
訟牘稀簡持身清約如寒士召拜御史首論太監
溶直聲大震會紅星犯垣復疏有高宗不君則天
爲虐等語上怒罷爲民居家不修邊幅性好客縱
游山澤間或勸其斥買田產爲子孫計則不應卒
之日遺逋千金

周子義字以方無錫人嘉靖乙丑進士改庶吉士授
編脩陞南國子司業張江陵奪情議起南中九列
業具疏留子義獨不署名江陵沒始從官歷陞吏

部侍郎子義木訥寡言笑蹈矩履繩不失尺寸居官默然自守無所左右所著有中書直閣記國朝故實等書卒贈禮部尚書諡文恪子炳謨甲辰進士亦官翰林

王升字世新宜興人少孤奉母以居偶从友人飲母有愠色終身不御酒從萬古齋游及羅念庵王龍溪之門上下討論多所領受自守繩墨益嚴胡總督宗憲延爲上客會有失律者于法當論死遣幕客邵生諭意以千金爲壽升曰其人罪死死之由

法可以生生之由總戎何涵王生爲已而以歲薦司訓京兆邵生復在新鄭帷中謂升曰相君欲重用子一見何如升謝不應久之遷國子學錄江陵柄國欲網羅天下名士託友人道意行典制勅升亦不應出倅成都有廉譽遷鹽課提舉遂挂冠歸日與戚故論道設學從容竟日而已所著有四書輯畧讀左贅言等書

吳中行字子道性之仲子隆慶辛未進士選庶吉士授編脩萬曆丁丑十月彗星見會張居正有父喪

矯旨奪情廷臣交章保留中行不勝憤因星變陳
言上植綱常明大義疏言婉而刺居正怒甚擬旨
杖六十罷爲民治創潞河聞母訃嘔血數升創盡
裂逆奔廬墓下不復入城市居正死詔起原官尋
晉中允累遷諭德補日講官會御史丁此呂奏科
場諸不法狀冢宰楊巍叅斥此呂言者開起閣部
大臣佯託疾求去廷臣爭疏保留如居正時中行
又不勝憤復上尊主權明臣義疏語甚激切人皆
側目中行四疏乞歸久之以薦起侍讀學士掌南

京翰林院事復三疏稱疾辭免未幾病卒易簣時
作自輓詩四章正衣冠危坐而逝中行長身玉立
兩目炯炯氣雄萬夫不容迫視與君子處肝腸立
見與小人處顏色盡赤令之無所容故君子知之
而小人不無忌之者家居遇歲祲捐貲設糜飢民
多所全活鄉人德之所著有賜餘堂集

節縣志

趙用賢字汝師先世爲宋宗室有士鵬者守江陰軍
因家焉後徙常熟用賢少有才名登隆慶辛未進
士官翰林檢討丁丑江陵不奔喪臺省保留用賢

抗疏言奪情非法宜聽還守制會同年吳編修中行疏先入同日奉旨杖六十編氓癸未召復原官晉中允時遷人輻集議論盈庭欲反江陵政甚切滿朝積不能堪羣小滄訛黨議遂起用賢疏極言朋黨之禍與吳編脩俱乞歸不允後晉洗馬祭酒累官吏部侍郎駸之柄用忽中讒歸則婁江尼之也

秦柱字汝立端敏公孫嗜學工文辭精楷隸爲諸生有聲詔選中書金吾朱希孝爲柱中表遽列其名

而後召之重其材也柱先世與相新鄭有交未嘗數之其門及新鄭爲江陵所傾徇不測門下士皆引去柱特遠將之江陵父死不奔喪同郡吳中行抗疏杖闕下以身後事相託柱挾醫調護得不死江陵銜之斥爲王官復中以考功法柱欣然棄官歸家日貧終其身無抑鬱之意蓋慷慨節俠古烈士不是過也

楊德字本明武進人少純謹登辛未進士令永康却金斥羨不苟取予轉辰州同知未離永康卒檢其

橐遺俸七金而已

錢焜字韞章宜興人舉萬歷癸酉鄉薦官兵部司務清慎忠飭絕無私干齎餉金數十萬往宣雲有積羨却不入垂橐而返會職方推用西盜徇私忤旨職方以故相子有內援得免竟謫兩司廳焜得慈利學博未幾投牒歸與二三同志結社爲會恬然自得也嘗以三不識自許謂誠心直道不識人世有機械事浚食傲衣不識人世有嗜好事委心任運不識人世有徑竇事人亦共許之

俞霑字時澤宜興人坦夷純厚無表暴無城府望而知其爲有道仁人也登萬歷丁丑進士司李台州以廉靜著聲遷南吏部主事擢大名兵備念親老乞休歸後以薦起山東江西皆不赴優游林居者十餘年與諸名流以學相切劇待親黨依于厚鄉人至今稱之

顧憲成字叔時無錫人幼沉毅穎敏十六下帷攻苦榻其齋曰讀得孔書方是樂縱居顏巷不爲貧以見志萬歷丙子舉應天第一庚辰成進士授戶部

主事覩時政紕繆憤不能平擬上書申相國見南
樂魏允中漳浦劉廷蘭二君書稱善遂附名進江
陵聞而側自江陵病傾國走羣望禱署憲成名馳
騎削之江陵卒調吏部丁亥大計有糾何尚書起
鳴者與辛中丞自脩相訐憲成上疏詆尚書語侵
執政請判桂陽州量移處州司李丁母憂補泉州
壬辰大計舉清廉寡慾第一仍晉吏部時婁江再
執政有三王竝封之議憲成首疏力爭與婁江往
覆辨論侃々無所回互議乃寢癸巳大計高邑趙

南星司功盡黜要人子弟姻婭憲成實左右之執
政快々趙忽奉旨罷憲成願與同罷不報已領銓
事凡啓事與海內意所欲用者執政色沮不欲用
而執政所欲用者冢卿及內閣復尼不行久欲中
之以時望所屬不果乘部推內閣起王山陰遂削
籍歸杜門卻軌益潛心理學城隅得楊龜山先生
東林故址闢書院與同志闡繹濂洛正脈其說以
性善爲本體小心爲工夫歲有劄記沉潛粹密與
讀書錄相表裏問學者日益衆戊申起南光祿少

卿堅臥不出卒于家學者稱爲涇陽先生

顧允成字季時憲成之弟萬曆丙戌進士時海忠介
瑞爲御史房寰所誅公發憤與同榜彭遵古諸壽
賢合疏諍之削籍歸後以薦起南康教授丁母憂
補保定陞國子博士尋陞禮部主事有詔封三王
衆議洵二與樂元聲張納陞合疏諍之不報已趙
考功主計秉公執政逐之復與陳泰來賈巖于孔
兼薛敷教張納陞各疏諍之甚力謫判光州會涇
陽先生倡東林之會允成從之參驗身心究極性

命之學性尤潔廉嚴取予謫所積俸先後中丞遣
致之堅辭不受曰吾敢以在假尸祿乎嘗輯朱子
無極王伯二大辨及論治道者爲惟此四字編擬
獻之朝不果年五十四卒

錢一本字國瑞武進人萬曆癸未進士令廬陵以興
起斯文爲己任建王文成祠并祀鄒文莊諸公延
禮名碩倡明理學擢御史首疏糾前按臣貪黷不
法得旨逮戍衆爲赫然按廣西上建儲論相二疏
語多觸忌諱留中三月因杖給事孟養浩連及削

籍爲民歸里杜門絕跡不入公府郡守歐陽公建
先賢祠仿構經正堂講學共推爲主時梁谿有東
林書院顧公憲成主之遞相往來聯合同志生平
無他玩好終日兀坐手不停披尤潛心易學鑽研
卦象著像象管見盡脫前人傳註又以書九疇數
衍爲四千六百八十八文有辭有象占驗吉凶爲範
衍十卷廣大微密非俗儒所能究他如類取古今
儒學正脈作源編匯編又手錄時政大要爲邸抄
間出心得勉人學問爲黽記倡里中同壽同善會

性最方嚴又最和坦居恒角巾布素混野畷無別
勸後生學發乎至誠規人過若恐傷之意向稍善
百方誘進之有急難公憤直之又私全救之所謂
廉而不剝和而不流者也先知卒日預營兆域自
作寄寓逋客誌及長言若干首皆永訣辭世語至
期果條然而逝其了了于生死之際如此

王就學字所敬武進人萬歷丙戌進士授戶部主事
管驗糧中官需索橫甚就學稱引祖制抗議得請
著爲令改禮曹提調禮闈裁一切冗費調吏部苞

苴無所入銓曹爲之一清會考功郎缺次當及竟
他屬蓋就學性嚴冷門無尺紙通衆咸側目所規
條多不便人私復不能少抗曲徇人意忽奉內旨
考察吏部諸司黜爲民時所黜者皆當途所忌也
歸不半載卒人皆惜之

張汝治字堯敷武進人以貢司訓長興時武進令爲
長興人其子弟爲門下士五載未嘗投一刺里中
有豪觸灑橐百金求援嚴謝不應人以爲難

吳瑞登字雲卿武進人性淳厚爲諸生熟于講授尤

勤著述以貢授光州訓導薦入六館終脩憲章錄
大學衍義補獻闕下校讎繕錄焦勞致疾而卒

許世卿字伯勳無錫人家貧有志操爲諸生有聲受
知郡邑絕不干以私萬歷乙酉舉于鄉蕭然自守
揭安貧省事十戒于壁皆習俗所易蹈者書以自
警且以警世五上春官不第念母老遂謝公車并
辭傳金杜門益堅敝廬數椽僅蔽風雨怡然自適
蓋亦古所稱獨行之士也

蔣士元宜興人孝友淳篤力行古道舉嘉靖甲子官

克州同知有德政祀名宦子弘憲字成甫素性端
方刻意砥礪即一步趨若履繩尺舉萬歷乙酉官
戶部主事權關河西多所興革廉慎不染商民德
之以勞瘁卒于官祀武清名宦人稱蔣氏兩賢大
夫云

薛敷教字以身武進人萬歷己丑進士會南御史王
藩臣上疏不白憲長都御史吳時來叅之敷教抗
疏詆時來盡喪生平并侵執政有平津曲學金陵
險陂之語座師許國以貢舉非人自劾勒令回籍

後以薦起鳳翔教授陞國子助教有詔並封三王
抗疏不報趙司功主計被逐復抗疏謫光州學正
歸從東林講學苦自刻勵垢衣糲食有窮士所不
堪者一切饋遺卻不受

張納陛字以登宜興人萬歷己丑進士授刑部主事
尋調禮部有詔並封三王與樂元聲顧允成合疏
爭之已復與陳泰來等疏掾趙考功謫判鄧州歸
從東林講學林居十九年屢薦不起郡縣事有關
利害直言之不少遜杜門讀書或爲詩歌及書

畫皆有法

鄒學孟字正之武進人端謹溫雅內行淳備家庭尤
極友愛萬歷庚子舉于鄉絕不干謁郡守歐陽公
知之因其疾饋醫藥之資重其品也一舉而卒人
甚惜之

丁天毓字秀夫宜興人性耿介取予甚嚴爲諸生有
名守令不識其面爲孝廉邑侯雅重之絕無干謁
登萬歷辛丑進士令金谿六載有惠政纖毫不染
擬授御史候命卒于京貧不能殮諸年友助之其

子若孫家徒壁立不能畢婚娶蓋志行卓然真清
白吏也

補遺

馬應龍字文徵武進人舉嘉靖辛酉鄉薦令弋陽有
善政居家孝友撫庶弟有恩晚歲偕同志脩講學
廣仁會捐貲施糶不恡與人坦直和易心有不可
義形于色郡誌有志未愜者持論侃侃不阿非徒
爲愿人也良辰美景吟弄風月有逍遙之致壽八
十三無疾而終蓋棺未久士論已定亟宜補錄以

式鄉閭

唐大卿字子弘武進人舉隆慶丁卯鄉薦朴茂醇謹
有無懷葛天之風令靖安倅青州皆以廉靜自守
歸橐蕭然田舍無所增益郡縣亦未嘗有干請其
和而介如此

蔡模字子範武進人性淳篤不設城府與人交如春
風襲人生平無一鑿天理逆人心傷元氣之事先
人故廬悉推以予諸弟孝友蔚聞舉萬曆己卯鄉
薦令淳安銳意興革如直閭銅弊積百餘年一旦

剷除省民間供億以萬計與郡守不合左遷藩理
民有去思焉

褚國祥字徵興武進人萬曆庚辰進士令宣化以才
調浦城清操矚然不滓會夫上官意遷吳興丞以
母老乞終養歸戲綵膝下依之有孺子之愛後補
兗州治河曹南河大決行河使者委咎于丞議調
遂棄官歸居鄉坦率樂易酒鐺茗椀與故舊相過
從陶之自得也恬于榮進甘心澹薄人尤稱之

路雲龍字伯際宜興人萬曆庚辰進士宅心和粹凡

事依于仁厚嘗遊萬文恭之門見其質行雅重之
居家孝友兄弟白首同寢食無閒言筮仕蘄州由
度支郎出守建昌永州所至有惠政備兵黔南征
播有功擢江右大叅以黔南勞瘁卒于官人共惜
之